

ማተዎሴ ፃኣፔ ጎዳ ዩሱሰ ኪሪሰቶሴ ዛሎ ኮዥ ሃይሶ ዓይያ ካር

ማተዎሴ ፃኣፔ ኮዥ ሃይሳ ዩሱሴ ሙካንዳያ ማዔሢ ቤርታዲ ዒዛ ዛሎ ኬኤዚንቴ ዳቁሻያ ማዔሢና ሚናእ ጫኣቁሞ ማፃእፖይዳ ያኦሲ ፔኤኮ ዳሮሞ ዒንጌ ሃጊ ማዓንዳ ዎዞ ቃኣሎ ኩንሢሢ ዒዛ ዛሎና ማዔያ ኬኤዛ ኮሺ ሃይሴ ዓርቄያኬ። ዩይ ኮዥ ሃይሳ ዩሱሴ ዔያቶኮ ባኣኮይዳ ሾይንቴ፣ ዲጨ ዓይሁዶ ዓሶም ሌሊቱዎንቴ ዓጮ ቢያም ማዓያኬ።

ማተዎሴ ፃኣፔ ኮዥ ሃይሳ ኮሺ ዛጊ ጊኢጊሺንቴ ማፃኣፔኬ፤ ዩሱሴኮ ሾይንታፓ ዓርቃያ ዒዛኮ ዎኣያና ማሰቲያንታ ፃላሄ ዒዛ ዳቢሻኑዎ ጌሼ ጌሺያ ዛሎ ኬኤዜሢኮ ጊንፃ ጌሊላይዳ ዒዛኮ ቃኣሎ ኬኤዚያንታ ዒ ዔርዜ ዔርዚያንታ ሃርጊንቴ ዓሶ ፓሢሢያ ኬኤዛኬ፤ ዩካፓ ሄሊሳያ ዒዚ ጌሊላፓ ዩሩሳላሜ ዳንዴሢና ዒዛኮ ሳያይዳናንጎኮ ጋፒንያ ቃልሾ ኬሎ ጋራ ማዲንቴ ባኮ ኬኤዛኬ፤ ዩይያ ዒዛኮ ሱዒንቴ ሃይሶና ሃይባፓ ዔቂያ ዛሎንታኬ።

ሃይ ኮዥ ሃይሳ ዩሱሴ ያኦሲኮ ዎጎ ዔርዚ ቢታንቶ ዓኣያና ያኦሲ ካኣቱሞ ዛሎ ዔርዛ ዴኤፒ ዔርዛ ዓሲ ማዔሢ ኬኤዛኬ፤ ዒዛኮ ዔርዚያኮ ባሼሢ ዲማ ዲማ ጎይሢና ጊኢጊንቴ ዶንጎ ቤሲ ፓቂንታኬ፡-

1. ያኦሲ ዓሲኮ ናንጊ፣ ማዶ፣ ሃሣ ዔያታ ማዲኒ ዳንዳዓ ባኣዚንታ ሃያ ሳያይዳ ዔያቶ ካፒ ዓኣ ባካ ዓይጎታቴያ ዲካ ኬኤዚንቴሢ (ዓይ. 5—7)
2. ታጰ ላምያ ዒዛኮ ጊንያ ሃንታዞንሢ ኮዥ ሃይሶ ኬኤዞም ዳኪንቴ ዎዶና ዔያቶም ዒንጊንቴ ዳምቤ (ዓይ. 10)
3. ያኦሲ ካኣቱሞ ዛሎ ኬኤዚንቴ ዲማ ዲማ ኮኣኪንሢ (ዓይ. 13)
4. ዩሱሴ ጊንሢ ሃንቲሢ ጌይያኮ ቡሊያ ኬኤዛ ዔርዚያ (ዓይ. 18)
5. ያኦሲ ካኣቱሞኮ ኩሙሢና ሙኪያና ሃያ ዓጮኮ ጋፒንያ ዛሎ (ዓይ. 24—25)

ማፃኣፔላ ዲማ ዲማ ዓርቄ ባኮ

ዩሱሴኮ ሾይንቶ ፃጶና ዒዛኮ ሾይንቲያና (1:1—2:23)

ማሰካ ዮሃንሴ ማዴ ማዶ (3:1-12)

ዩሱሴኮ ዋኦይና ማስቲያና ፃላሄ ዒዛ ዎይታቴያ ዛጋኒ ገሼህሂ
 (3:13—4:11)
 ዩሱሴኮ ማዳና ገሊላይዳ ዓሶ ቤርታ ፔጋዲያ (4:12—18:35)
 ገሊላይዳፓ ዩሩሳሌም ሄላንዳኣና (19:1—20:34)
 ጋፒንፆ ቃልሹ ኬሎና ዩሩሳሌምይዳ ሃሣ ኮይሎ ዓጮናይዳ
 (21:1—27:66)
 ጎዳኮ ሃይባፓ ዔቂያና ሽምፔና ዓኣያ ማዒ ጴዲያና ዛሎ (28:1-20)

ዩሱሴኮ ሸይንቶ ዜርዖ
 (ሉቃ. 3:23-38)

- 1 ዓብራሃምና ዳውቴናኮ ፃጳሂ ማዔ ዩሱስ ኪሪሰቶሴኮ ሸይንቶ ዜርዖ ሂዚኩ፡-
- 2 ዓብራሃም ዪሳኦቄ፤ ዪሳኦቄ ያይቆኑቤ፤ ያይቆኑቤ ዪሁዳና ገርሲንሂና ሸዔኔ።
- 3 ዪሁዳ ቲዒማሮ ጎፆ ላኣሌሎይዳፓ ፓርሴና ዛራሃና ሸዔኔ፤ ፓርሴ ሃዲሮኔ፤ ሃዲሮኔያ ራማ ሸዔኔ።
- 4 ራማ ዓምናኣዳኣቤ፤ ዓምናኣዳኣቤያ ናፆሴ፤ ናፆሴ ሴልሞኔ ሸዔኔ።
- 5 ሴልሞኔ ራባ ጎፆ ላኣሌሎይዳፓ ቦዔዜ ሸዔኔ፤ ቦዔዜያ ሩኡቴ ጎፆ ላኣሌሎይዳፓ ዒዮቤዴ፤ ዒዮቤዴያ ዒሴዬ ሸዔኔ።
- 6 ዒሴዬ ካኣቲ ዳውቴ ሸዔኔ።
 ካኣቲ ዳውቴያ ፆሪዮ ማቾይዳፓ ሴሎሞኔ ሸዔኔ።
- 7 ሴሎሞኔ ሮቢዓም፤ ሮቢዓም ዓቢያ፤ ዓቢያ ዓሳኣፔ ሸዔኔ።
- 8 ዓሳኣፔ ዒዮሳፒፆ፤ ዒዮሳፒፆ ዒዮራም፤ ዒዮራም ፆዚያ ሸዔኔ።
- 9 ፆዚያ ዒዮዓታም፤ ዒዮዓታም ዓካኣዜ፤ ዓካኣዜ ሂዚቂያሴ ሸዔኔ።
- 10 ሂዚቂያሴ ሚናኣሴ፤ ሚናኣሴ ዓሞኦኔ፤ ዓሞኦኔ ዒዮሲያሴ ሸዔኔ።
- 11 ዒዮሲያሴ ዒሰራዔኤሌ ዴራ ባብሎኔ ዓጮ ዲዒንቲ ዔውቴ ዎዶና ዮዓኬና ገርሲንሂና ሸዔኔ።
- 12 ባብሎኔ ዓጮ ዲዒንቶኮ ገንፃፓ ዮዓኬ ሳላቲያሌ፤ ሳላቲያሌ ዜሬባቡሌ ሸዔኔ።

1:1 ዓይኑ. 132:11፤ ዒሲ. 11:1። **1:6** ሩኡቴ 4:18-22፤ 1ፆኣሲ. ዓሃኩ 2:13-15።
1:11 2ካኣቶ. ማ 24:14-15፤ 2ፆኣሲ. ዓሃኩ 36:10፤ ዓር. 27:20።

13 ዜሬባቡሌ ዓብዲዮዴ፤ ዓብዲዮዴ ዔኤሊያቄሜ፤ ዔኤሊያቄሜ ዓዘሬ ሾዔኔ።

14 ዓዘሬ ሳዶቄ፤ ሳዶቄ ዓከሜ፤ ዓከሜ ዔኤሊያዴ ሾዔኔ።

15 ዔኤሊያዴ ዓላዜሬ፤ ዓላዜሬ ማእታኣኔ፤ ማእታኣኔ ያይቆኦቤ ሾዔኔ።

16 ያይቆኦቤ ዮሴፔ ሾዔኔ፤ ዬይ ዮሴፔ ሜሲሄ * ጌይንቴ፣ ዬሱሴኮ ዒንዶ ማይራሞ ዔኬሢኬ።

17 ዓካሪ ዓብራሃሜይዳ፣ ዳውቴ ሄላንዳኣና ታጳ ያይዶ ሾይንቴ፤ ዳውቴይዳ፣ ባብሎኔ ዓጮ ዲዒንቶ ሄላንዳኣና ታጳ ያይዶ ሾይንቴ፤ ባብሎኔ ዓጮ ዲዒንቶይዳ፣ ሜሲሄ ሄላንዳኣና ታጳ ያይዶ ሾይንቴኬ።

ዬሱስ ኪሪስቶሱኮ ሾይንቶ
(ሉቃ. 2:1-7)

18 ዬሱስ ኪሪስቶሱኮ ሾይንቶ ጎይፃ ያዲኬ፤ ዒዛኮ ዒንዳ፣ ማይራማ ዮሴፔና ያኦጪንቴ ዔያታ ዎሊ ዔኩዋንቴ ዓያና ጌኤሺዳ፣ ዒዛ ጎጲ ዔኪ ጴዳ።

19 ዒዛ ያኦጪሢ ዮሴፔ ጋዓንቴ ኮሺ ዓሲ ማዔሢሮ ዓሲ ቤርተዳ ዒዛ ዳውሲሳኒ ኮዒባኣሢሮ ዴሜና ሃሻኒ ማሌ።

20 ዬና ማሊፆና ዒ ዓኣንቴ፣ ያኦሲኮ ኪኢታንቾ ዓውቴና ዒዛሞ ጴዳ፡- «ዳውቴ ናዓሦ፣ ዮሴፔ! ኔኤኒ ያኦጪዛ፣ ማይራማ ጎጲዳሢ ዓያና ጌኤሺዳ፣ ማዔሢሮ ማሊ ሂርጉዋዎ ዒዛ ዔዔኬ።

21 ዒዛ ዓቴንቄ ናይ ሾዓንዳኔ፤ ዒዚ ዴር ጎሞይዳ፣ ዳቂሻንዳሢሮ ሱንፆ ዒዛኮ ኔ «ዬሱሴ» ጌይ ጌሢ» ጌዔኔ።

22 ዬይ ቢያ ያዲ ማዔሢ ያኦሲ፣ ፔ ማሊፆ ኬኤዛ ዒሲያሴ ዛሎና፡-

23 «ሃይሾ ዓቴንቄ ዔሩዋ ኩሙሢ ዉዲሮ ናይ ጎጲ ዔኪ፣ ዓቴንቄ ናይ ሾዓንዳኔ፤ ሱንፆ ዒዛኮ «ዓማኑዔኤሌ» ጌይንቴ ጌሢንታንዳኔ» ጌዒ ኬኤዜሢ ኩማንዳጉዲኬ። (ዓማኑዔኤሌ ጌይፆ፡- ያኦሲ ኑኡና ዎላኬ ጌይሢኬ።)

24 ዮሴፔ ዒማና ጊንዓሰካ፣ ጴጫዎ ያኦዛሢኮ ኪኢታንቻሢ ዒዛ ዓይሢ ጎይፆ ዒ ያኦጪ፣ ማይራሞ ዔኬኔ።

25 ማዔቶዋ ናዎ ዒዛ ሾዓንዳፆ ሄላንዳኣና ዒዛና ዒ ላሂባኣሴ፤ ዬካ፣ ዮሴፔ ሾይንቴ ናዓሢኮ ሱንፆ «ዬሱሴ» ጌዒ ጌሢኔ።

* 1:16 ሜሲሄ፡- ጊሪኬ ሙኡቕና ኪሪስቶሱ ጌይሢ ማዓዛ ቡሊፆ፡- «ካኣቴሞሞ ዓርቆና» ጌይሢኬ። 1:18 ሉቃ. 1:27። 1:21 ሉቃ. 1:31። 1:23 ዒሲ. 7:14። 1:25 ሉቃ. 2:21።

2

ዓባ ከሰካ ዛላፓ ሙኬ ዠኦጋሢ ዛጋ ዔር ዓሶ

1 ካኣቲ ሄርዲሴ ዎዶና ዩሱሴ ዪሁዳ ዓጫ፣ በኤቴሌሄሜ ካታዎይዳ ሾይንቴኔ፤ ዩካፓ ዓባ ከሰካ ዛላፓ ዠኦጋሢ ዛጋ ዔር ዓሶ ዩራ ዔርንሢ ዩሩሳላሜ ሙከ:-

2 «ሾይንቴ፣ ዓይሁዳ ዓሶ ካኣቲ ዓንካዳይ? ዓባ ከሰካ ዛሎይዳ ዠኦጋሢ ዩንቁ ዒዛሞ ኑ ዚጋኒ ሙኬኔ» ጌዔኔ።

3 ካኣቲ ሄርዲሴ ዩያ ዋይዜ ዎዶና ዲቃቴኔ፤ ዲቃቴሢ ዒዛ ሌሊቱዋንቴ ዩሩሳላሜ ዓጫ ዓሶ ቢያሢከ።

4 ዒዚያ ቁኤሶኮ ሱኡጎና ዓይሁዳ ዓሶኮ ዎጎ ዔርዛ ዓሶ ቢያ ዔኤሊ:- «ሜሲሄ ሾይንታንዳሢ ዎካዳይ?» ጌይ ዔያቶ ያኦጫ።

5 ዔያታ ማሃዎ:- «ሜሲሄ ሾይንታንዳሢ ዪሁዳ ዓጫይዳ በኤቴሌሄሜ ካታማኬ፤ ዓይጎር ጌዔቶ ያኦሲ ማሊያ ከኤዛሢ ዛሎና።

6 ዪሁዳ ዓጫይዳ ዓኣ በኤቴሌሄሜ ካታሚሌ!

ዪሁዳ ዓጫ ዓኣ ጳኤፖ ጳኤፖ ካታማፓ ኔ ዳካዓከ።

ዓይጎር ጌዔቶ ታኣኮ ዳር፣ ዒሰራዔኤሌ ሄንቃንዳያና

ዎይሣንዳይ ኔጊዳፓ ከሰካንዳኔ» ጌይንቴ ፃኣፒንቴሢርከ።

7 ዩካፓ ሄርዲሴ ዩንሢ ዔር ዓሶንሢ ዳሚና ዔኤሊሲ ዠኦጋሢ ዔያቶም ጳጳ ዎዶ ኮሺ ያኦጫ ዔሬኔ፤

8 ዩካፓ:- «ሃሢ ዳንዲጋፓ ናዓሢ ዛጋ ኮዑዎቴ፤ ታኣኒያ ሃሃ ዳንዲ ዒዛሞ ዚጋንዳጉዲ፣ ዒንሢ ዒዛ ዳዳንቃዎ ታ ባንሢ ሙከ ዒዚ ዎካ ዓኣቴያ ታኣሞ ከኤዙዎቴ» ጌይ በኤቴሌሄሜ ዳከኔ።

9 ዔያታ ካኣቲ ጌዔሢ ዎይዜሢኮ ጊንፃ ከሰከ ዓኣዳ ዎዶና ዓባ ከሰካ ዛላ ዔያታ ዳንቁ ዠኦጋሢ ዔያቶኮ በርታ በርታ ማዒ ዔያቶ ዔከ ዓኣዳሢ ላሚ ዔያታ ዳንቁ፤ ዩይ ዠኦጋሢና ናዓሢ ዓኣ በዘ ሄላዎ ዔጭ።

10 ዔያታ ዠኦጋሢ ዛጋ ዎዶና ሚርጌና ዎዛጳኔ፤

11 ናዓ ዓኣ ከኤያ ዔያታ ጌላዎ፣ ናዎና ዒንዶ ማይራሞና ዳንቁ፤ ዩካፓ ጉሞዓቲ ዒዛሞ ዚጋዎ ሳኣዲኖ ዔያቶኮ ቡሊ ዎርቁ፣ ዑንጃ፣ ካርቤ ጎዎ ሳዑዎ ባኮዎ ዒንጊ ዒኢሾኔ፤ ዩይ ባካ ሚርጌ ሚኢሾ ከሳያከ።

12 ዩካፓ ያኦሲ ዔያቶ ሄርዲሴ ባንሢ፣ ሙኬ ጎይዎና ማዑዎጉዲ ዓዑቲና ላኣጌሢር፣ ዔያታ ሚሌ ጎይሢና ፔ ዓጫ ማዒ ዳንዳኔ።

ዮሴፔንሢኮ ጊብፃ ዓጫ በቲያ

13 ዔር ዓሰንሣ ዓኣጳሰካፓ ጎዳኮ ኪኢታንቻ ኮሴፔሞ ዓውቲና ጴዳዎ፡- «ሃካፓ ዔቁ! ኔኤኒ ማዒ ሙካንዳ ዎዶ ታ ኔኤሞ ኬኤዛንዳያ ሄላንዳኣና ናዓሢና ዒንዶና ዔኪ ገብፂ ዓጮ ቤቲ ዒኢካ ዴዔ፤ ዓይጎር ገዔቶ ካኣቲ ሄሮዲሴ ናዓሢ ዎዳኒ ኮዓኔ» ገዔኔ።

14 ዬያሮ ኮሴፔ ዔቃዎ ናዓሢና ዒንዶሎና ዔኪ ዲሞና ገብፂ ዓጮ ዓኣጳኔ።

15 ዒኢካ ካኣቲ ሄሮዲሴ ሃይቃንዳያ ሄላንዳኣና ናንገኔ፤ ዬይ ያዲ ማዔሢ ያኦሲ ፔ ማሊዎ ኬኤዛሢ ዛሎና፡- «ታኣኮ ናዓሢ ገብፂይዳፓ ታ ዔኤሌኔ» ገዔ ቃኣላ ኩማንዳጉዲኬ።

ካኣቲ ሄሮዲሴ ዳኮ ናኣቶ ዎዲሼሢ

16 ዔር ዓሰንሣ ዒዛ ገሼሢ ሄሮዲሴ ዔሬ ዎዶና ሚርገና ዳጋዲ፥ ቤኤቴሌሄሜ ካታሞና ኮይሎይዳ ዓኣ ጉርዶ ቢያ ዒዛኮ ፖኦሊሶ ዳኪ፥ ላምዎ ለዔና ያፓ ዴማ ማዔ ዓቲንቆ ናኣቶ ቢያ ዎዲሼኔ፤ ዬያ ዒ ሄዴሢ ዠኦጋሢ ጴዳ ዎዶ ዔርንሣዳፓ ያኦጪ ዎይዜ ጎይዮናኬ።

17 ያዲ ማዒዎና ያኦሲ ማሊዎ ኬኤዛ ዔርሚያሴ ዛሎና፡-

18 «ዬኤፒና ሚርገ ዒላቲ ዑኡሲና ራማ ዓጮይዳ ዎይዚንጉቴ፤ ራሄላኣ ፔ ናኣቶ ዛሎሮ ዬኤኬኔ፤

ናኣታ ዒዛኮ ኩዴሢሮ ዶዲዎ ባሽንጉቴ»

ገዒ ኬኤዜሢ ኩሜኔ።

ኮሴፔንሣኮ ገብፂ ዓጮፓ ማዒዎ

19 ሄሮዲሴ ሃይቁሣኮ ገንፃ ጎዳኮ ኪኢታንቻሢ ኮሴፔሞ ዓውቲና ጴዳዎ፡-

20 «ሃይካፓ ዔቁ! ናዓሢና ዒንዶና ዔኪ ገንሣ ዒሰራዔኤሌ ዓጮ ማዔ፤ ዓይጎር ገዔቶ ናዓሢ ዎዳኒ ኮዓ ዓሳ ቢያ ሃይቁኔ» ገዔኔ።

21 ዬካፓ ኮሴፔ ዔቁ ናዓሢና ዒንዶና ዔኪ ዒሰራዔኤሌ ዓጮ ማዒ ዴንዴኔ።

22 ጋዓንጉ ዓርኬሌዎሴ ፔ ዓዶ ሄሮዲሴ ቤዛ፥ ዪሁዳ ዓጮይዳ ካኣታዳሢ ዎይዜሢሮ ዬካ ዓኣዳኒ ኮሴፔ ዒገጩኔ። ዬካፓ ዓውቲ ዒዛሞ ኬኤዜሢሮ ገሌላ ዓጮ ዓኣዲ፥

23 ናዝሬቴ ገይንታ ካታሞይዳ ናንገኔ፤ ዬይ ያዲ ማዔሢ ያኦሲ ማሊዎ ኬኤዛ ዓሶ ዛሎና «ናዝራ ዓሲ» ገይንታንዳኔ ገይንጉቴሢ ኩማንዳጉዲኬ።

2:15 ሆሴ. 11:1። 2:18 ዔር. 31:15። 2:23 ዒሲ. 11:1፤ ማር. 1:24፤ ሉቃ. 2:39፤ ዮሃ. 1:45።

3

ማሰካ የሃኒሴ ዩሱስ ዛሎ ዳጊዲ ኬኤዜህ
(ማር. 1:1-8፤ ሉቃ. 3:1-18፤ ዮሃ. 1:19-28)

1 ዩና ዎዶና ማሰካ የሃኒሴ ዩሱዳ ዓጫ ዓሲ ሰንገጥ ዳውሎይዳ
ዓሰም ኮዥ ሃይሶ ኬኤዚ ኬኤዚ ሙኬኔ።

2 ዒዚ ኬኤዜህ፡- «ጾሱ ካኣቱማ ዑኬኔ፤ ጎሞ ቡኡጭጭ» ሂዚ
ጌዒኬ።

3 « ሰዳኮ ጎይጾ ገኢገሹጭ፡-
ሉኡጎ ጎይጾ ፕዚሱጭ፡ ጌዒ ጌዒ
ዓሲ ሰንገጥ ዳውሎይዳ ዒላታ ዓሲ ዑኡሲ» ጌዒ
ጾኡ ማሊጾ ኬኤዛ ዒሲያሴ ኬኤዜህ ዩና የሃኒሴ ዛሎኬ።

4 የሃኒሴኮ ማአዓሂ ጋአሎ ጋጋኔጋ ኮሾናያኬ፤ ኬርናይዳ ዒ
ቃልሾ ቱካኔ፡ ሙዓ ሃሃ ዒዛኮ ዓቢሂና ዑቶ ዔኤሲናኬ፤

5 ዩና ዎዶና ዩሱዳ ዓጫ ዩሩሳላሜ ካታማጋ፡ ዮርዳኖሴ ዎር
ኮይላ ዓአ ዓጫጋ ዓሳ ቢያ የሃኒሴ ኮይላ ሙከ።

6 ጎሞ ፔኤኮ ቡኡዲ ቡኡዲ ዒዛ ኮይላ ዮርዳኖሴ ዎራ ዎአጾ
ማሰታኔ።

7 የሃኒሴ ሚርጌ ፔርሴ ዓሲንታ ሶዶቄ ዓሲንታ ዎአጾና ማሰታኔ
ዒዛ ኮራ ሙካሂ ዛጋጾ፡- «ሃይ ዒንሂ ሾኡዥ! ሙካ ጾኡሲኮ
ጎሪንቶይዳጋ ዒንሂ ቶላንዳ ጎይጾ ጾኡኔ ዒንሂም ኬኤዜይ?

8 ዓካሪ ሃሂ ዒንሂኮ ጎሞ ቡኡዲጾ ዔርዛ ማላታ ማዲጭ።

9 «ኦኡኔ ዓብራሃሜ ናኣቶኬ» ጌዒ ጌዒ ሄርሺንቲፖ፤ ጾኡሲ ሃያ
ሹጮይዳጋ ዓብራሃሜ ናይ ማሃኒ ዳንዳዒ ታ ዒንሂም ጋዓኣኬ።

10 ሃሂ ዓካሪ ሚጾ ፃጸጋ ቲቃኔ ሄርጋ ገኢገኩኔ፤ ቃራ ዓአፒ
ዓአፑዎ ሚሂ ቢያ ቲቂንቲ ታሚዳ ዓገንታንዳኔ።

11 ሃሂ ታ ዒንሂ ጎሞ ቡኡዲጾ ዔርዛያ ማሂ ዎአሂና ማሰካኔ፤
ጋዓንቲ ታኣኮ ገንጾ ሙካሂ ዓያና ጌኤሽና ሃሃ ታሚና ዒንሂ
ማሰካንዳኔ፤ ዒ ታገዳጋ ሚርጌና ባሾታሂሮ ታ ዒዛኮ ቶኮ
ዲርዛታጾ ኬዳኔ ኮይሳ ዓሲቱዎሴ።

12 ዒዛኮ ሃአኮ ሶኦሪ ጌኤሾ ዓንዳ ዓአሂሮ፡ ጌኤሹሂኮ ገንጻ
ዓአፖንሂ ኮና ዎሂ ዲኢሮ ባይቁዎ ታሚዳ ሚቻንዳኔ» ዔያቶም
ጌዒኔ።

3:2 ማቴ. 4:17፤ ማር. 1:15። 3:3 ዒሲ. 40:3። 3:4 2ካአቶ. ማ 1:8፤
ዛካ. 13:4፤ ሉዊ. ዓኬ 11:22። 3:7 ማቴ. 12:34፤ 23:33። 3:9 ዮሃ. 8:33።
3:10 ማቴ. 7:19።

ዩሱሴኮ ዋኦገና ማሰቲያ
(ማር. 1:9-11፤ ሉቃ. 3:21-22)

13 ዩኖ ዋድና ዩሱሴ ዮሃንሴ ኮራ ዋኦገ ማሰታኒ ጌሊላ ዓጮይዳፓ ዮርዳኖስ ዋሮ ሙኬኔ።

14 ዮሃንሴ ጋዓንቴ፡- «ዩይ ማዓዓኬ፤ ታ ኔ ኮራ ማሰታኒ ኮይሳንቴ፡ ኔ ታ ባንሢ ሙካ?» ጌዒ ለኣጊሢ ዓርቄኔ።

15 ዩሱሴ፡- «ጾኡሲ ኮዓ ባኮ ቢያ ሂዲ ኑ ኩንሣንዳያ ኮይሳሢሮ ሃሢ ለኣጊፒ፤ ያዒ ማማያንጎ» ጌዒ ማሃዛ፡ ዮሃንሴ ዒ ጌዔሢ ዋይዛያ ዩሱሴ ዋኦገና ማሰኬኔ።

16 ዩሱሴ ዋኦገፓ ማሰቲ ኬኬሰካኣና ጫሪንጫ ቡሊንቴ፡ ያኦሲኮ ዓያና ዶኦሌ ማሊ ኬዲ ዒዛ ዑፃ ዴዓንቴ ዒ ዴንቄኔ።

17 ዩማና፡- «ታና ዋዛሳ፡ ታ ዒዛ ናሽካ ናዓሢ ታኣኮ ሃያኬ» ጋዓ ዑኡሲ ጫሪንጫፓ ዋይዚንቴኔ።

4

ፃላሄ ዩሱሴ ዛጋኒ ጌሽ ጌሺያ
(ማር. 1:12-13፤ ሉቃ. 4:1-13)

1 ዩካፓ ጌኤዡ ዓያና ፃላሄ ዒዛ ዛጋኒ ጌሻንዳጉዲ ዓሲ ናንጉዋ ዳውሎ ዩሱሴ ዔኪ ዓኣዴኔ።

2 ዒኢካ ዒ ያይዲታሚ ርኦሪና ዋንቴና ሙኡዚ ሙዑዋያ ዴዔሰካፓ ናይዲንቴኔ።

3 ዩማና ጌሻ ፃላሄ ዩሱሴ ኮራ ሙካያ፡- «ሂንዳ ኔ ያኦሲ ናይ ማዔቴ፡ ሃንሢ ሹጮንሢ ካሣ ማሄ» ጌዔኔ።

4 ዩሱሴ ማሃያ፡- « <ዓሲ ናንጋሢ ያኦሲ ኬኤዛ ቃኣሎና ማዓንዳፓዓቴም ካሣ ሙዒ ሌሊቱዋሴ > ጌይንቴ ፃኣፒንቴኔ» ጌዔኔ።

5 ዩካፓ ሃሣ ፃላሄ ዩሱሴ ያኦሲም ዲማዴ ካታዋ፡ ዩሩሳላሚ ዔኪ ዓኣዳያ ጌኤዡ ማኣርኮ ሄላሰካ ኬሲ ዔቂሲ፡-

6 « <ኔና ካፓንዳጉዲ ያኦሲ ፔ ኪኢታንቸ ኔኤም ዓይሣንዳኔ፤ ቶካ ኔኤኮ ሹጮይዳ ዲይንቴዋጉዲ፤

ዔይታ ፔ ኩጮና ዓርቂ ኔና ቃዛንዳኔ ጌይንቴ ፃኣፒንቴኔ፤ ዩያሮ ኔ ያኦሲ ናይ ማዔቶ፡ ሂንዳ ሃይፓ ሊካ ጰሌ» ጌዔኔ።

3:17 ማዢ. ማፃ 22:2፤ ዓይኑ. 2:7፤ ዒሲ. 42:1፤ ማቴ. 12:18፤ 17:15፤ ማር. 1:11፤ ሉቃ. 9:35። 4:1 ዒ.ብ. 2:18፤ 4:15። 4:2 ኬሲ. ማፃ 34:28፤ 1ካኣቶ. ማ 19:8። 4:4 ላሚ. ዋማ 8:3። 4:5 ኔሄ. 11:1፤ ዳኣኔ. 9:24። 4:6 ዓይኑ. 91:11-12።

7 ዬሱሴ ማሃዖ፡- « ሕ ጎዳ፣ ያኣዛሂሂም ፒራኒ ማሊፖ ጌይንቲ ሃሃ ዓኣፒንቴኔ» ጌዔኔ።

8 ዬካፓ ጊንሣ ዓላሄ ዬሱሴ ኮሺ ያዶሲ ዲካ ኬሲ ዓጮ ካኣቶ ቢያሂና ዔያቶኮ ቦንቾዋ ዳዋዖ፡-

9 «ጉምዓቲ ኔ ታኣም ዘጊ ካኣሸኬቴ፣ ሃያ ታ ኔኤም ቢያ ዒንጋንዳኔ» ጌዔኔ።

10 ዬሱሴ ማሃዖ፡- «ኔኤኒ ሃይ ዓላሄ፣ ሴካ ሺኢኬ! ሕ ጎዳ ያኣዛሂሂም ዘጌ፤ ሃሃ ዒዛ ሌሊ ካኣሸኬ» ጌይንቲ ዓኣፒንቴኔ» ጌዔኔ።

11 ዬካፓ ዓላሄ ዬሱሴ ሃሺ ዓኣዳዛ፣ ያኦሲኮ ኪኢታንቻ ሙኪ ዒዛ ማኣዴኔ።

ዬሱሴ ጌለላይዳ ዔርዚያ ዓርቁሂ
(ማር. 1:14-15፤ ሉቃ. 4:14-15)

12 ዮሃኒሴ ቱኡቴሂ ዬሱሴ ዋይዜ ዋዶና ጌለላ ዓጮ ዓኣዴኔ፤

13 ዒኢካፓ ናዚራቴ ካታም ሃሺ፣ ቁፒርናሆሜ ካታም ዴንዴኔ። ቁፒርናሆሜ ዛብሎኦኔና ኒፕታኣሌኤሜ ዓጮና ኮይላ ዓኣ ባዚ ዓቺ ካታማኬ።

14 ዬይ ያዲ ማዔሂ ያኦሲ ማሊያ ኬኤዛ ዒሲያሴ ዛሎና፡-

15 «ባዘ ባንሂ ዓኣዳ ጎይያና
ዮርዳኖሴ ዋሮ ሱኮናይዳ ዓኣ
ዛብሎኦኔንታ ኒፕታኣሌኤሜንታ ዓጮ
ዓይሁዴ ማዒባኣ ጌለላ ዓሶ ዓጮ፤

16 ዬያጉዲ ዲሞይዳ ናንጋ ዴራ
ዴኤፕ ፖዒ ዴንቁኔ፤
ባይሲንታም ጊኢጌ ዓጮ ዓኣ ዓሶም
ፖዒ ፖዒንዳኔ»

ጌይንቲሂ ኩማንዳጉዲኬ።

17 ዬካፓ ዓርቃዖ ዬሱሴ፡- «ያኦሲ ካኣቱማ ዑኩሂረ ጎሞ ቡኡጹዋቴ» ጌዒ ጌዒ ዔርዚሂ ዓርቁኔ።

ቤርታሳ ዬሱሴ ጊንዖ ሃንታዘንሂኮ ዔኤሊንቲዖ
(ማር. 1:16-20፤ ሉቃ. 5:1-11)

18 ዬሱሴ ጌለላ ባዘ ኮይለና ዓኣዳዖ፣ ላምዖ ዋሊኮ ጌርሲ ማዔሴኬንሂ ዴንቁኔ፤ ዔያታ ጳዲሮሴ ጌይንቲ ሲሞኦኔና ጌርሲ

4:7 ላሚ. ዋማ 6:16። 4:10 ላሚ. ዋማ 6:13። 4:12 ማቴ. 14:3፤ ማር. 6:17፤ ሉቃ. 3:19-20። 4:13 ዮሃ. 2:12። 4:16 ዒሲ. 9:1-2። 4:17 ማቴ. 3:2።

ዒንዲራሴና ማዓዛ ዔያታ ሞሎ ዓርቃያታሢሮ ሞላሢ ዓርቆ ርኢጮጉዳ ሱዞ ባዘይዳ ዓጋኔ።

19 ዩሱሴ ዔያቶም፡- «ሃኒ ታ ገንፆ ሙኩዋቴ፤ ታ ዒንሢ፡ ዓሲ ፒሪ ዓርቃያ ማሃንዳኔ» ገዔኔ።

20 ዔያታ ቤዘማና ሞላሢ ዓርቆ ሱዞ ሃሺ፡ ዒዛ ገንፆ ዓኣጳኔ።

21 ዩማፓ ዳካ ዶጫዎ ሃሣ ላምዎ ዋሊኮ ጌርሲንሢ ማዓያ፡ ዜብዲዮሴ ናይ፡ ያይቆኦቤና ዮሃኒሴና ዴንቄኔ። ዔያታ ፔኤኮ ዓዶ ዜብዲዮሴና ዋላ ዋኣያና ፒንቆ ጎንጎይዳ ሞላሢ ዓርቆ ሱዞ ኮሻንቴ ዩሱሴ ዔያቶ ዔኤሌኔ።

22 ዔያታኣ ቤዘማና ዋኣያና ፒንቆ ጎንጎንታ ዓዶንታ ሃሺ፡ ዒዛ ገንፆ ዓኣጳኔ።

**ዩሱሴኮ ሚርጌ ሃርገንቴ ዓሶ ፖዒሶንታ ዓሶ ዔርዚያንታ
(ሉቃ. 6:17-19)**

23 ዩሱሴ ዓይሁዶ ዓሶኮ ቡኪንቶ ቤዘይዳ ዔርዚ ዔርዚ ሃሣ ያኦሲ ካኣቱሞ ዛሎ ኮዥ ሃይሶዎ ኬኤዚ ኬኤዚ ጌሊላ ዓጮ ቢያይዳ ሃንታዎ፡ ዳማ ዳማ ዶርዎና ሃርገንቴ ዓሶ ፖዒሴኔ።

24 ዩያይዳፓ ዔቄያና ዒዛኮ ሱንፃ ሶኦሪያ ዓጮይዳ ቢያ ዋይዘንቴሢሮ ዓሳ ዳማ ዳማ ዶርዎና ሃርገንቴ ሜታዳ ዓሶ ቢያ ዒዛ ኮይላ ዔኪ ሙኬኔ፤ ዩያ ሃርጌ ዓሶ ባኣኮይዳ ፑርታ ዓያና ዓርቄ ዓሲ፡ ዴንሣ ዶርዓ ዓኣ ዓሲና ዎቦ ዓሲያኣ ዓኣኔ። ዩሱሴ ጋዓንቴ ቢያሢ ፓሣኔ።

25 ጌሊላና ታጾ ካታሞንሢ ጌይንታ ቤዘንሢናይዳፓ ሃሣ ዩሩሳላሜና ዩሁዳ ዓጮይዳፓ፡ ዮርዳኖሴ ዎሮ ሱኮይዳፓ ሙኬ ሚርጌ ዓሲ ዩሱሴ ገንፆ ዓኣጳኔ።

ዩሱሴ ዲኮይዳ ኬኤዜ ቃኣሎ

5

(ዓይ. 5—7)

1 ዩሱሴ ሚርጌ ዴር ዛጌ ዎዶና ዲኮ ኬሰኪ ዴዓዛ፡ ዒዛኮ ገንፆ ሃንታዘንሢ ዒዛ ኮይላ ሙኬኔ።

2 ዩካፓ ሂዚ ጌዒ ዔርዚሢሢ ዓርቄኔ፡-

ጎኔ ዎዛ

(ሉቃ. 6:20-23)

3 «ያኦሲዳ ጉሙርቄዎ ጌሢ ፔና ሂርኪዳዘንሢ ያኦሲ ካኣቱማ ዔያቶም ማዔሢሮ ዓንጂንቴያኬ።

4 ያያዘንህ

ጾኑሲ ዔያቶም ደዲሞ ዒንጋንዳሢሮ ዓንጂንቴያኩ።

5 ዒኖ ሼሌዔዘንህ

ዓጮ ዔያታ ዔካንዳሢሮ ዓንጂንቴያኩ።

6 ዒሉሞ ካሣጉዲ ናይዲንታዘንህና

ዋኣሢጉዲ ዴኤቢንታዘንህ

ዒሉሞ ዴንቁ ዔያታ ሃውሻንዳሢሮ ዓንጂንቴያኩ።

7 ዳቤ ዓሲሞ ዓቶም ጋዓዘንህ

ጾኑሲዳገ ማኣሪህ ዔያታ ዴንቃንዳሢሮ ዓንጂንቴያኩ።

8 ዒኖ ጌኤዥንህ

ጾኑሲ ዔያታ ዛጋንዳሢሮ ዓንጂንቴያኩ።

9 ቸርቴ ዓሲ ዋላ ቡኩሳዘንህና ካንሣዘንህ

ጾኑሲ ናይ ዔያታ ጌይንታሢሮ ዓንጂንቴያኩ።

10 ዒሉሞሮ ጌዒ ዒዲንቲ ዳኪንታዘንህና ሜቶ ዔካዘንህ

ጾኑሲ ካኣቱማ ዔያቶም ማዔሢሮ ዓንጂንቴያኩ።

11 «ዓሳ ዒንህ ታ ዛሎሮ ጫሽኪ፣ ዒዲ ዳካያ ማዔቴ ሃሃ ቸርታ ሉኡዙሞ ዒንህዳ ጌሰቴቴያ ዒንህ ዓንጂንቴያኩ።

12 ጫሪንጮይዳ ዒንህ ዬያ ዛሎሮ ዔካንዳ ባካ ዴኤፒታሢሮ ኮሽ ዋዛዲዋቴ፤ ሃያኮ ቤርታ ጾኑሲ ማሊያ ኬኤዛዘንህያ ዬያይዲ ዒዲ ዳኮና።»

ሶኦጌና ፖዔናኮ ኮኣኪንህ

(ማር. 9:50፤ ሉቃ. 14:34-35)

13 ዬካገ ሃሃ ዬሱሴ፡- «ዒንህ ዓጮኮ ሶኦጌኩ፤ ጋዓንቴ ሶኦጌ ዓኣያ ዒፃቴ ዋይቲ ገንህ ዓኣፃያ ማዓኒ ዳንዳዓይ? ሰካ ካራይዳ ኬኤሪንቲ ዓሲ ቶኪና ሄርቃንዳኔ፤ ዓይጎማኣ ማዓዓኩ።

14 ዒንህ ሃሃ ዓጮኮ ፖዔኩ፤ ዲኬይዳ ዓኣ ካታማ ዓኣሸንታኒ ዳንዳዑዋሴ።

15 ዓሲ ፖዒ ፖዒ ሳያ ዔኤቢና ጉኡፒ ጌሃ? ጌሃህ ፖዓ ጋርይዳ ዓኣ ዓሰሞ ቢያ ፖዓንዳጉዲ ዳጌ ቤሲዳኩ።

16 ዬያጉዲ ዓሳ ዒንህኮ ኮዥ ማዶ ዛገ ዒንህኮ ጫሪንጮ ዳዳህ ጋላታንዳጉዲ ፖዓ ዒንህኮ ዓሲ ቢያሞ ፖዖንጎ» ጌዔ።

ሙሴ ዔርዜ ዋጎ ዛሎ

5:4 ዓ.ሲ. 61:2። 5:5 ዓይኑ. 37:11። 5:6 ዓ.ሲ. 55:1-2። 5:8 ዓይኑ. 24:3-4። 5:10 1ጴጌ. 3:14። 5:11 1ጴጌ. 4:14። 5:12 2ዖሎ. ዓሃኪ 36:16፤ ዳኪ. ማጌ 7:52። 5:13 ሉቃ. 14:34-35። 5:14 ዮሃ. 8:12፤ 9:5። 5:15 ማር. 4:21፤ ሉቃ. 8:16፤ 11:13። 5:16 1ጴጌ. 2:12።

17 ሃሣ ዩሱሴ፡- «ሙሴ ዋና ያኦሲ ማሊያ ኬኤዛ ዓሶና ዔርዛ ባኮ ቃኣጫኒ ታ ዒንሢም ሙኬያ ማሎፓ፤ ታ ሙኬሢ ጌይንቴ ጎይያ ኩኩንሣኒ ሙካንዳኣፓዓቴም ቃቃኣጫኒ ሙኪባኣሴ።

18 ጎኔ ታ ዒንሢም ጋዓኔ ጫሪንጮና ሳዖና ቤዞ ሃሺ ዴንዳንዳያ ሄላንዳኣና ሙሴ ዋጎይዳፓ ፔቴ ዳኮ ፒዳኣሎማታቴያ ዳኮ ኔዲቦማታዖ ቃኣጫኒታዓኩ፤ ሙሴ ዋጎይዳ ፻፳፫ንቴ ባካ ቢያ ኩማንዳኔ።

19 ዬያሮ ዬንሢ ዓይሢያንሢዳፓ ዳኮማታዖ ኩንሡዋዖ ሃሺ ዓሢ፡ ሃንጎ ዓሶዋ ዳቢሻያ ማዒ ዔርዜቶ ያኦሲ ካኣቴዎይዳ ቦሂንቴ ዓሲ ማዓንዳኔ፤ ጋዓንቴ ዓይሢያንሢ ማዲ ኩንሣሣና ሃንጎ ዓቴ ዓሶዋ ኩንሣንዳጉዲ ዔርዛሢ ያኦሲ ካኣቴዎይዳ ቦንቸንቴያ ማዓንዳኔ።

20 «ዒንሢሢ ያሎማ ፔርሴ ዓሶና ሙሴ ዋጎ ዔርዛዞንሢ ያሎማፓ ባሺባኣቴ ያኦሲ ካኣቴዎይዳ ማሊ ዒንሢ ጌላኒ ዳንዳዐዋሴ።

ዓሲ ዋዲሢ ኮይሱዋያ ማዔሢ

21 «ቤርታ ዓሶም ጌይንቴሢ ዒንሢ ዋይዜኔ፤ ዬይያ <ዋዲፖ፣ቴ፡ ዓሲ ዋዲሢ ፑርታና ዋጊንታንዳኔ> ጋዓያኩ።

22 ታ ዒንሢም ሂዚ ጋዓኔ፡- ዓሲዳ ጎሪንታሢ ቢያ ፑርታና ዋጊንታንዳኔ፤ ሃሣ ዓይጎ ዓሲታቶዋ ሄኤኒ ፓሡዋኣሢ ሃይ፤ ጌዒ ጫሽኬቶ ዋጋ ዓሶ ቤርታ ፑርታና ዋጊንታንዳኔ፤ ሃሣ ሄ ዒና ባይቄሢ ሃይ፤ ጌዒ ጫሽካሢ ቢያ ባይቄዋ ታዋ ዋጎም ማዓንዳኔ።

23 ዬያሮ ያኦሲም ኔ ዒንጋ ባኮ ዒንጎ ቤዞይዳ ዒንጋ ዋዶና ኔ ዒሻሢም ኔ ዳቤ ባኣዚና ኔ ዒሻሢ ዖዬ ባኣዚ ኔኤም ጳቄቴ፡

24 ኔ ዒንጋ ባኮ፡ ዒንጎ ቤዞ ኮይላ ጌሢጋፓ ዴንዲ ዬያ ዓሢና ዋላ ቡኬ፤ ዬካፓ ሙኪ ኔ ዒንጋ ባኮ ዒንጌ።

25 «ኔ ሞርካሢ ኔና ዋጌና ዓይሢሴም፡ ኔ ዒዛና ዋላ ዋጎ ዋጎ ቤዞ ዓኣዲያይዳ ዓኣቴ፡ ዑኬና ኔ ሞርካሢና ዋላ ጊኣጌ። ያዲ ማዒባኣታቶ ኔ ሞርካሢ ኔና ዋጎ ዋጋሢም ዓኣሢ ዒንጋንዳኔ፤ ዋጋ ዓሢያ ሃሣ ፖኦሊሳሢም ዒንጋዛ ቱኡዞ ማኣራ ኔ ቱኡታንዳኔ።

26 ጎኔ ታ ኔኤም ጋዓኔ፤ ጨጎንጎ ጎዖና ባኮ ጋፒሲ ኔ ጨጉዋዖ ዬካፓ ኬሰካዓኩ» ጌዔኔ።

ዓሢ ሃሣ ማቾ ማዒባኣ ዓሲና ላሂሢ ዛላ ኬኤዚንቴ ባኣዚ

27 ዩሱሴ ሃሣ፡- « <ዓሢ ሃሣ ማቾ ማዒባኣ ዓሲና ላሂ፣ ጌይንቴሢ ዒንሢ ዋይዜኔ።

5:18 ሉቃ. 16:17። 5:21 ኬሲ. ማፃ 20:13፤ ላሚ. ዋማ 5:17፤ 16:18። 5:27 ኬሲ. ማፃ 20:14፤ ላሚ. ዋማ 5:18።

28 ታኣኒ ዲንሢም ጋዓንቴ «ለኣሊ ዛጊ ላሃኒ ማሌ ዓሲ ቢያ፥ ዩማና ፔ ዲኖና ዲዞና ላሂያ ማዓኔ» ጋዓኔ።

29 ዩያር ኔኤኮ ሚዛቆ ዓኣፓ ኔና ጳቢሻያ ማዔቴ ኔጊዳፓ ኬሲ ኬኤሬ፤ ጉቤ ዑፃ ኔኤኮ ባይቁዋ ታሞይዳ ኬኤሪንታሰካፓ ዑፃኮ ኔኤኮ ፔቴ ቤሲ ፓጩቶ ኮሺኬ።

30 ሚዛቆ ኩጫ ኔና ጳቢሻያ ማዔቴ ኔጊዳፓ ቲቂ ኬኤሬ፤ ጉቤ ዑፃ ኔኤኮ ባይቁዋ ታሞይዳ ኬኤሪንታሂዳፓ ዑፃኮ ኔኤኮ ፔቴ ቤሲ ፓጩቴ ኮሺኬ» ጌዔኔ።

ለኣሊ ዓንጃሢ ኮይሱዋያ ማዔያ
(ማቴ. 19:9፤ ማር. 10:11-12፤ ሉቃ. 16:18)

31 ዩሱሴ ሃሣ፡- «ዩያጉዲ <ፔኤኮ ማቾ ዓንጃሢ ቢያ ዲዞ ዓይጎር ዓንጃቶዋ ዔርዛ ባኣዚ ፃኣፒ ዲንጎንጎ» ጌይንቴ።

32 ታ ጋዓንቴ ዲንሢም ሂዚ ጋዓኔ፡- ማሌ ዓሲና ዲኢቲሢ ዛላና ማዒባኣንቴ ፔ ማቾ ዓንጃሢ ቢያ ዲዞ ዘኣሰካ ኮኣማንዳጉዲ ማሃኔ፤ ዩዮ ዓንጃንቴዞ ዔካሢያ ዲዞና ዘኣሰካ ኮኣማያ ማዓኔ» ጌዔኔ።

ጫኣቂሢ ዛላ ዔርዞና ባኣዚ

33 ዩካፓ ሃሣ ዩሱሴ፡- «ሃያኮ ቤርታ ሚናኣ ዓሶም ሕኤኒ ያኦሲም ጫኣቂ ባኣዚ ኩኩንሢ፤ ኔ ጫኣቂ ባኮ ሃሺፓ» ጌይንቴሢ ዲንሢ ዋይዜኔ።

34 ታኣኒ ጋዓንቴ ዲንሢም ሂዚ ጋዓኔ፡- ፔቴታዖ ጫኣቂፖቴ፤ ጫሪንቼ ዔኤሊ ጫኣቂፖቴ፤ ዓይጎር ጌዔቶ ጫሪንጫ ያኦሲ ዳዓ ቤዞኬ።

35 ሰዓ ዔኤሊ ጫኣቂፖቴ፤ ዓይጎር ጌዔቶ ሰዓ ያኦሲ ቶኮ ጌሃ ቤዞኬ። ዩሩሰላሚ ካታሞ ዔኤሊያ ጫኣቂፖቴ፤ ዓይጎር ጌዔቶ ዩሩሰላሚ ዳኤፓ ካኣታሂኮ ካታሞኬ።

36 ኔ ቶኦኮ ጋፓኖ ዔኤሊያ ጫኣቂፖ፤ ዓይጎር ጌዔቶ ኔኤኮ ቶኦኮ ጋፓናፓ ፔቴማ ቡኡቂሳኒ ሃሣ ካርሣኒ ኔ ዳንዳዑዋሴ።

5:29 ማቴ. 18:9፤ ማር. 9:47። 5:30 ማቴ. 18:8፤ ማር. 9:43። 5:31 ላሚ. ሞፃ 24:1-4፤ ማቴ. 19:7፤ ማር. 10:4። 5:32 ማቴ. 19:9፤ ማር. 10:11-12፤ ሉቃ. 16:18፤ 1ቆር. 7:10-11። 5:33 ሉዊ. ዓኬ 19:12፤ ፓይ. ማፃ 30:2፤ ላሚ. ሞፃ 23:21። 5:34 ያይ. 5:12፤ ዓሲ. 66:1፤ ማቴ. 23:22። 5:35 ዓሲ. 66:1፤ ዓይኦ. 48:2።

37 ይያር ዲንሢኮ ጌኤዛ <ሂዮ> ማዕቆ <ሂዮ> <ዔይዔ> ማዕቆ ዔይዔ ማግንጎ። ይማፓ ዑሣ ዓኣጅ ጌኤዛማ ፻፲፯ይዳፓኬ» ጌዔኔ።

**ዓሲ ኮሚሢ ኮይሱዋያ ማዒያ
(ሉቃ. 6:29-30)**

38 ሃሣ ይሱሴ፡- « <ዓኣፒ ዛላር ዓኣፒ፣ ዓቺ ዛላር ዓቺ፣ ጌይንቴሢ ዲንሢሢ ዋይዜኔ።

39 ታ ጋዓንቴ ዲንሢሢ ሂዚ ጋዓኔ፤ ፑርታ ዲንሢሢ ማዳ ዓሶም ኮሚ ማሂፖቴ፤ ጋዓንቴ ሚዛቆ ጋንጋር ባዓሢሢ ሻውሎ ጋንጋር ሸርሸ ሴኤዜ።

40 ፔቴ ዓሲ ኔኤኮ ዴማ ማይንቶና ዓፒሎ ዔካኒ ኔና ዋጌና ዓይሢሴቶ ዑፃ ኔ ማይንቴ ዓፒሎ ቃሲ ዔካንዳጉዲ ዲዛም ሃሹ።

41 ፔቴ ዓሲ ታኣኮ ባሶ ዔከ ዳካ ታኣና ዋላ ጎይያ ዓኣጅ፣ ጌዒ ዋልቃዴቶ ዲ ኮዔሢዳፓ ዑሣ ዲዛና ዋላ ዓኣጅ።

42 ኔና ሸኢቃሢሢ ዲንጌ፤ ኔጌዳፓ ታልዓኒ ኮዓሢ ላኣጊፖ» ጌዔኔ።

**ዋርኬ ናሽኪሢ ዛላ
(ሉቃ. 6:27-36)**

43 ይሱሴ ሃሣ፡- «ኔ ላጋሢ ናሽኬ፤ ኔ ዋርካሢ ዲፄ ጌይንቴሢ ዲንሢሢ ዋይዜኔ።

44 ታ ዲንሢሢ ጋዓንቴ ሂዚ ጋዓኔ፡- ዲንሢሢ ዋርኮ ናሽኬዋቴ፤ ዲፄ ዳካዘንሢና ዲንሢሢ ሜታሳዘንሢናም ሸኢቁዋቴ።

45 ያኣጅ ዲንሢሢ ማዴቶ ጫሪንጮይዳ ዓኣ ዲንሢሢ ዓዳሢኮ ናይ ዲንሢሢ ማዓንዳኔ። ዲዚ ፑርቶና ኮዥናም ዓሶ ኬሳኔ። ይያጉዲ ፑርቶ ዓሶና ኮዥ ዓሶናም ዒር ዲ ዋርቁሻኔ።

46 ዲንሢሢ፣ ናሽካ ዓሶ ሌሊ ዲንሢሢ ናሽኬቶ ዓይጎ ማዓንዳይ? ጎሞ ዓሳ ይያይዲዋዳ?

47 ዲንሢሢ ላጎንሢ ሌሊ ዲንሢሢ ዔኤሌቶ ዓይጎ ባሽ ባኣዚ ዲንሢሢ ማዴይ? ዓይሁዴ ማዒባኣ ዓሳ ይያ ማዳያቴዋዳ?

48 ዲንሢሢ ኤሪንጮ ዓዳሢ ፔቴታ? ዳቢንቴባኣያ ማዔሢጉዲ ዲንሢሢ ዲማዲ ማዑዋቴ» ጌዔኔ።

5:37 ሉዊ. ዓከ 19:12፤ ፓይ. ማፃ 30:2፤ ላሚ. ዋማ 23:21። 5:38 ኬሲ. ማፃ 21:24፤ ሉዊ. ዓከ 24:20፤ ላሚ. ዋማ 19:21። 5:42 ላሚ. ዋማ 15:8፤ ኮኣከ. 24:29። 5:43 ሉዊ. ዓከ 19:18። 5:44 ኮኣከ. 25:21-22። 5:48 ሉዊ. ዓከ 19:2፤ 18፤ ላሚ. ዋማ 18:13።

6

ዲንጊሢ ዛላ ዔርዘና ባኣዚ

1 ዩሱሴ ጌኤዘ ጌሰታዎ፡- «ዓሲ ዲንሢኮ ዘጋንዳጉዲ ጌዒ ዲንሢ ማዳ ኮዥ ባኮ ዓሲ ቤርታ ፔጌና ማዳሢዳፓ ዲንሢና ካፑዋቱ፤ ያዲ ዲንሢ ማዳቶ ጫሪንጮ ዓዳሢ ኮይላፓ ዲንሢ ዔኤቢ ዴንቃዓኬ።

2 ዓሲ ዘጎም ጌዒ ጎይዖ ዓጮና ቡኪንቶ ቤዘናይዳ ሄርሺንቲም ኬኤዚ ኬኤዚ ሺራ ዓሰጉዲ፤ ማንቆ ዓሰም ዲንሢ ዔኤቢ ዲንጋ ዎድና ዓሲ ዘጎም ጌዒ ማዲፖቲ፤ ዩያይዲ ማዳዘንሢ ዲማና ዔያታ ፔኤሲ ዴንቁ ጋጋፔኔ።

3 ዲንሢ ጋዓንቲ ማንቆ ዓሰም ዲንጋ ዎድና ዲንሢ ዲንጋ ባኮ ዓሲ ዔርፓ፤

4 ዲንሢ ዲንጋ ባኮ ዴማና ዲንጉዋቲ፤ ዴማና ዲንጊንታ ባኮ ዲንሢኮ ዴንቃ ዓዳሢ ዩያ ዘሎ ማሂ ዲንሢም ዲንጋንዳኔ» ጌዔኔ።

ሺኢጲሢ ዛላ ዔርዘና ባኣዚ

(ሉቃ. 11:2-4)

5 ዩሱሴ ሃሣ፡- «ዲንሢ ሺኢቃ ዎድና ጉሪ ሄርሺንቶሮ ሺኢቃ ዓሰጉዲ ማዲፖቲ፤ ዔያታ ዓሲ ኑና ዘጎም ጌዒ ዓሳ ቡካ ቤዘና ጎይሢ ዓቸናይዳ ዔቁ ሺኢቃኒ ኮዓኔ። ጎኔ ታ ዲንሢም ጋዓኔ፡- ዔያታ ኮዓ ባኮ ቢያ ዩማና ዔኪ ጋጋፔኔ።

6 ኔኤኒ ጋዓንቲ ሺኢቃኣና ቆልዖ ጋሮ ጌሊ፤ ካሮ ዎዲጋፓ ጴዳዎ ቤዘይዳ ዓኣ ዓዳሢ ሺኢቁ፤ ዓሲ ዔሩዋንቲ ኔ ሺኢቁ ባኮ ዴንቃ ኔ ዓዳሢ ኔኤም ኮይሳሢ ዲንጋንዳኔ።

7 «ዲንሢ ሺኢቃ ዎድና ፓሡዋ ማሊሢ ላሚ ላሚ ጌይሢና ሺኢጲዖ ዔያቶሲ ዋይዚንታያ ማላ፤ ዓይሁዴ ማዒባኣ ዓሰጉዲ ዲንሢኮ ሺኢጲዖ ጉሪ ዖድሲፖቲ።

8 ሃሣ ዔያቶ ጉዲያኣ ማዲፖቲ፤ ዲንሢኮ ዓዳሢ ዲንሢ ሺኢቃንዳሢኮ ቤርታ ዓይጌ ዲንሢም ኮይሳቲያ ዔዔራኔ» ጌዔኔ።

9 ዩሱሴ ሃሣ፡- «ዲንሢ ጋዓንቲ ሂዚ ጌዒ ሺኢቁዋቲ፡- ጫሪንጮ ናንጋ ኑ ዓዳሢዮ!

ሱንፃ ኔኤኮ ቦንቸንቶም፤

10 ኔ ካኣቲማ ሙኮም፤
ኔ ናሽካ ባካ ጫሪንጮ ማዔሢጉዲ
ሳዖይዳኣ ማዖም።

11 ኬላ ኬላ ኑ ሙዓንዳ ሙኡዚ ዲንጌ፤

12 ኑም ዳቤህም ኑ ዓቶም ጋዓሂጉዲ
ኑ ዳቢንቶ ዓቶም ጌዔ፤

13 ፑርታይዳፓ ኑና ካፔ፤
ዳቢሻኒ ጌሾያይዳኣ ኑና ጌልዚፖ፤

ካኣቱሞንታ ዎልቆንታ ቦንቸንታ ናንገና ኔኤሮኬ ዓኣሜን» ጌዔ።

14 ሃሣ ዬሱሴ ኬኤዛዎ፡- «ዓሳ ዒንሂም ዳባ ዳቢንቶ ዒንሂ
ዓቶም ጌዔቶ ዒንሂሲያ ጫሪንጮ ዓዳሂ ዓቶም ጋዓንዳ።።

15 ዓሳ ዒንሂም ዳቤ ባኮ ዓቶም ዒንሂ ጌዒባኣቶ ዒንሂ
ዳቢንቶም ጫሪንጮ ዓዳሂ ዓቶም ጋዓዓከ» ጌዔ።።

ሙኡዚ ሃሺ ሺኢቆ ሺኢጲሂ ዛላ ዔርዘና ባኣዚ

16 ዬሱሴ ሃሣ፡- «ዒንሂ ሙዎ ሃሺ ሺኢቆ ሺኢጲሂ ሺኢቃ ዎዶና
ሄርሺንቶሮ ማዳ ዓሳ ማዳሂጉዲ ማዲፖቴ፤ ዔያታ ሙዎ ሃሾ ዳምቦ
ማዳ ዎዶና ሙኡዚ ሃሻያ ማዔሂ ዔርታንዳጉዲ ሲዬ ዓሲጉዲ
ማዓ።። ጎኔ ታ ዒንሂም ጋዓ።። ዔያታ ዬያይዲያና ዔያቶም ኮይሳ
ባኮ ቢያ ዔኬ።።

17 ኔኤኒ ጋዓንቴ ሙዎ ሃሺ ሺኢቃ ዎዶና ዓኣፖ ካሮ ማሰቴ ቶኣኮዎ
ቴሽቴ፤

18 ኔኤኒ ዬያይደቴ ሙዎ ሃሺ ሺኢቃያታሂ ጴዳዎ ቤዛ ዓኣ ኔ
ዓዳሂዳፓ ዓታዛ ሜሌ ዎኦኒያ ዔርታንዳዎሴ።። ዓኣሺንቴ ቤዛ ኔ ሺኢቆ
ባኮ ዛጋ ኔ ዓዳሂ ኔኤም ኮይሳ ባኮ ዒንጋንዳ።። ጌዔ።።

**ጫሪንቹ ቆሎ ዛላ ዔርዘና ባኣዚ
(ሉቃ. 12:33-34)**

19 ዬሱሴ ሃሣ ኬኤዛዎ፡- «ቁንቁና ሙዓኒ፣ ሳልፒ ፑርታኒ ሃሣ
ወሲያ ቦኣኪ ወኡቃኒ ዳንዳዓ፣ ሃያ ዓጮይዳ ዒንሂም ማዓ ቆሎ
ቡኩሲፖቴ፤

20 ጋዓንቴ ቁንቁና ሙዓኒ፣ ሳልፒ ፑርታኒ ሃሣ ወሲያ ቦኣኪ
ወኡቃኒ ዳንዳዑዎ፣ ሎ ጫሪንጮ ማኣሮይዳ ዒንሂኮ ቆሎ
ቡኩሲዎቴ።።

21 ዒንሂኮ ቆላ ዓኣ ቤዘይዳ ማሊፃኣ ዒንሂኮ ዒኣካ
ማዓንዳ።።»

**ዑሂ ፖዒ
(ሉቃ. 11:34-36፤ 16:13፤ 12:22-31)**

22 «ኔኤኮ ዓኣፓ ዑያኮ ያንፔኬ፤ ዬያሮ ዓኣፓ ኔኤኮ ኮሺ ማዔቶ
ጉቤ ዑፃ ኔኤኮ ፖዓያ ማዓ።፤

23 ዓሳፓ ኔኤኮ ሃርጌያ ማዕቆ ጋዓንቴ ጉቤ ዑፃ ኔኤኮ ዲሚ ማዓኔ፤ ዓካሪ ኔጊዳ ዓኣ ፖዓ ዲሚ ማዕቆ ዬይ ዲማ ዎማጉዲ ሻኔ ዲሚ ማዓንዳይ?

24 «ፔቴ ዓሲ ላምዎ ጎዳቲም ማዳኒ ዳንዳዑዎሴ፤ ማዳቴ ፔቴህ ሲዲ ባጋህ ናሽካንዳኔ፥ ማዓባኣቶ ፔቴህ ቦንቺ ፔቴህ ቦሃንዳኔ፤ ዬያጉዲ ያኦሲና ሚኢሸናም ፔቴና ማዳኒ ዳንዳዓንቴዎሴ» ጌዔኔ።

ናንጊ ዛላ ሜታዳኒ ኮይሱዎያ ማዓያ
(ሉቃ. 16:13፤ 12:22-31)

25 ዬሱሴ ሃሃ ኬኤዛዎ፡- «ዒንህ ናንጎ ዛሎ ዓይጎ ኑ ሙዓንዳይ? [ዓይጎ ኑ ዑሽካንዳይ?] ሃሃ ዓይጎ ኑ ማይንታንዳይ? ጌዒ ማሊ ሜታዳፖቴ። ሸምፓ ሙኡዚዳፓ፡ ዑህ ማኣይዳፓ ባሽቱዎዓዳ?

26 ሂንዳ ካፖ ዛጉዎቴ፤ ጎሽኩዎሴ፥ ሃኣኮ ታይዚ ኮናይዳ ዎሁዎሴ፤ ማዕቆዎ ዒንህኮ ጫሪጎጮ ዓዳህ ዔያቶ ሙኡዛኔ። ሂዳዎ ዒንህ ዔያቶይዳፓ ባሹዎዓዳ?

27 ጎዎንቴ ዒንህ ባኣካፓ ሜታዳ ናንጎ ሌዎይዳ ዳካ ዎዳ * ቃሳኒ ዳንዳዓይ ዓኣ?

28 «ሃሃ ማኣዎ ዛላኣ ዓይጎር ዒንህ ሜታዳ ማላይ? ሂንዳ ካዮ ቡኖ ዛጉዎቴ፥ ዔያታ ሜታዳ ሱኩዎሴ፤

29 ጋዓንቴ ካኣቲ ሴሎሞኔ ቦንቺንቴታቴያ ዬያ ቡኖይዳፓ ፔቴማጉዲታዎ ማይንቴ ሚዛጲባኣሴ፤ ታ ዒንህም ጋዓኣኔ።

30 ዓካሪ ዒንህ ጉሙርቁፃ ዳኬ ዓሳ! ሃኖ ኮሽካዎ ዚር ታሚዳ ዓገንታ፥ ካዮ ማኣቶ ዬያይዲ ያኦሲፓልሚሴቶ ዒንህም ዎይቲ ባሸና ዒ ማሊንዳዎይ?

31 ዬያር ዓይጎ ኑ ሙዒ፥ ዑሽካንዳይ? ሃሃ ኑ ዓይጎ ማይንታንዳይ? ጌዒ ማሊ ሜታዳፖቴ፤

32 ዓይሁዳ ማዓባኣ ዓሳ ዬንህ ባኮንህ ዳንቆር ማሊ ሜታዳኔ፤ ዒንህኮ ጫሪጎጮ ዓዳህ ዬይ ቢያ ዒንህም ኮይሳህ ዔራኔ።

33 ቢያይዳፓ ቤርታዲ ጋዓንቴ ያኦሲኮ ካኣቲሞና ፃሉሞና ኮዑዎቴ፤ ዬይ ዒንህ ማላ ባኣኣ ቢያ ዒንህም ዒንገንታንዳኔ።

34 ዬያር ዚራ ባኣዚር ማሊ ሜታዳፖቴ፤ ዚር ማሊሳ ባኣ ዚራር ማዎንጎ፤ ፔቴ ፔቴ ኬላ ፔኤኮ ጊዳ ሜቶና ዓኣያኬ» ጌዔኔ።

* 6:27 ናንጎ ሌዎይዳ ዳካ ዎዳ ጋዓዛ፡- ፔቴ ፔቴ ማፃኣፓ «ፔ ዔይዳ ፔቴ ዎዳ» ጋዓኔ።
6:27 ዓይኑ. 39:5-7። 6:29 1ካኣቶ. ማ 10:4-7፤ 2ያኦሲ. ዓሃኬ 9:3-6።

7

ዓሲ ዑስካ ዋጊሢ ዛላ (ሉቃ. 6:37-42)

1 ዩሱሴ ሃሣ ኬኤዛያ፡- «ያኦሲ ዒንሢዳ ዋጉዋጉዲ ያናኦ ሩፒ ፑርታኬ» ጌይ ዋጊፖቴ፤

2 ዒንሢ ዋጌ ጎይያማ ዒንሢዳ ዋጊንታንዳ፤ ዒንሢ ማኬማና ዒንሢዳ ማኪንታንዳ።።

3 ኔ ዓኣፖይዳ ዓኣ ጳኤፖ ሚያ ዳንቁዋያ ኔ ላጋሢኮ ዓኣፖይዳ ዓኣ ጳኮ ቡኡሮማ ዓይጋ ኔ ዛጋይ?

4 ኔ ዓኣፖይዳ ጳኤፕ ሚሢ ዓኣንቴ፡ ሄኤኮ ዓኣፓፓ ጳኮ ቡኡሮማ ታ ኬሶም» ዋይቴ ኔ ጋዓኒ ዳንዳዓይ?

5 ሃይ ኔ ሄርሺንታሢ ሃይ! ቤርታዲ ኔኤኮ ዓኣፓ ዓኣ ጳኤፖ ሚያ ኬሴ፤ ዩካፓ ኔ ላጋሢኮ ዓኣፓ ዓኣ ጳኮ ቡኡሮማ ኔ ዳንቁ ኬሳንዳ።።

6 ያኦሲም ዲማዳ፡ ጌኤዦ ባኮ ካናቶም ዓጊፖቴ፤ ሃሣ ሚዛጳ ሹጮ ጉዲንያ ቤርታ ኬኤሪፖቴ፤ ዓይጎር ጌዔቶ ጉዲንያ ዩያ ሚዛጳ ሹጮ ቶኪና ሄርቃንዳ፤ ካናታ ሃሣ ጊንሣ ሺሪ ዒንሢ ዳዓንዳ።። ጌዔ።።

ሺኢጲሢ ዋልቁ (ሉቃ. 11:9-13)

7 ዩሱሴ ሃሣ ኬኤዛያ፡- «ሺኢቁዋቴ ዒንሢዳ ሲንጊንታንዳ፤ ኮዑዋቴ ዒንሢ ዳንቃንዳ፤ ካራ ዔቁ ዔኤሉዋቴ ካራ ዒንሢዳ ቡሊንታንዳ።።

8 ሺኢቃሢም ቢያ ዒንጊንታንዳ፤ ኮዓሢያ ዳንቃንዳ፤ ካራ ዔቁ ዔኤላሢማኦ ካራ ቡሊንታንዳ።።

9 ሲንሢ ባኣካፓ ናዓ ካሣ ሺኢቃዛ ሹቺ ዒንጋ ዓዴ ዓኣ?

10 ሃሣ ጊንሣ ዓሽኪ ሺኢቃዛ ሹኦሺ ዒንጋይ ዓኣ?

11 ዓካሪ ዒንሢ ፑርታታያ ዒንሢ ናኣቶም ኮሺ ባኣዚ ዒንጊ ዔራቶ፡ ዒንሢኮ ጫሪንጮይዳ ዓኣ ዓዳሢ ዒዛ ሺኢቃዛንሢዳም ኮሺ ባኣዚ ዒንጋንዳሢ ባሹና ዔራ።።

12 ሚሌ ዓሳ ዒንሢዳ ማዳንዳጉዲ ዒንሢ ኮዓ ባኮ ዒንሢያ ዔያቶም ማዳዋቴ፤ ሙሴ ዋጎና ያኦሲ ማሊያ ኬኤዛ ዓሶናኮ ዔርዚያ ያዲ ጋዓ።» ጌዔ።።

ኩንያና ዳልጎ ካርና (ሉቃ. 13:24)

13 ዬሱሴ ሃሣ ኬኤዛዎ፡- «ኩንዎ ካሬሎና ጌሉዋቴ፤ ዓይጎር ጌዔቶ ባይሲንቶ ባንሢ ጌልዛ ካራ ዳልጊ፣ ዔኪ ዓኣዳ ጎይፃኣ ዳልጊኬ። ዬኖ ባንሢ ጌላንዳ ዓሳ ሚርጌኬ።»

14 ናንጊ ባንሢ ጌልዛ ካራ ጋዓንቴ ኩንዔ፣ ጎይፃኣ ሜታሳያኬ፤ ዬያር ዬኖ ጎይፃሎና ጌላንዳ ዓሳ ዳካኬ» ጌዔኔ።

ፆኦሲ ማሊዎ ኬኤዛኔ ጌይ ሉኡቃ ዓሶ
(ሉቃ. 6:43-44፤ 13:25-27)

15 ዬሱሴ ሃሣ ኬኤዛዎ፡- «ጋርና ሙዓ ያኣዮታዎ፣ ማራይ ጉጉሌ ማይንቴ ዒንሢ ባኣኮ ጌሊ ዒንሢ ባይዛኒ ማላ ሉኡቁ ፆኦሲ ማሊዎ ኬኤዛኔ» ጋዓዘንሢዳገ ካፒንቱዋቴ።

16 ዒንሢ ዒያቶኮ ማዶ ዓኣፖይዳገ ዒራንዳኔ፤ ጋውዲዳገ ዋይኔ፤ ሃሣ ጋኣላንሣይዳገ ቤሌሴ ማንፂንታ?

17 ዬያጉዲ ኮሺ ሚሢ ቢያ ኮሺ ዓኣፒ፣ ፑርታ ሚሢ ሃሣ ፑርታ ዓኣፒ ዓኣፓኔ።

18 ኮሺ ሚሢ ፑርታ ዓኣፒ፣ ፑርታ ሚሢ ኮሺ ዓኣፒ ዓኣፓኒ ዳንዳዑዋሴ።

19 ኮሺ ዓኣፒ ዓኣፑዋ ሚሢ ቢያ ቲቂንቴ ታሚዳ ዓገንታንዳኔ።

20 ዬያር ሉኡቁ ፆኦሲ ማሊዎ ኬኤዛኔ ጋዓ ዓሶኮ ማዶ ዓኣፖይዳገ ዒንሢ ዒራንዳኔ።

21 «ጫሪንጫ ዓኣ ታ ዓዶ ማሊዎ ኩንሠዋዎ ሳዳሢዮ፣ ጎዳሢዮ» ጋዓሢ ቢያ ጫሪንጫ ካኣቱሞይዳ ጌላዓኬ።

22 ዓጮይዳ ፆኦሲ ዋጋ ኬሎ ሚርጌሢ ሳዳሢዮ! ጎዳሢዮ! ኔ ሱንፆና ፆኦሲ ማሊሢ ኔ ኬኤዚባኣዓዳ? ኔ ሱንፆና ፑርታ ዓያና ዓሶይዳገ ኔ ኬሲባኣዓዳ? ኔ ሱንፆና ማዲንታ ሚርጌ ዓኪ ባኣዚ ኔ ማዲባኣዓዳ? ጋዓንዳኔ።

23 ዬኖ ዋዶና «ፔቴታዎ ታ ዒንሢ ዒራዋሴ፣ ዒንሢ ዋይዘ ዒዩ ዓሳ ታ ኮይላገ ሺኢኩዋቴ!» ጌዒ ፔጌና ታ ዒያቶሞ ኬኤዛንዳኔ» ጌዔኔ።

ማኣሪ ማዜ ላሞዎ ዓሲኮ ኮኣኪንሢ
(ሉቃ. 6:47-49)

24 ዬሱሴ ሃሣ ኬኤዛዎ፡- «ዓካሪ ሃያ ታኣኮ ቃኣሎ ዋይዚ ማዳ ዓሢ ማኣሮ ዶዲ ቤሰካ ዶዲሺ ማዜ ጨንጫ ዓሲ ማላኔ።»

7:14 ዔር. 21:8፤ ላሚ. ዋማ 30:19። 7:15 ሂዘ. 22:27። 7:19 ማቴ. 3:10፤ ሉቃ. 3:9። 7:20 ማቴ. 12:33። 7:23 ዓይኑ. 6:8።

25 ጴጌፕ ዒርዚ ዋርቁም ዲጳ ኩሚ፣ ዠባሬያ ዠባርሼኔ፤ ጋዓንቴ ዬይ ማኣራሢ ደዲ ቤሲዳ ማዠንቴሢረ ደዒባኣሴ።

26 «ሃያ ታኣኮ ቃኣሎ ዋይዚ ማዲዋኣሢ ጋዓንቴ ማኣር ማኣሻላይዳ ማዠቤ ቦኣዛ ዓሲ ማላኔ።

27 ጴጌፕ ዒርዚ ዋርቁም፣ ዲጳ ኩሚ ዠባሬያ ዠባርሻዛ ዬና ማኣሬላ ቤዘና ጋፒ ደዔኔ» ጌዔኔ።

28 ዬሱሴ ዬያ ባኮ ኬኤዚ ጋፒሳዛ ዴራ ዒዛኮ ዔርዚያና ዲቃቴ ሄርሼኔ።

29 ዓይጎር ጌዔቶ ዒዚ ዔያቶኮ ዋጎ ዔርዛ ዓሶጉዲቱዋንቴ ጴጌፕ ቢታንቶና ዔርዛሢረኬ።

8

ዑፃ ኬሰካ ዶርዓሢና ዓዲንቴ ዓሢኮ ፖዒያ (ማር. 1:40-45፤ ሉቃ. 5:12-16)

1 ዬሱሴ ዲካፓ ኬዴ ዋዶና ሚርጌ ዴሬ ዒዛ ገንፆ ሙኬኔ።

2 ዬኖና ፔቴ ዑሰካ ኬሰካ ዶርዓ ዓርቄ ዓሲሰኬይ ዬሱሴ ኮይላ ሙኪ ባሊቲና ሳዓ ሎኦማዎ፡- «ጎዳሢዮ! ኔ ኮዔቴ ታና ጌኤሻኒ ዳንዳዓኔ!» ጌዔኔ።

3 ዬሱሴ ዒዛኮ ዑፆ ዓርቃዎ፡- «ጌኤሸኬ! ኔ ጌኤሸካንዳጉዲ ታ ኮዔኔ» ጋዓዛ ዬይ ዓሢ ቤዘና ዶርዓሢዳፓ ዳቂ ጌኤሸኬኔ።

4 ዬካፓ ዬሱሴ፣ ዬኖ ዶርዔሎይዳፓ ዳቂ ጌኤሸኬ ዓሢም፡- «ሃያ ባኮ ፆኦማኣ ኬኤዚ፣ ጋዓንቴ ሃሢ ዓኣዲጋፓ ኔኤኒ ጌኤሸኬሢ ቁኤሳሢም ዳቂ፤ ሃሃ ቢያሢም ማርካ ማዓንዳጉዲ ኔኤኮ ዶርዓሢዳፓ ፖዒያ ዛሎ ሙሴ ዓይሄ ዒንጎ ባኮ ፆኦሲም ዒንጌ» ጌዔኔ።

ፆኦቶ ፖኦሊሶ ዓይሃሢኮ ጉሙርቁፆ (ሉቃ. 7:1-10)

5 ዬካፓ ዬሱሴ ቁፒርናሆሜ ካታሞ ጌላዛ ፆኦታ ፖኦሊሴ ዓይሃ፣ ፔቴ ሮሜ ዓጪ ዓሲሰኬይ ዒዛ ኮይላ ሙካዎ፡-

6 «ጎዳሢዮ! ታኣኮ ማዳሢ ሃርገንቴ ዋቢ፣ ሚርጌ ሜታዲ ጋራ ላሢ ዓኣኔ፤ ታና ማኣዴ» ጌዒ ሸኢቁኔ፤

7 ዬሱሴ ማሃዎ፡- «ታ ዒዛ ሙኪ ፓሃንዳኔ» ጌዔኔ።

8 ፖኦሊሶ ዓይሣሢ ጋዓንቴ፡- «ሳዳሢዮ! ታ ማኣሪ ኔ ጌላኒ ታ ጊኢጋ ዓሲቱዋሴ፤ ዩያር ሃካ ዓኣዖ ፔቴ ባኣዚ ጌዔ፤ ታኣኮ ማዳሢ ፖዓንዳኔ፤

9 ታኣኒ ታ ቶኦኪና ዋይሣ ዓሲም ዓይሢንታያ ሃሣ ታ ዴማ፡ ታኣም ዓይሢንታ ፖኦሊሶ ዓኣኔ፤ ዔያቶይዳፓ ፔቴሢ «ዴንዴ!» ታ ጋዓዛ ዴዴንዳኔ፤ ባጋሢ ሃሣ «ሃኒ ዩዔ!» ታ ጋዓዛ ሙካኔ፤ ታኣም ማዳሢ «ሃያ ታኣም ማዳ!» ታ ጋዓዛ ዒ ማማዳኔ» ጌዔኔ።

10 ዩሱሴ ዩያ ዋይዜ ዋዶና ዲቃቲ ሄርሻዖ ዒዛና ዋላ ዓኣዳ ዓሶ ኮይላ፡- «ሳኔ ታ ዒንሢም ጋዓኔ፤ ሃያጉዴ ዴኤፒ ጉሙርቁሢ ዓኣ ዓሲ ፔቴታዖ፡ ዒሰራዔኤሌይዳኣ ማዖም ታ ዴንቁባኣሴ።

11 ዔሩዋቴ፤ ሚርጌ ዓሲ ዓባ ከሰካ ዛሎና ጌላ ዛሎናይዳፓ ሙኪ ዓብራሃሚና ዪሳኣቁና ሃሣ ያይቆኦቤና ዋላ ጫሪንጮ ካኣቱምይዳ ሙዓኒ ዴዓንዳኔ።

12 ጫሪንጮ ካኣቱም ጊኢጊንቴያታዖ ዙሎ ዲም ቤዛ ከኤሪንታንዳይ ዓኣኔ። ዩካ ዩና ዓሳ ዩኤኪ ዓቺ ዳዓንዳኔ» ጌዔኔ።

13 ዩካፓ ዩሱሴ ያኤቶ ፖኦሊሶ ዓይሣሢም፡- «ዴንዴ፡ ኔ ጉሙርቁሢጉዲ ማዖንኅ» ጌዔኔ። ዩያ ዓሢኮ ማዳሢ ዩማና ፖፖዔኔ።

ዩሱሴ ሚርጌ ሃርጌ ዓሶ ፓሣሢ
(ማር. 1:29-34፤ ሉቃ. 4:38-41)

14 ዒማና ዩሱሴ ጲዲሮሴ ማኣሪ ጌላዖ፡ ጳዲሮሴኮ ባይሳ ቆዳንጉ ላሂ ዓኣንቴ ዴንቁ፡

15 ዒዛኮ ኩጮ ዒ ካኣማዛ ቤዛና ቆሣ ዒዛኮ ሃይቁም ዔቁ ዒዛ ሸኦቺንሣኔ።

16 ዩካፓ ሳዓ ዓማዛ፡ ዓሳ ፑርታ ዓያና ዓርቁ ሚርጌ ሃርጌ ዓሲ ዩሱሴ ኮይላ ዔኪ ሙካዛ «ከሰከ» ጌይሢና ሌሊ ፑርቶ ዓያኖ ከሴም ሃርጊንቴ ዓሳ ቢያ ፖዔኔ።

17 ዩያይዲያና ዖኦሲ ማሊያ ከኤዛ ዒሲያሴ ዛሎና፡- «ዒዚ ኦኡኮ ዶርዓሢ ዔኪ ኦጊዳፓ ዳከኔ» ጌይንቴሢ ኩሜኔ።

ዩሱሴ ጊንሢ ሃንቴሢ ዔኪሳ ሜቶ
(ሉቃ. 9:57-62)

18 ዩሱሴ ሚርጌ ዓሲ ዒዛ ኮይላ ቡኪ ዓኣሢ ዛጋዖ ዒዛኮ ጊንዖ ሃንታዘንሢ ባዘኮ ሶ ሱኮ ፒንቃንዳጉዲ ዓይሣኔ።

8:11 ሉቃ. 13:29። **8:12** ዒሲ. 49:12፤ 59:19፤ ሚሊ. 1:11፤ ዓይኑ. 107:3፤ ማቴ. 22:13፤ 25:30፤ ሉቃ. 13:28። **8:17** ዒሲ. 53:4።

19 ዲማና ፔቲ ሙሴ ዔርዜ ዎሳ ዔርዛ ዓሲ ዒዛ ባንሢ ሙካዖ፡- «ዔርዛሢሃ! ኔ ዓኣደ ቤዞ ቢያ ታ ኔኤና ዓኣደንዳኔ» ጌዔኔ።

20 ዩሱሴ ማሃዖ፡- «ዉኡካሢኮ ዎርቆ ዔቲ፤ ካገኑ ሃሃ ማኣሪ ዓኣኔ። ዓሲ ናዓሢ ጋዓንቴ ላሂ ሃውሻንዳ ቤሲታዖ ባኣሴ» ጌዔኔ።

21 ዒዛኮ ጊንዖ ሃንታዞንሢዲፓ ፔቲይ፡- «ጎዳሢሃ! ቤርታዲ ታ ዴንዲ ታ ዓዴ ሃይቄም ዱኡኪ ሙኮም» ጌዔኔ።

22 ዩሱሴ ማሃዖ፡- «ኔኤኔ ታ ጊንዖ ሙኬ፤ ሃይቄ ዓሳ ሃይቄ ዓሶ ዱኡካንዳጉዲ ሃሼ» ጌዔኔ።

ዩሱሴኮ ባዞ ጉዳሢ ጎሪዖ
(ማር. 4:35-41፤ ሉቃ. 8:22-25)

23 ዩካፓ ዩሱሴ ዒዛኮ ጊንዖ ሃንታዞንሢና ዎላ ዎኣዖና ፒንቆ ጎንጎ ቶጊ ዴንዴኔ፤

24 ዩማና ዔርቲባኣ ጴኤፒ ባዚ ጉዳ ዔቂ፣ ዎኣዖና ፒንቆ ጎንጌሎ ዎኣዖ ኩንሢ፤ ዔኤዲሳኒ ዑኪ ሜታሴኔ፤ ዩሱሴ ጋዓንቴ ዲማና ጊንዒ ዓኣኔ።

25 ዒዛኮ ጊንዖ ሃንታ ናኣታ ዒዛ ጴቻዖ፡- «ጎዳሢሃ! ኑ ኩዴኔ፣ ኑና ዓውሴ» ጌዔኔ።

26 ዩሱሴ ዲማና፡- «ሃይ ዒንሢ ጉሙርቄዖ ፓጩ ዓሳ፣ ዓይጎር ዒንሢ ሃያይዲ ዒጊጩይ!» ጋዓዖ፣ ዔቂ ዠባርና ጴኤፖ ጉዳሢና ገሬም ቤዞና ቢያ ባካ ዘቲዮ ጌዔኔ።

27 ዓሳ ጋዓንቴ ሚርጌና ዲቃቲ ሄርሻዖ፡- «ሃይ ዠባርንታ ባዞንታ ቢያ ዓይሢንታሢ ዎዚጉዴ ዓሲዳይ?» ጌዔኔ።

ፑርታ ዓያና ዓርቄ ላምዖ ዓሶኮ ዳቂዖ
(ማር. 5:1-20፤ ሉቃ. 8:26-39)

28 ዩሱሴ ጌሊላ ባዞና ፒንቄ ጌርሴኖኔ ዓጮ ሙካዛ ዒኢካ ፑርታ ዓያና ዓርቄ ላምዖ ዓሲ ዱኡፒ ካይዚዳፓ ኬሰኪ ዒዛና ካኣሜኔ፤ ዩንሢ ሚርጌና ፑርታ ዓሲ ማዔሢር ዓይጎ ዓሲያ ዩኖ ጎይዖና ዓኣደኒ ዳንዳዑዎያኩ።

29 ዔያታ፡- «ዖኦሲ ናዓሢሃ! ኑኡና ዎላ ኔኤኮ ዓይጌ ዓኣይ? ዎዳ ሄሉዎንቴ ኔ ኑና ሜታሳኒ ሙኪያ?» ጌዒ ጌዒ ዒላቴኔ።

30 ዔያታ ዓኣ ቤዛፓ ዳካ ሃኬ ቤሲዳቆሎ ጉዳንሢ ዲቢ ሄንቃኔ።

31 ፑርቶ ዓያኖንሢ ዩሱሴ ኮራ፡- «ኔ ኑና ኬሳያ ማዔቲ፣ ሃሴኬ ጉዳንዖይዳ ኑ ጌላንዳጉዲ ኑና ዓይሢ» ጌዒ ዒዛ ሺኢቄኔ።

32 ዩሱሴያ፡- «ዴንዲዎቲ!» ጋዓዛ፣ ፑርቶ ዓያኖንሢ ዓሶንሢዳፓ ኬሰኪ ጉዳንዖይዳ ጌላዛ፣ ጉዳንዖ ቢያ ዔያታ ሄንቃ ማጎ ዓጮይዳፓ ዲርጊ ባዞይዳ ጌሊ ሙይንቴኔ።

33 ጉዳንን ያህን ቃና አታ ጳሽኪ ካታዎ ዳንዳዎ፣ ማዔ ባኮ ቢያ ሃሃ ፑርቶ ዓያኖና ዓርቁንቴ ዓሶንሢዳኣ ማዲንቴ ባኮ ኬኤዜ።

34 ዩካፓ ካታዎ ዓሳ ጉቤ ዩሱሴ ዛጋኒ ካታማፓ ሙኪ ዒዛ ዳንቃዎ ዔያቶኮ ዓጫፓ ዒ ኬሰኪ ዓኣዳንዳጉዲ ዒዛ ሺኢቄ።

9

ዩሱሴ ዎቦ ዓሢ ፒሽሢ (ማር. 2:1-12፤ ሉቃ. 5:17-26)

1 ዩካፓ ዩሱሴ ዎኣዎና ፒንቆ ጎንጎ ቶጊ ባዘ ጊዴና ፒንቁ ፔ ካታዎ ሙኬ።

2 ዒኢካ ዓሳ ፔቴ ዎቦ ዓሲ ሃሎና ኬዲ ዔኪ ሙኬ። ዩሱሴ ዔያቶኮ ጉሙርቁዎ ዛጋዎ ዎቦ ዓሢዎ፡- «ታ ናዓሃ ማሊፖ! ጎማ ኔኤኮ ዓቶዎ ጌይንቴ።» ጌዔ።

3 ዒማና ሙሴ ዔርዜ ዎጎ ዔርዛ ፔቴ ፔቴ ዓሳ፡- «ሃይ ያኦሲ ጫሽኬ» ጌዒ ፔ ዒኖና ማሌ።

4 ዩሱሴ ዔያቶኮ ማሊዎ ዔሪጋፓ፡- «ዓይጎር ዒንሢ ሃያጉዴ ፑርታ ባኣዚ ዒኖና ማላይ?»

5 ጎማ ኔኤኮ ዓቶዎ ጌይንቴ። ጌይሢና «ዔቁ ዴንዴ» ጌይሢናይዳፓ ሂንዳ ዎና ሽሌዓይ?

6 ጋዓንቴ ዓሲኮ ናዓሢ ሳይይዳ ዓሲኮ ጎማ ዓቶዎ ጋዓኒ ቢታንቶ ዓኣሢ ዒንሢ ዔሪጎዳዎ ኮይሳ።» ጋዓዎ፣ ዎቦ ዓሢዎ፡- «ዔቁ ሃላሢ ኔኤኮ ኬዲ ኔ ማኣሪ ዓኣዴ» ጌዔ።

7 ዩማና ዎቦ ዓሢ ዔቁ ፔ ማኣሪ ዓኣዴ።

8 ዴራ ዩያ ዛጋዎ ዲቃቲ ሄርሺ፣ ዒጊጨሢሢና ዩያጉዴ ቢታንቶ ዓሲዎ ዒንጌ ያኣዛሢ ጋላቴ።

ማቴዎስኮ ዔኤሊንቴዎ (ማር. 2:13-17፤ ሉቃ. 5:27-32)

9 ዩሱሴ ዳንዲቤቃ ማቴዎስ ነይሰኬይ ኮርዎ ዓሶፓ ሚኢሾ ቡኩሳ ቤዛ ዴዒ ዓኣንቴ ዳንቁ፡- «ሃኒ ታ ጊንዎ ሙኬ!» ጋዓዛ፣ ዒዚያ ዔቁ ዒዛ ጊንዎ ዓኣዴ።

10 ዩካፓ ዩሱሴ ማቴዎስ ማኣሪይዳ ሙዓኒ ዴዓዛ ሚኢሾ ቡኩሳ ዓሶንታ ጎዎ ዓሶንታ ሚርጌ ዓሲ ሙኪ ዒዛና ሃሃ ዒዛኮ ጊንዎ ሃንታዞንሢና ዎላ ሙዓኒ ዴዔ።

11 ፔርሴ ዓሳ ዩያ ዛጋዎ ዩሱሴኮ ጊንዎ ሃንታዞንሢ ኮራ፡- «ዒንሢኮ ዔርዛሢ ሃያ ሚኢሾ ቡኩሳ ዓሶና ጎዎ ዓሶና ዎላ ዴዒ ዎይቲ ሙዓይ?» ጌይ ያኦጩ።

9:11 ሉቃ. 15:1-2።

12 ዩሱሴ ዔያታ ጌዔሢ ዋይዛ፡- «ዳኤሻ ዔራ ዓሲ ኮይሳሢ ሃርጊንቴ ዓሲም ማዓንዳፓዓቴም ዋሊ ዓሲምቴዋሴ፤

13 ዴንዲ፡- «ዒንጎ ባኣዚ ዒንጋያይዳፓ ባሼ ዓሲ ሚጠንታ ዓሲ ታ ናሽካኔ» ጋዓ ቃኣላ ዋዚ ጌይሢታቴያ ማሊ ጳቂሢ ዔራዋቴ፤ ጎሞ ዓሶ ዔኤላኒ ማዓንዳፓዓቴም ዲሎ ዓሶ ዔኤላኒ ታ ሙኪባኣሴ» ጌዔኔ።

ሙኡዚ ሃሺሢ ዳምቤ ዛላ ያኡጠንቴ ያኡጠሢ
(ማር. 2:18-22፤ ሉቃ. 5:33-39)

14 ዒማና ማሰካ ዮሃኒሴኮ ጊንፆ ሃንታ ናኣታ ዩሱሴ ኮራ ሙካ፡- «ኑኡና ፔርሴ ዓሶና ሙፆ ሃሺፆ ዳምቦ ካፓንቴ፥ ኔ ጊንፆ ሃንታ ናኣታ ዓይጎሮ ዩያይዲ ካፕዋይ?» ጌዒ ያኡጠኔ።

15 ዩሱሴ ማሃ፡- «ዑኡታሢ ዔያቶና ዋላ ዓኣንቴ ዔፖ ዓሳ ዋይቲ ሙይ ዑሽኪ ዋዛዲዋፆ ሃሻንዳይ? ዑኡታሢ ዔያቶይዳፓ ዔውታንዳ ዋዴ ሙካንዳኔ፤ ዩኖ ዋዶና ዔያታ ሙፆ ሃሺፆ ዳምቦ ካፓንዳኔ።

16 «ዓኪ ዓፒላይዳፓ ዔኪ ጠሚ ዓፒላይዳ ዓጊ ሰካይ ባኣሴ፤ ያዲ ማዔቶ ዓኮ ዓጊፆ ጉርሚ ጠሞ ዓፒሎ ዳዳርዛንዳኔ፤ ዳርዒፆኣ ፔቶ ዳልጋንዳኔ።

17 ዩያጉዲ ሶልኪ ዑሺ ዋሆ ጠንቁ ያቲዳ ሺሜ ዋሂንቴዋሴ፤ ዋሂንቴቴ ጋዓንቴ ሺሜ ዑዣ ቡርቂ ያቶ ዲኡሴም ዑዣ ላኣለጎታንዳኔ፤ ያታኣ ጉሪ ዓታንዳኔ። ዩያሮ ሺሜ ዑሺም ዓኪ ጌኤሽ ያቲ ኮይሳኔ፤ ዩያይዴቴ ዑዣ ያቶይዳ ዔኤቢ ዋኑቴዋፆ ዴዓኔ።»

ሃይቢፓ ዔቁ ናይሰኬኖና ላኣሎ ናይ ዶርፆ ሃርጌሰኬኖኮ ዳቂፆ
(ማር. 5:21-43፤ ሉቃ. 8:40-56)

18 ዩሱሴ ዩያ ዓሶም ኬኤዚያይዳ ዓኣንቴ ፔቴ ዓይሁዶ ዓሶኮ ቡኪንቶ ቤዘ ሱኡጌሰኬይ ሙኪ ባሊቲና ዒዛ ቤርታ ሎኦማ፡- «ታኣኮ ናይሰኬና ሃርጊ፥ ሃሢ ሃይቁኔ፤ ሃዶራ፥ ኔኤኒ ሙኪ ዒዘ ዑፆ ኩጮ ጌሢቶ ዒዛ ዳቃንዳኔ» ጌዔኔ።

19 ዩያሮ ዩሱሴ ዔቁ ዓሢ ጊንፆ ዓኣዳዛ ዒዛ ጊንፆ ሃንታዘንሢያ ዋላ ዓኣዳኔ።

20 ዩካፓ ታጳ ላምፆ ሌዔ ጉቤ ላኣሎ ናይ ዶርፆና ሜታዳ ፔቴ ላኣለሰኬና ዩሱሴኮ ጊንፆ ዛሎና ሙኪ ዓፒሎኮ ዓጮ ካኣሚኔ፤

9:13 ሆሴ. 6:6፤ ማቴ. 12:7። 9:20 ፓይ. ማፆ 15:38፤ ላሚ. ዋማ 22:12።

21 ዬያ ዒዛ ማዳሚ:- «ዒዛኮ ዓፒሎታዎ ኩጮና ታ ካኣሜቶ ዳቃንዳኔ» ጌራ ፔ ዒኖና ማሌሢሮኬ።

22 ዩሱሴ ዒማና ገንሢም ሺሪ ለኣሌሎ ዛጋዖ:- «ታ ናዔሌ ማሊፖ፣ ኔ ጉሙርቁፃ ኔና ዳቁሼኔ» ጋዓዛ፣ ለኣሌላ ቤዘማና ዳቁኔ።

23 ዩካፓ ዩሱሴ ዓይሁዶ ዓሶኮ ቡኪንቶ ቤዙ ሱኡጋሢ ማኣሪ ሄላዖ ዲንካሢ ዋርቁ ሃሃ ጳሽኪ ዒላቲ ዒላቲ ዩኤካ ዓሶ ዛገ፣

24 ዓሶ:- «ሺኢኩዋቲ! ናዔላ ገገንዔያፓዓቲም ሃሃይቁባኣሴ!» ጋዓዛ፣ ዔያታ ዒዛ ቦሃ ሚኢጩኔ።

25 ዴራ ኬሰኬሢኪ ገንፃ ዒዚ ጋሮ ጌላዖ ናዔሎኮ ኩጮ ዓርቃዛ ዒዛ ዔቁኔ።

26 ዩይ ሃይሳ ዩኖ ዓጮ ቢያይዳ ዋይዘንቴ።

ዩሱሴ ዓኣፒ ባይቁያና ዳንጋ ባይቁ ዓሲ ዳቁሼሢ

27 ዩሱሴ ዩኖ ቤዛፓ ዴንዳንቴ ላምዖ ዓኣፒ ባይቁ ዓሲስኬንሢ:- «ዳውቴ ናዓሢዮ! ሃዳራ ኑና ማኣዴ» ጌራ ጌራ ዒላቲ።

28 ዩካፓ ዩሱሴ ኬኤዖ ጌላዛ ዓኣፖ ባይቁዘንሢ ዒዛ ገንፃ ሙኬም፣ ዩሱሴ ዔያቶ ኮራ:- «ዒንሢኮ ዓኣፖ ታ ቡላንዳሢ ዒንሢ ጉሙርቃ?» ጌራ ያኦጩኔ።

ዔያታ ማሃዖ:- «ሂዮ፣ ጎዳሢዮ» ጌዔ።

29 ዩካፓ ዩሱሴ ዔያቶኮ ዓኣፖ ኩቻ ካኣማዖ:- «ዒንሢ ጉሙርቁሢጉዲ ዒንሢም ማዖንጎ» ጌዔ።

30 ዓኣፓ ዔያቶኮ ቡሊንታዛ ዩሱሴ ዔያቶም:- «ሃያ ያኦማኣ ዒንሢ ኬኤዙዋጉዲ!» ጌራ ዶዲሺ ላቲ።

31 ዔያታ ጋዓንቴ ኬሰካዖ ዒኢካ ጉርዶ ቢያይዳ ዩሱሴ ዛሎ ኬኤዜ።

32 ዓኣፓ ባይቁ ዓሶንሢ ኬሰኪ ዓኣዳዛ ሜሌ ዓሲ ፑርታ ዓያና ዓርቁም፣ ዳንጋ ባይቁሰኬያ ዩሱሴ ኮይላ ዔኪ ሙኬ።

33 ፑርቶ ዓያኖ ዩሱሴ ኬሴሰካፓ ዳንጎ ባይቁ ዓሢ ጌሰቲሢ ዓርቁኔ፤ ዩያሮ ዴቃቲ ሄርሻዖ:- «ሃያጉዴ ባኣዚ ዒሰራዔኤሌ ዓጮይዳ ኑ ዛገ ቤቁባኣሴ» ጌዔ።

34 ፔርሴ ዓሳ ጋዓንቴ:- «ዒዚ ፑርቶ ዓያኖ ዓሶፓ ኬሳሢ ፑርቶ ዓያኖ ሱኡጋሢ ዋልቆናኬ» ጌዔ።

ዩሱሴ ዴር ሚጩንቴሢ

35 ዩሱሴ ዓይሁዶ ዓሶኮ ቡኪንቶ ቤዘይዳ ዔርዚ ዔርዚ፣ ያኦሲ ካኣቱም ዛሎ ኮፍ ሃይሶዋ ኬኤዚ ኬኤዚ ዩያጉዲ ሃሃ ዶርዓሢያ ቢያ ፖዒሲ ፖዒሲ ካታምና ጉርዶናይዳ ሃንቴ።

9:34 ማቴ. 10:25፤ 12:34፤ ማር. 3:22፤ ሉቃ. 11:15። 9:35 ማቴ. 4:23፤ ማር. 1:39፤ ሉቃ. 4:44።

36 ዲሞና ደራ ህንቃ ዓሰባኣ ማራይጉዲ ማታዲያ ሃሣ ማኣዲያ ዔያቶ ባኣያ ማዔሣ ዛጌ ዎደና ዲ ዔያቶ ሚጨነቴኔ።

37 ዬያሮ ዬሱሴ ዲዛኮ ጊንፆ ሃንታዞንሣ ኮራ፡- «ቡኩሶንደ ሃኣካ ሚርጌኬ፤ ሃኣኮ ቡኩሳዞንሣ ጋዓንቴ ዳካታሣር።

38 ሃኣኮ ቡኩሳ ዓሶይዳ ቃሲ ዓሲ ዳካንዳጉዲ ሃኣኮ ዓዶ ሺኢቁዎቴ» ጌዔኔ።

10

ታጳ ላምዎ ዬሱሴ ጊንፆ ሃንታዞንሣኮ ማዶሮ ዳኪንቴፆ
(ማር. 3:13-19፤ 6:7-13፤ ሉቃ. 6:12-16፤ 9:1-6)

1 ዬሱሴ ታጳ ላምዎ ዲዛ ጊንፆ ሃንታዞንሣ ፔ ባንሣ ዔኤላዎ ፑርቶ ዓያኖ ኬሳንዳጉዲ ሃሣ ዶርዎ ቢያ ፖዒሳንዳጉዲ ቢታንቶ ዔያቶም ዒንጌኔ።

2 ታጳ ላምዎ ዲዛ ጊንፆ ሃንታዞንሣኮ ሱንፃ፡- ቤርታ ሲሞኦኔ ጌይንታ ጳጳርሲንታ ዲዛኮ ጌርሲ ዒንዲራሴ፤ ዜብዲዮሴ ናኣቶንሣ፡- ያይቆኦ፤ ዮሃኒሴ፤

3 ፒልጶሴ፤ ቤርቴሌሞሴ፤ ቶኦማኦሴ፤ ሚኢሾ ቡኩሳ ማቴዎሴ፤ ዒልፒዮሴ ናኣዚ ያይቆኦ፤ ታዲዮሴ፤

4 ፔ ዓጮ ናሽካ ሲሞኦኔንታ ዬሱሴ ዓኣሣ ዒንጌ፤ ዓሰቆርንቶ ዓጮ ዓሣ ዪሁዳንታኬ።

5 ዬሱሴ ዬንሣ ታጳ ላምዎ ዲዛኮ ጊንፆ ሃንታዞንሣም፡- «ዓይሁዴ ማዒባኣ ዓሶ ባንሣ ዴንዲፖቴ፤ ሃሣ ሳማሪያ ካታሞዎ ጌሊፖቴ፤

6 ጋዓንቴ ማራቶጉዲ ዣኣሌ፤ ዒሰራዔኤሌ ዓሶ ባንሣ ዓኣዲዎቴ።

7 ዴንዲጋፓ <ጨሪንጮ ካኣቴማ ዑኬኔ> ጌዒ ጌዒ ኬኤዙዎቴ።

8 ዶርዒሣና ዓኣ ዓሶ ፖዒሱዎቴ፤ ሃይቄ ዓሶዎ ሃይባፓ ዔቁሱዎቴ፤ ዑፃ ኬሰካ ዶርዒሣና ዓኣ ዓሶ ዳቁሹዎቴ፤ ፑርቶ ዓያኖዎ ዓሶይዳፓ ኬሱዎቴ፤ ዒንሣ ጉሪ ዔኬ ባኮ ዬያ ዓሶም ጉሪ ዒንጉዎቴ።

9 ዎርቁታቴያ ቢራ ሃሣ ሞኦኖ ዓንጎዎ ቡራሻይዳ ዓጊ ዔኪፖቴ፤

10 ጋላ ዓርቆ ሉካንታ ቃሲ ማይንቶ ዓፒላንታ ቃሲ ዓኣሣ ዲርሲ ሃሣ ኮኦሎዎ ጎይፆር ዔኪፖቴ፤ ዓይጎር ጌዔቶ ማዳ ዓሲም ኮይሳ ሙኡዚ ዒንጊንታኔ።»

9:36 ገይ. ማፃ 27:17፤ 1ካኣቶ. ማ 22:17፤ 2ፆኣሲ. ዓሃኬ 18:16፤ ሂዚ. 34:5፤ ዛካ. 10:2፤ ማር. 6:34። 9:38 ሉቃ. 10:2። 10:7 ሉቃ. 10:4-12። 10:10 1ቆሮ. 9:14፤ 1ፂሞ. 5:18።

11 «ዲንሢ ጌላ ካታም ማዕቶዎ ጉርዶይዳ ዲንሢ ሸኦቲንሢ ዎይሢ ጋዓ ዓሲ ዓኣቶ ዛጉዎቲ፤ ጴዕቶ ዬኖ ቤዘ ሃሺ ዲንሢ ኬሰካንዳያ ሄላንዳኣና ዲማካ ደዑዎቲ።

12 ዓሲ ማኣሪ ዲንሢ ጌላ ዎደና ሩሲ ሙኬኔ፤ ኮሹሞ ሃኖ ማኣሮም ማዎም፣ ጎዑዎቲ።

13 ማኣሮ ዓዴ ስሸዎይ፣ ጌዒ ዲንሢ ዔኬቲ፡- ጾኦሲ ኮሹሞ ዲንሢም ማዎንጎ ጎዑዎቲ፤ ዔኪባኣያ ማዕቶ ጋዓንቲ ዓቶንጎ።

14 ዲንሢ ሸኦቲንሢ ዔኪባኣቶ፣ ዲንሢ ጌዒ ባኮዎ ዎይዚባኣቶ ዬኖ ማኣራሎና ካታሜሎናይዳፓ ኬሰካዎ ቶኮ ሲላሎ ፒዒ ዓኣዲዎቲ።

15 ጎኔ ታ ዲንሢም ጋዓ፡- ዓጮይዳ ጾኦሲ ዎጋ ኬሎና ዬኖ ካታሜሎም ሶደሚና ጋሞራናም ዲንጊንቲ ሜታሢዳፓ ባሼ ሜታ ሄላንዳኔ» ጌዒ ዓይሢ ዳኬኔ።

ጎዳ ሙኮኮ ቤርታ ዔቃንዳ ዲዒ ዳኪንቲዎና ሜታሢና (ማር. 13:9-13፤ ሉቃ. 21:12-17)

16 ዬካፓ ዬሱሴ፡- «ዓካሪ ታ ዲንሢ ማራይጉዲ ያኣያሢ ባኣካ ዳካንዳሢሮ ሸኦሸጉዲ ጨንጫ፣ ደኦሌጉዲ ሸሌዔ ማዑዎቲ።

17 ዓሳ ዲንሢ ዎጌም ዓኣሢ ዲንጋንዳኔ፤ ዓይሁዶ ዓሶኮ ቡኪንቶ ቤዛ ዲንሢ ጳርቆንዳኔ፤ ዬያሮ ኮሺ ዲንሢና ዔሩዎቲ።

18 ታ ዛሎ ማርካዲኒ ዎይሢ ዓሶና ካኣቶና ቤርቶ ፑርታ ዎጌም ዲንሢ ሸኢካንዳኔ፤ ዔያቶና ዓይሁዴ ማዒባኣ ዓሶና ቤርታ ማርካ ዲንሢ ታኣኮ ማዓንዳኔ፤

19 ዓሳ ዲንሢ ዎጌም ሸኢሻኣና ዲንሢ ኬኤዛንዳ ባካ ዬማ ዎደና ዲንሢም ኬኤዛንታንዳሢሮ ሩይጎ ሃሣ ዎዚ ጌዒ ኑ ኬኤዛንዳይ?። ጌዒ ማሊ ሜታዲፖቲ።

20 ዓይጎሮ ጌዔቶ ዲንሢ ዛሎና ኬኤዛንዳሢ ዲንሢኮ ጨሪንጮ ዓዳሢ ዓያኖኬ፤ ዲንሢቱዎሴ።

21 «ዓሲ ፔ ዓዶ ናዎ ሃይቃንዳጉዲ ዓኣሢ ዲንጋንዳኔ፤ ዬያጉዲ ዓዴያ ፔኤኮ ናዓ ሃይቃንዳጉዲ ዓኣሢ ዲንጋንዳኔ፤ ናኣታ ሸዔ ዓሶ ዑፁ ሞርኬ ማዒ ዔቁ ዎዲሻንዳኔ።

22 ዲንሢ ታ ዛሎሮ ዓሲ ቢያና ዲዒንቲያ ማዓንዳኔ፤ ጋዓንቲ ዴንዲ ጋፒንዎ ሄላንዳኣና ደይሢ ዲቃንዳኔ።

10:14 ዳኪ. ማዶ 13:51። 10:15 ማቴ. 11:24፤ ማኸ. ማፃ 19:24-28።
10:16 ሉቃ. 10:3። 10:17 ማር. 13:9-11፤ ሉቃ. 12:11-12፤ 21:12-15።
10:21 ማር. 13:12፤ ሉቃ. 21:16። 10:22 ማቴ. 24:9፤ 13፤ ማር. 13:13፤ ሉቃ. 21:17።

23 ፔቴ ቤዘይዳፓ ዲንሢ ዲዲ ደውሶዎና ሜሌ ቤሲ ዓኣዲዎቴ፤ ጎኔ ታ ጋዓኔ፤ ዓሲኮ ናባሢ ማዒ ሙካንዲያ ሄላንዳኣና ዲሰራዔኤሌ ካታዎም ዲንሢ ኬኤዚ ጋፒሳዓኬ።

24 «ዔርዘሢ ዔርዘሢዳፓ ባሼቱዎሴ፤ ማዲሢያ ማዲሻሢዳፓ ባሼቱዎሴ።

25 ዩያሮ ዔርዘሢ ዔርዘሢጉዲ፥ ማዲሢ ማዲሻሢጉዲ ማዔቴ ጊዳንዳኔ። ማእሮ ዓደም <ፑርቶ ዓያኖ ሱኡጋሢ>* ጌዒ ሱንሢ ዔያታ ጌሢቶ ማእሮ ዓሶም ዩያፓ ዑሣ ፑርታ ሱንሢ ጌሣዓዳ?» ጌዔኔ።

ያና ዒጊጫንዲያ ኮይሳቴያ ኬኤዚንቴሢ
(ሉቃ. 12:2-7)

26 ሃሣ ዩሱሴ፡- «ዓካሪ ዓሲ ዒጊጫፖቴ፤ ዓይጎሮ ጌዔቶ ዓኣቾና ባኣዚ ፔጋዲዎዮ፥ ዓኣሽንቴ ባኣዚ ዔርቱዎዮ ዓታዓኬ።

27 ዩያሮ ዲማ ዲንሢም ታ ኬኤዘሢ ፖዖይዳ ኬኤዙዎቴ፤ ካሽካሽ ዲንሢም ኬኤዚንቴሢ ዴጌ ቤሰካ ዔቂ ፔጌና ኬኤዙዎቴ።

28 ዓሽኮ ዎዲ፥ ጊዳና ሽምፖ ዎዲኒ ዳንዳዑዎ ዓሶ ዒጊጫፖቴ፤ ዩያይዳፓ ሽምፓሢንታ ዓሽኮንታ ባይቁዎ ታዎይዳ ጌልዚ ባይዘኒ ዩንዳዓ ፆኦሲ ዒጊጫፖቴ።

29 ላምዮ ሱኡታ ባካናም ሻንቹንታኔ፤ ያዲ ማዔቶዎ ዲንሢኮ ጫሪንጮ ዓዳሢ ጌዒባኣንቴ ፔቴ ሱኡቶማታዮ ጉሪ ዓቱዎሴ።

30 ዲንሢኮ ጋዓንቴ ቶኦኮ ጋማኣ ፓይዲንቴያታሢሮ፥

31 ዲንሢ ዒጊጫፖቴ፤ ዓይጎሮ ጌዔቶ ሚርጌ ሱኡታይዳፓ ዲንሢ ባሼኬ» ጌዔኔ።

ኪሪሰቶሴ ዛሎ ማርካዲንዲያ ኮይሳሢ
(ሉቃ. 12:8-9፤ 12:51-53፤ 14:26-27፤ ማር. 9:41)

32 ዩሱሴ ሃሣ፡- «ዓሲ ቤርቲዳ ታ ዛሎ ማርካዲሢም ቢያ ታኣኒ ጫሪንጮይዳ ዓኣ ታ ዓዶ ቤርታ ዒዛ ዛሎ ማርካዲንዳኔ።

33 ዓሲ ቤርቲዳ ታ ዒዛ ዔሩዎሴ» ጋዓሢ ታኣኒያ ጫሪንጮይዳ ታ ዓዶ ቤርታ ዒዛ <ዔሩዎሴ> ጋዓንዳኔ።

34 «ታ ሃያ ዓጮ ያልዚ ዔኪ ሙካንዳኣፓዓቴም ኮሹዎ ዔኪ ሙኬያ ዲንሢም ማሎፖ።

35 ታኣኒ ሙኬሢ ዓቲንቆ ናባሢ ዓዶ፥ ዉዲሮ ናዔላ ዲንዶ፥ ናኣዚ ማቻ ዓሆ ዲፃንዳጉዲኬ።

10:24 ሉቃ. 6:40፤ ዮሃ. 13:16፤ 15:20። * 10:25 ፑርቶ ዓያኖ ሱኡጋሢ፡- ጌይዖ ጊሪኬ ሙኡቹና ቢዒልዛሱሌ ጌይንታኔ። 10:25 ማቴ. 9:34፤ 12:24፤ ማር. 3:2፤ ሉቃ. 11:15። 10:26 ማር. 4:22፤ ሉቃ. 8:17። 10:33 2፻ሞ. 2:12።

36 ዬያሮ ማኦሮ ዓሳ ዎሊኮ ሞርኬ ማዓንዳኔ።

37 «ታጊዳፓ ባሼ ፔኤኮ ዓዶ፣ ዒንዶ ናሽካ ዓሲ ታኣም ማዓዓኬ፤ ታጊዳፓ ባሼ ፔኤኮ ዓቲንቆ ናፆ ሃሣ ዉዱሮ ናፆ ናሽካሣ ታኣም ማዓዓኬ።

38 ታጋቱ ሃይቃኒ ማሊ ታ ጊንፆ ሃንቱዎ ዓሲ ታኣም ማዓኒ ዳንዳዑዎሴ።

39 ፔ ናንጎ ዓይሳኒ ኮዓ ዓሲ ቢያ ፔኤኮ ናንጎ ባባይዛንዳኔ፤ ታ ዛሎሮ ጌዒ ፔ ናንጎ ባይዛሣ ጋዓንቱ ቢያ ፔኤኮ ናንጎ ዓዓይሳንዳኔ።

40 «ዒንሣ ሸኦቲንሣ ዔካሣ ታና ዔካኔ፤ ታና ዔካሣያ ታና ዳኬ ታ ዓዶ ዔካኔ፤

41 ፆኦሲ ማሊፆ ኬኤዛሣ ዬያ ሱንፆና ሸኦቲንሣ ዔካሣ ዬያም ዒንጎ ባኮ ዳንቃንዳኔ። ዒላሣ ዒሉም ሱንፆና ሸኦቲንሣ ዔካሣ ዒላሣም ዒንጎ ባኮ ዔካንዳኔ።

42 ጎኔ ታ ዒንሣም ጋዓኔ፤ ታኣኮ ጊንፆ ሃንታያ ማዔ፣ ሃንሣ ዳኩንሣዳፓ ፔቲማ ዎኣሣ ሺማ ዑሻሣ ዔኤቢ ዳንቁዎፆ ዓታዓኬ» ጌዔኔ።

11

ማሰካ ዮሃንሴ ዬሱሴ ኮራ ዳኬ ኪኢቶ ዓሶ (ሉቃ. 7:18-35)

1 ዬሱሴ ዬያ ባኮ ታጾ ላምፆ ዒዛኮ ጊንፆ ሃንታዘንሣም ኬኤዘሣኮ ጊንፆ ዬፍ ቤዘ ሃሺ ኮይሎይዳ ዓኣ ካታምንሣዳ ቃኣሎ ኬኤዛኒና ዔርዛኒ ዳንዳኔ።

2 ማሰካ ዮሃንሴ ቱኡዞ ማኦራ ቱኡቲ ዓኣፆ ኪሪሰቶሴ ማዳ ባኮ ዎይዜኔ፤ ዬያሮ ዒዛኮ ጊንፆ ሃንታዘንሣዳፓ ዬሱሴ ኮራ፡-

3 «ሙካንዳኔ ጌይንታ ማሲሄ ኔናም ማሌ ኑ ካፖንዶይ?» ጌዒ ፆኦጫንዳጉዲ ዳኬኔ።

4 ዬሱሴ ዔያቶም፡- «ዳንዲጋፓ ዒንሣ ዛጌ ባኮና ዎይዜ ባኮና ቢያ ዮሃንሴም፡-

5 ዓኣፓ ባይቁ ዓሳ ዛጋኔ፣ ሃንቶ ባሺንታ ዎሶ ዓሳ ሃንታኔ፣ ዑፃ ኬሰካ ዶርዓሣ ዓኣ ዓሳ ፖዓኔ፣ ዎዮ ባይቁ ዓሳ ዎይዜኔ፣ ሃይቁ ዓሳ ሃይባፓ ዔቃኔ፣ ማንቆ ዓሶማኣ ኮፍ ሃይሳ ኬኤዚንታኔ፤

10:36 ሚኪ. 7:6። 10:38 ማቲ. 16:24፤ ማር. 8:34፤ ሉቃ. 9:23። 10:39 ማቲ. 16:25፤ ማር. 8:35፤ ሉቃ. 9:24፤ 17:33፤ ዮሃ. 12:25። 10:40 ማር. 9:37፤ ሉቃ. 9:48፤ 10:16፤ ዮሃ. 13:20። 11:5 ዓ.ሲ. 35:5-6፤ 61:1።

6 ታና <ዲዛ ናንጋዓ> ጌዲ ደቢንቱዋሢ ጋላቲንቱያኬ ጌዲ ኬኤዙዋቱ» ጌዔኔ።

7 የሃኒሴ ኮራፓ ሙኬ ከኢቶ ዓሶንሢ ማዒ ዴንዳዛ ዬሱሴ የሃኒሴ ዛሎ ዴርም፡- «ዲንሢ ሃሢ ዓይጎ ዛጋኒ ዓሲ ናንጉዋ ዳውሎ ሙኬይ? ዠባራ ዓገሢ ፒሎ ዛጋኒዳ?

8 ማሌ ዲንሢ ዓይጎ ዛጋኒ ሙኬይ? ማዛጰ ቦኦሬ ዓፒሎ ማይንቱ ዓሶ ዛጋኒዳ? ማዛጰ ቦኦሬ ዓፒሎ ማኣዔ ዓሳ ካኣቶ ማኣራ ዓኣኔ።

9 ሂዳዖ ዲንሢ ዓይጎር ሙኬይ? ዖኦሲ ማሊሢ ኬኤዛ ዓሲ ዛጋኒዳ? ሂዮ! ዬያ ዖኦሲ ማሊዖ ኬኤዛሢዳፓ ባሾሢ ዛጋኒኬ።

10 ዲዛ <ኔኤኮ ቤርታ ቤርታ ዓኣዲ ጎይዖ ኔኤኮ ገኢገሻንዳ ታኣኮ ከኢቶ ናዓሢ ኔኤኮ ቤርታ ታ ዳካንዳኔ> ጌይንቲ ዖኣፒንቲሢ።

11 ጎኔ ታ ዲንሢም ጋዓኔ፤ ዓጮይዳ ሾይንቲ ዓሶይዳ ቢያ ማሰካ የሃኒሴይዳፓ ባሾ ባኣሴ። ጋዓንቲ ዖኦሲ ካኣቱምይዳ ቢያይዳፓ ሂርኬ ማዔሢ ዲዛይዳፓ ባሻንዳኔ።

12 ማሰካ የሃኒሴ ዋይይዳፓ ሃዮ ሄላንዳኣና ዖኦሲ ካኣቱማ ዋልቁና ዳልገ ዳልገ ዓኣኔ፤ ዓካሪ ሚርጌና ዲዞር ማታዳዘንሢ ዲዞ ዴንቃንዳኔ» ጌዲ ኬኤዚሢ ዓርቁኔ።

13 ሃሢ ዬሱሴ፡- «ዖኦሲ ማሊዖ ኬኤዛ ዓሶና ሙሴ ዔርዜ ዎጎና ሙኪ ማሰካ የሃኒሴ ሄላንዳኣና ዖኦሲ ካኣቱም ዛሎ ኬኤዚ ኬኤዚ ዴዔኔ።

14 ዓካሪ ዔያታ ኬኤዜ ባኮ ዲንሢ ዋይዛኒ ኮዔያታቶ ዬይ ሙካንዳኔ ጌይንቲ ዔኤሊያሴ፣ ሃይሾ ሃያ የሃኒሴኬ።

15 ዋይዛ ዋይዚ ዓኣሢ ዋይዘንጎ!» ጌዔኔ።

16 ሃሢ ቃሳዖ፡- «ሃያ ዎዶ ዓሳ ዓይጎ ማላኔ ታ ጋዓንዳይ? ዘኣዛ ቡከንቲ ዴዒ ናኣታ ፔኤኮ ላጎ ዔኤሊ ዔኤሊ፣

17 ዎዛጎ ኮሢ ዲንሢም ኑ ኮርጌኔ፤ ዲንሢ ጋዓንቲ ሶኦሪባኣሴ፤ ሃሢ ቃዮ ዲንሢም ኑ ቃዬማኣ ዲንሢ ዬኤከባኣሴ» ጋዓሢ ማላኔ።

18 ማሰካ የሃኒሴ ሙኤዚ ሙዑዎዖ ሃሢ ዑሽኩዎዖ ሙካዛ <ሃያይዳ ፑርታ ዓያና ዓኣኔ!> ዔያታ ጌዔኔ፤

19 ዓሲኮ ናዓሢ ሃሢ ሙዒ ዑሽኪ ዑሽኪ ሙካዛ፣ ሃሢ ሃይ ሙኤዚና ዑሽና ናሽካያኬ፤ ማኢሾ ቡኩሳ ዓሶና ጎም ዓሶናኮ ላጌኬ!» ዔያታ ጌዔኔ። ያዲ ማዔቲያ ዔራቶኮ ጎኔማ ፔ ማዶና ፔጋዲ ዔርታንዳኔ» ጌዔኔ።

ጉሙርቁዎዖ ዓቲዖና ቦሂንቲ ካታሞንሢ
(ሉቃ. 10:13-15)

11:10 ሚሊ. 3:1። 11:13 ሉቃ. 16:16። 11:14 ሚሊ. 4:5፤ ማቴ. 17:10-13፤ ማር. 9:11-13።

20 ዩካፓ ሃሣ ዩሱሴ ሃንጎ ካታሞይዳፓ ባሸና ሚርጌ ያኦሲ ዎልቁና ማዲንታ ዓኪ ባአዚ ማዲንቲ ካታሞንሢ ጎሞ ፔኤሲ ቡኡዲባአሢሮ።

21 «ኮራዚኔ ኔና ባዳዔ! ሃሣ ቤቴሳይዳ ኔና ባዳዔ! ዲንሢዳ ማዲንቲ ያኦሲ ዎልቁና ማዲንታ ዓኮ ባካ ዲሮሴና ሲዶና ካታሞናይዳ ማዲንቲቴ ሄኤዶ ዔያታ ሲዬ ፓቲሌ ቱኪ ቶኦካ ቢዲንሢ ዎሂንቲ ጎሞ ፔኤኮ ቡኡዲና ናንዳንቲኬ።

22 ዬያሮ ዓጮይዳ ያኦሲ ዎጋ ኬሎና ዲንሢዳፓ ዲሮሴና ሲዶናሞ ሄላንዳ ማታሢ ሹሌዔ ማዓንዳኔ።

23 ሃና ኔ ቁፒርናሆሜ! ጫሪንቺ ሄላኒ ኔ ኮይባይ? ጋዓንቲ ያኦሲ ኔና ጋአናአሜ ታሞይዳ ጌልዛንዳኔ፤ ኔጊዳ ማዲንቲ ያኦሲ ዎልቁና ማዲንታ ዓኮ ባካ ዎንዴ ሶዶሜይዳ ማዲንቲያታቴ ዬና ካታሜላ ሃሮ ሄላንዳአና ዓአያ ናንዳንዳቴኬ።

24 ዬያሮ ጎኔ ታ ኔኤሞ ጋዓኔ፤ ጋፒንዎ ዎጎ ኬሎና ኔጊዳፓ ሶዶሜ ካታሞሞ ዲንጊንታንዳ ማታሢ ሹሌዓንዳኔ» ጌዒ ቦሂሢ ዓርቄኔ።

**ኪሪሰቶሴ ዲንጋ ሃውሺሢ
(ሉቃ. 10:21-22)**

25 ዲማና ዩሱሴ፡- «ጫሪንጮና ሳዖናኮ ጎዳ ማዔ፥ ታ ዓዳሢዮ! ሃያ ባኮ ዔሮ ዓሶይዳፓ ዓአቺ ዔኤቢ ዔራዎ ዓሶሞ ኔ ፔጋሲ ዔርዜሢሮ ታ ኔና ጋላታኔ፤

26 ሂዮ! ታ ዓዳሢዮ! ኔ ዬያይዳኒ ኔ ማሊዮጉዴያ ማዔኔ።

27 ታ ዓዴ ቢያ ባኮ ታአሞ ዲንጌኔ፤ ዓዶይዳፓ ዓታዛ ናዓሢ ዔራይ ያኦኒያ ባአሴ። ዬያጉዲ ሃሣ ናዓሢዳፓ ዓታዛ ዓዶ ዔራያ ባአሴ፤ ናዓ ዔርዛኒ ኮዒባአያታቶ ያኦኒያ ዓዶ ዔራኒ ዳንዳዑዋሴ» ጌዔኔ።

28 ሃሣ ዩሱሴ፡- «ዲንሢ ኬዳ ዴኤዳሞ ላቢንቲዘንሢ ቢያ ሃኒ ታ ባንሢ ሙኩዋቴ! ታ ዲንሢ ሃውሺሳንዳኔ።

29 ታ ቃንባሮ ኬዲዋቴ፥ ታ ማዳ ባኮ ታጊዳፓ ዘጊ ማዲዋቴ፤ ታአኒ ሹሌዔ ሃሣ ሚጪንታያኬ፤ ዲንሢ ሃውሾ ዴንቃንዳኔ።

30 ታ ቃንባራ ባቃና ዔኩዋያ፤ ኬዳአ ሃሣ ታአኮ ሹሌዔኬ» ጌዔኔ።

11:21 ዲ.ሲ. 23:1-18፤ ሂዚ. 26:1—28:26፤ ዓ.ዪ. 3:4-8፤ ዓሞ. 1:9-10፤ ዘካ. 9:2-4። 11:23 ዲ.ሲ. 14:13-15፤ ማዢ. ማፃ 19:24-28። 11:24 ማቴ. 10:15፤ ሉቃ. 10:12። 11:27 ዮሃ. 3:35፤ 1:18፤ 10:5። 11:29 ዔር. 6:16።

12

ዓይሁድ ዓሰኮ ሃውሾ ከሎ ዛሎ ያኑጪንቴ ያኑጪሢ
(ማር. 2:23-28፤ ሉቃ. 6:1-5)

1 ይያኮ ጊንፃፓ ዩሱሴ ዓይሁድ ዓሰኮ ሃውሾ ከሎና ፔቴ ዛርጎ ጎሺ ጊዳና ዓኣዳንቴ ዒዛኮ ጊንፃ ሃንታዞንሢ ናይዲንቴሢር ዛርጎ ቲሻሢ ዲኡዚ ዲኡዚ ዔኪ ዳዒሢ ዓርቄ።

2 ፔርሴ ዓሳ ዩያ ዛጋፃ ዩሱሴ ኮራ፡- «ሃኣዛጌ፤ ኔኤኮ ጊንፃ ሃንታዞንሢ ሃውሾ ከሎና ዓይሢንቴባኣ ባኣዚ ማዳኔ!» ጌዔ።

3 ዩሱሴ ማሃያ፡- «ዳውቴና ዒዛና ዋላ ዓኣ ዓሳ ናይዲንቴ ዋዶና ዳውቴ ማዳ ባኮ ፔቴታፃ ዒንሢ ናባቢባኣዓዳ?»

4 ዒዚ ዒማና ጌኤኮ ማኣሪ ጌሊ፣ ቄኤሶይዳፓ ዓታዛ ዒዛንታ ዒዛና ዋላ ዓኣ ዓሰንታ ሙዒኒ ዳንዳዑዋ ያኣሲም ዲማዳ ካሦ ሙዔ።

5 ሃሢ ቄኤሳ ሃውሾ ከሎና ጌኤኮ ማኣሪይዳ ሃውሾ ከሎ ሻቴ ማሢ ማዳቶ ዳቢንቴ ማዒ ፓይዲንቴዋሴ ጌይንቴ ሙሴ ዔርዛ ዋጎይዳ ፃኣፒንቴሢ ዒንሢ ናባቢባኣዓዳ?»

6 ጋዓንቴ ጌኤኮ ማኣሪይዳፓ ባሻይ ሃይካ ዓኣኔ፤ ታ ዒንሢም ጋዓ።

7 ሃሢ ታኣኒ ኮዓሢ ዓሲ ሚጪንቴሢ ማዓንዳኣፓዓቴም ታኣም ሹኪ ዒንጎ ባኣዚቴዋሴ» ጋዓ ማፃኣፖ ቃኣላ ዋዚ ጌይሢታቶዋ ዒንሢ ዔራያታቶ ዳቢንቴባኣ ዓሶ ዑፃ «ዔያታ ዳቤኔ» ጌይ ዋጋዓታንቴከ።

8 ዓይጎር ጌዔቶ ዓሲኮ ናዓሢ ሃውሾ ከሎኮዋ ጎዳከ» ጌዔ።

ኩጮ ዋቦ ዓሢ
(ማር. 3:1-6፤ ሉቃ. 6:6-11)

9 ዩሱሴ ዩኖ ቤዘይዳፓ ዔቂ ዓይሁድ ዓሰኮ ቡከንቶ ቤዘ ጌሌኔ፤

10 ዒኣካ ፔቴ፣ ኩቺ ዋቦ ዓሲ ዓኣኔ፤ ዒማና ዩሱሴ ዋጎና ዓይሢሳኒ ኮዓ ፔቴ ፔቴ ዓሳ፡- «ዓይሁድ ዓሰኮ ሃውሾ ከሎና ሃርጊንቴ ዓሶ ፓሢኒ ዓይሢንቴያዳ?» ጌዒ ያኣጩኔ።

11 ዩሱሴያ ማሃያ፡- «ዒንሢ ባኣካፓ ፔቴ ማራይ ዓኣ ዓሲ ማራዓሢ ሃውሾ ከሎና ዔቴይዳ ሎኣሚቶ ጎቺ ከሱዋዳ?»

12 ዓካሪ ያዲ ማዔቶ ዓሲ ማራይዳፓ ዋይቴ ባሹዋይ? ዩያር ሃውሾ ከሎና ኮሺ ማዶ ማዲሢ ዓይሢንቴያከ» ጌዔ።

12:1 ላሚ. ዋማ 23:25። 12:3 1ሳሙ. 21:1-6። 12:4 ሉዊ. ዓከ 24:9።
12:5 ፓይ. ማፃ 28:9-10። 12:7 ማቲ. 9:13፤ ሆሴ. 6:6። 12:11 ሉቃ. 14:5።

13 ዩካፓ ዩሱሴ ኩጮ ዋቦ ባሢሞ፡- «ኩጮ ኔኤኮ ፒሼ!» ጌዔም ቢዚ ፒሻዛ ኩጮ ኮሽኪ ባሳ ኩጮጉዲ ማዔኔ።

14 ፔርሴ ዓሳ ጋዓንቴ ዩካፓ ኬሰካዎ ዩሱሴ ዋማይዲ ዔያታ ዋዳንዳቴያ ዋላ ዘርቴኔ።

ፆኦሲ ደኦሪም ማዳ ባሢ

15 ዩማና ዩሱሴ ዔያቶኮ ማሊያ ዔራዎ ቢኢካፓ ዴንዳዛ፣ ማርጌ ዴሬ ባዛ ገንፆ ባኣዳኔ፤ ዩያ ዓሶፓ ሃርገንቴ ዓሶ ቢያ ቢፓሣኔ።

16 ባዛኮ ጾኑም ጾኦማኣ ዔያታ ኬኤዙዋጉዲ ዔያቶ ላኣኔኔ፤

17 ዩይ ያዲ ማዔሢ ፆኦሲ ማሊያ ኬኤዛ ቢሲያሴ ዘሎና፡-

18 «ሃይሾ ታ ደኦሪ፣

ታ ባዛ ናሽካያ ሃሣ ታና ዋዛሳ

ታኣም ማዳሢዳ

ታ ዓያኖ ባዛ ዑፃ ታ ማሃንዳኔ፤

ባዚ ባሲ ዜርሢም ቢያ

ታኣኮ ፒዜ ዋጊያ ዔርዛንዳኔ።

19 ባዚ ማርሚ ባላታዓኔ፤

ጎይፆይዳኣ ዑኡዞ ዋይዚሳዓኔ።

20 ቱቁ ፒሎዋ ባዚ ማንሃዓኔ፤

ዜኤር ታዋዋ ዋዳዓኔ።

ጎኑም ባሻንዳያ ሄላንዳኣና

ዩያ ባዚ ማዳንዳኔ።

21 ባሲ ዜርሢያ

ባዚይዳ ሃጊ ማዓንዳ ዋዛ ጌሣንዳኔ»

ጌይንቴሢ ኩማንዳጉዲኔ።

ዩሱሴና ፑርቶ ዓያኖ ሱኡጋሢና ዘሎ
(ማር. 3:20-30፤ ሉቃ. 11:14-23)

22 ዩካፓ ፑርታ ዓያኖ ዓርቁም ዘጋኒና ጌሰታኒያ ዳንዳዑዋ ፔቴ ባሲ ዓሳ ዩሱሴ ባንሢ ዔኪ ሙኬኔ። ዩሱሴያ ባዛ ፖዒሳዛ ባሢ ዘጋኒና ጌሰታኒያ ዳንዳዔኔ።

23 ባዔማና ዴራ ቢያ ዲቃቴ ሄርሻዎ፡- «ሃይ ዳውቴ ናባሢ ማዓንዳዎ?» ጌዔኔ።

24 ጋዓንቴ ፔርሴ ዓሳ ዩያ ዘጌ ዋደና፡- «ሃይ ባሢ ፑርቶ ዓያኖ ኬሳሢ ፑርቶ ዓያኖ ሱኡጋሢ ቢዔልዛቡሌ ዋልቆና ማዓንዳኣፓዓቴም» ጌዔኔ።

25 ዬሱሴ ዔያቶኮ ማሊያ ዔራዎ፡- «ፔቴ ማዒባኣ ካኣቶ ዓጨ ቢያ ለባኔ፤ ዋላ ፔቴ ማዒባኣ ካታማታቶ ማኣሪ ደዲዋሴ።»

26 ፃላሂ ፃላሂ ኬሳያ ማዔቶ ዋሊፓ ዲማዴኔ ጌይሂኬ፤ ያዲ ማዔቶ ካኣቱማ ዋይቲ ደዳኒ ዳንዳዓይ?

27 ታኣኒ ፑርቶ ዓያኖ ኬሳሂ ዔያቶኮ ሱኡጋሂ ቢዔልዘቡሌና ማዔቶ ዒንሂኮ ናኣታ ዓይጎና ፑርቶ ዓያኖ ኬሳይ? ዬያሮ ዒንሂ ናኣታ ዒንሂዳ ዋጋንዳኔ።

28 ጋዓንቴ ፑርቶ ዓያኖ ታ ኬሳሂ ያኦሲ ዓያኖና ማዔቶ ያኦሲ ካኣቱማ ዒንሂ ኮራ ሙኬኔ ጌይሂኬ» ጌዔኔ።

29 ዬሱሴ ሃሃ፡- «ፔቴ ዓሲ ፔቴ ዋልቄና ዓኣ ዓሲ ቤርታዲ ቱኩዋዎ ዋልቆና ዓኣ ዓሂ ማኣሪ ጌሊ ዓኣ ባኮ ቡራኒ ዋይቲ ዳንዳዓንዳይ? ዋልቆሲ ቱኬሂኮ ጊንፃ ዒዛኮ ዓኣ ባኮ ቡራኒ ዳንዳዓኔ።»

30 «ታ ዓሲ ማዒባኣሂ ቢያ ታና ዒፃኔ፤ ታኣና ዋላ ማዒ ዔኤቢ ቡኩሲባኣ ዓሲ ላኣላያ ማዓንዳኔ።»

31 ዬያሮ ዓሲ ማዳ ዓይጎ ዳቢንቲ ማዔቶዋ፣ ጫሺ ቢያ ዒዛም ዓቶም ጌይንታንዳኔ፤ ታ ዒንሂም ጋዓኔ። ዓያና ጌኤሺ ጫሽካ ዓሲም ጋዓንቴ ዳቢንታ ዓቶም ጌይንታዓኬ።

32 ዓሲ ናዓሂ ጫሽካሂም ቢያ ዳቢንታ ዓቶም ጌይንታንዳኔ፤ ዓያና ጌኤሺ ጫሽካሂም ቢያ ጋዓንቴ ሃያ ዓጮይዳ ማዔቶዋ ሃጋኣ ዓጮይዳ ዳቢንታ ዓቶም ጌይንቲንዳዋሴ» ጌዔኔ።

ቃራ ሚሂኮ ዓኣፓፓ ዔርቲያ
(ሉቃ. 6:43-45)

33 ዬሱሴ ሃሃ፡- «ሚሂ ቢያ ዓኣፓፓ ዔርታሂሮ ዒንሂኮ ኮሺ ሚሂ ዓኣቶ ኮሺ ዓኣፒ ዒንሂ ዳንቃንዳኔ፤ ፑርታ ሚሂ ዒንሂኮ ዓኣቶ ጋዓንቴ ፑርታ ዓኣፒ ዒንሂ ዳንቃንዳኔ፤»

34 ዒንሂ ሃይ ሾኦኩ ናኣታ! ዒንሂ ፑርታታዎ ኮሺ ባኣዚ ኬኤዘኒ ዋይቲ ዳንዳዓይ? ዓይጎሮ ጌዔቶ ዓሲ ኬኤዘ ባካ ዓሂኮ ዒኖይዳፓ ኩሚ ኬሰኬሂኬ።

35 «ኮሺ ዓሲ ዒና ዓኣ ኮሹዋይዳፓ ኮሺ ባኣዚ ጌሰታኔ፤ ፑርታ ዓሲ ፔኤኮ ዒና ዓኣ ፑርቱዋይዳፓ ፑርታ ባኣዚ ጌሰታኔ።»

36 ጋዓንቴ ታ ዒንሂም ጋዓኔ፤ ዓሳ ኮይሱዋ ባኮ ጌሰቲሂ ዛሎ ቢያ ዓጮይዳ ያኦሲ ዋጋ ኬሎና ያኦጨንታንዳኔ።

12:30 ማር. 9:40። 12:32 ሉቃ. 12:10። 12:33 ማቴ. 7:20፤ ሉቃ. 6:44።
12:34 ማቴ. 3:7፤ 23:33፤ 15:18፤ ሉቃ. 3:7፤ 6:45።

37 ዩይ ያዲ ማዓዛ ኔ ኮሺ ጌሰቴቴ ኮሺ ባአዚ ኔኤም ዋጊንታንዳኔ፤ ኔኤኒ ፑርታ ጌሰቴቴ ፑርታ ኔጊዳ ዋጊንታንዳኔ» ጌዔኔ።

ጾኦሲ ዋልቁና ማዲንታ ዓኪ ባአዚ ዛጋኒ ጾኦጪንቴ ጾኦጪሢ
(ማር. 8:11-12፤ ሉቃ. 11:29-32)

38 ዒማና ሙሴ ዔርዘኔ ዋጎ ዔርዘ ዓሶና ፔርሴ ዓሶና ዩሱሴ ኮራ፡- «ዔርዘሢዮ፤ ኔኤኒ ጾኦሲ ዋልቁና ማዲንታ ዓኪ ባአዚ ማዲንቴ ኑ ዛጋኒ ኮዓኔ!» ጌዔኔ።

39 ዒዚ ጋዓንቴ ዔያቶም፡- «ፑርታ ሃህ ጉሙርቁንቴዋ ሃያ ዋዶ ዓሳ ጾኦሲ ዋልቁና ማዲንታ ዓኪ ባአዚ ዛጋኒ ኮዓኔ፤ ጋዓንቴ ጾኦሲ ማሊያ ኬኤዛሢ፡ ዮናኦሴይዳ ማዲንቴ ዓኮ ባካፓ ዓታዛ ማሌ ጾኦሲ ዋልቁና ማዲንታ ዓኪ ባአዚ ዔያቶም ማዲንታዓኬ።

40 ዮናኦሴ ጴኤፖ ሞላሢ ጎጳ ሃይህ ኬሊ ዋንቴና ርኦሪና ዴዔሢጉዲ ዓሲኮ ናዓሢ ዲኡፒዳ ሃይህ ኬሊ ርኦሪና ዋንቴና ዴዓንዳኔ።

41 ኔኔዌ ካታሞ ዓሳ ዓጮይዳ ጾኦሲ ዋጋ ኬሎና ሃያ ዋዶ ዓሳይዳ ዋጋያ ማዓንዳኔ፤ ዓይጎር ጌዔቶ ኔኔዌ ዓሳ ዮናኦሴ ኬኤዘሢ ዋይዜ ዋዶና ጳሲንቶ ዔሪ፡ ጎሞዋ ቡኡጭሢ። ያዲ ማዔቶዋ ሃሢ ዮናኦሴይዳፓ ባሽ ሃይካ ዓአኔ።

42 ዓጮይዳ ጾኦሲ ዋጋ ኬሎና ሳአባ ዓጮ ካአቴላ ሃያ ዓሶ ዑፃ ዋጋንዳኔ፤ ዓይጎር ጌዔቶ ዓዛ ካአቴ ሴሎሞኔኮ ዔራቶ ዋይዚ ዓጪ ዙልካፓ ሙኬያታሢ። ያዲ ማዔቶዋ ሴሎሞኔይዳፓ ባሽ ሃይካ ዓአኔ» ጌዔኔ።

ፑርታ ዓያናኮ ጊንሣ ማዒ ዓሲዳ ጌሊያ
(ሉቃ. 11:24-26)

43 ዩሱሴ ሃህ፡- «ፑርታ ዓያና ዓሲዳፓ ኬሰኬ ዋዶና ጌላንዳ ቤሲ ኮይ ኮይ ዋአሢባአ፤ ዓሲ ናንጉዋ ዳውሎይዳ ሃንታኔ። ጋዓንቴ ጌሎንዶ ቤሲ ዴንቁዋሴ፤

44 ዩያር ታ ኬሰኬ ማአሮ ማዒ ዓአዳንዳኔ። ጋዓኔ። ማዒ ዒ ሙካ ዋዶና ኬኤፃ ጉሪ ማዒ፡ ጌኤሽኪ፡ ጊኢጊ ዓአንቴ ዴንቃኔ።

45 ዩካፓ ፑርቶ ዓያናሢ ዓአዲ ዒዛይዳፓ ባሽ ፑርታ ማሌ ላንካይ ፑርታ ዓያና ቡኩሲ ዔኪ ሙኪ ዒዚ ቤርታ ዓአ ዓሢዳ ጌሊ ዋላ ናንጋኔ፤ ዩያር ዩያ ዓሢኮ ጋፒንፃ ናንጋ ቤርታአሰካፓ ባሽ ፑርታ

12:38 ማቴ. 16:1፤ ማር. 8:11፤ ሉቃ. 11:16። 12:39 ማቴ. 16:4፤ ማር. 8:12።
12:40 ዮና. 1:17። 12:41 ዮና. 3:5። 12:42 1ካአቶ. ማ 10:1-10፤ 2ጾኦሲ.
ዓሃኬ 9:1-12።

ማዓኔ። ሃያ ዎዶ ፑርቶ ዓሶ ዑፃ ማዓንዳ ባካ ዬያ ማላ ባአዚኬ»
ጌዔኔ።

ዩሱሴኮ ዒንድና ጌርሲንሢና
(ማር. 3:31-35፤ ሉቃ. 8:19-21)

46 ዩሱሴ ዳርሞ ኬኤዛ ጎይሣ ዓአንቴ ዒዛኮ ዒንድና ጌርሲንሢና
ዒዛና ጌሰታኒ ኮዒ ካራ ሙኪ ዔቄኔ፤

47 ዒማና ዒኢካ ዓአ ዓሶይዳፓ ፔቴሰኬይ ዩሱሴ ኮርይዳ፡-
«ሃይሾ ኔኤኮ ዒንድና ጌርሲንሢና ኔና ኮዒ ካራ ዔቄ ዓአኔ» ጌዔኔ።
*

48 ዩሱሴ ጋዓንቴ፡- «ዒንዳ ታአኮ ያናዳይ? ጌርሲንሢያ
ያናንሢዳይ?» ጌዒ ማሄኔ።

49 ዬያ ጌዔሰካፓ ኩጮና ዒዛኮ ጊንፆ ሃንታ ናአቶ ባንሢ ዳዊ
ዳዊ፡- «ታአኮ ዒንድና ጌርሲንሢና ሃይሾ ሃአቶኬ፤

50 ጫሪንጮይዳ ዓአ፡ ታዓዳሢ ዓይሢፆ ኩንሣዘንሢ ሲያ ታአኮ
ጌርሲንታ ጌርንታ ዒንድንታ ዬያቶኬ» ጌዔኔ።

13

ዜርፆ ዜርቃሢ ኮኣኪንሦ
(ማር. 4:1-9፤ ሉቃ. 8:4-8)

1 ዬኖ ኬሎ ዩሱሴ ጋራፓ ኬሰኪ ባዘ ዓጫ ዳዔኔ፤
2 ሚርጌ ዳሬያ ዒዛ ኮይላ ሙኪ ቡኬሢሮ ዋአፆና ፒንቆ
ጎንጎይዳ ኬሰኪ ዳዔኔ፤ ዳራ ጋዓንቴ ሲያ ባዘ ዓጫ ዔቄኔ።

3 ዬካ ዒ ሚርጌ ባአዚ ኮኣኪንሢና ኬኤዛ፡- «ፔቴ ዓሲ ጎሺዳ
ዜርሢ ዜርቃኒ ኬሰኬኔ፤

4 ዒዚ ዜርቃንቴ ፔቴ ፔቴ ዜርፆ ጎይፆ ዓጫ ኬዳዛ ካፓ ሙኪ
ሙዔኔ።

5 ዓቴ ዜርፆ ሚርጌ ዓጪባአ፡ ሃአሻ ቤሲዳ ኬዳኔ፤ ዬኖ ቤዛ
ሚርጌ ዓጪ ባአሢሮ ዜርፆ ዑኬና ባቃሌኔ።

6 ማዔቶዋ ሳዓ ዓባዛ ሹሌኔ፤ ፆጺ ሚርጌ ዳኪባአሢሮዋ ማሌኔ።
7 ዓቴ ዜርፆ ሃሣ ዓንገሢ ችሻ ባአካ ኬዳኔ፤ ዓንገፆ ችሻ ዑጋፆ
ባቃሎ ባይዜኔ።

8 ሃሣ ዓቴ ዜርፆ ኮሺ ቤሰካ ኬዲ ባቃሌ ዎዶና ሚርጌ ካፆኔ፤
ፔቴዛ ፆኤታ ባጌላ ላሂታሚ ዓቴዛ ሃይሢታሚ ዓአፒ ዓአፔኔ።

9 ዬያ ዎይዛ ዎይዚ ዓአሢ ዎይዘንጎ!» ጌዔኔ።

* 12:47 ፔቴ ፔቴ ሚናላ ማፃአፖኮ ፓይ. 47 ባአሲ። 13:2 ሉቃ. 5:1-3።

ዩሱስ ኮኦኪንሦና ኬኤዚሴ ባኮ
(ማር. 4:10-12፤ ሉቃ. 8:9-10)

10 ዩካፓ ዒዛኮ ጊንፆ ሃንታዞንሢ ዩሱስ ኮራ ሙካዖ፡- «ዒይጎሮ ዴሮም ኔ ኮኦኪንሢና ኬኤዛይ?» ጌዔኔ።

11 ዒዚ ዔዔቶም፡- «ዒንሢም ጫሪንጮ ካኦቱም ዛሎ ዓኣሺንቴ ባኮ ዛላ ዔራኒ ዔራቶ ፆኦሲዳፓ ዒንጊንቴኔ፤ ዔዔቶም ጋዓንቴ ዒንጊንቴባኣሴ።

12 ዔኤቢ ዓኣሢም ቃሲ ዒንጊንቴም ሚርጋንዳኔ፤ ዳካ ዓኣሢዳፓ ጋዓንቴ ዒማ ዳኮ ዓኣማታዖ ዔኪንታንዳኔ።

13 ዛፓዖ ዴንቁዎ፣ ዎይዛዖ ዒና ዔኩዎ፣ ሃሣ ጳቂሱዎ፣ ማዔሢር ዔዔቶም ታ ኮኦኪንሢና ኬኤዛኔ።

14 ዩይፎ ፆኦሲ ማሊፆ ኬኤዛ ዒሲያሴ ዛሎና፡-
ጥይዚ ዒንሢ ጥይዛኔ፡

ጋዓንቴ ዒንሢ ጳቂሡዎሴ፤

ዛጊያ ዒንሢ ዛጋኔ፡

ጋዓንቴ ዒንሢ ዒና ዔኩዎሴ።

15 ዒይጎሮ ጌዔቶ ሃይ ዴራ
ዒና ፔኤሲ ዳጨሴኔ፤
ዎዮዎ ዔዔታ ዓርቄኔ፤
ዓኣፖዎ ዲኡሜኔ።

ያዲ ማዒባኣያታቴ
ዓኣፖና ዔዔታ ዛጊ
ዎዮና ዎይዚ
ዒናና ማሊ

ታ ባንሢ ዔዔታ ማዔም

ሄኤዶ ታ ዔዔቶ ዳቂሼያ ናንዳንቴኬ »

ጌይንቴ ኬኤዚንቴሢ ዔዔቶይዳ ኩማንዳኔ።

16 ዩሱስ ሃሣ፡- «ዒንሢ ጋዓንቴ ዓኣፓ ዒንሢኮ ዛጋሢር፣ ዎያኣ ዒንሢኮ ዎይዛሢር ዒንሢ ባሊቲና ዓኣያኬ።

17 ጎኔ ታ ዒንሢም ጋዔኔ፤ ሚርጌ ፆኦሲ ማሊፆ ኬኤዛዞንሢና ዒሎንሢና ዒንሢ ሃሢ ዛጋሢ ዛጋኒ ኮዔዔታዖ ዛጊባኣሴ። ዒንሢ ዎይዛሢ ዔዔታ ዎይዛኒ ኮዔዔታዖ ዎይዛኒ ዳንዳዒባኣሴ» ጌዔኔ።

ዜርፆ ኮኦኪንሦኮ ቡሊፆ ዩሱስ ኬኤዜሢ
(ማር. 4:13-20፤ ሉቃ. 8:11-15)

13:12 ማቴ. 25:29፤ ማር. 4:25፤ ሉቃ. 8:18፤ 19:26። 13:15 ዒሲ. 6:9-10።
13:17 ሉቃ. 10:23-24።

18 ዩካፓ ዩሱሴ፡- «ዓካሪ፥ ዲንሢ ዜርዖኮ ኮኦኪንሃ ቡሊያ ዋይዙዋቲ፤

19 ጎይያ ዓጫ ኬዴ ዜርፃ ደዋሢ፡- ያኦሲ ካኣቲሞ ቃኣሎ ዋይዚ ዲና ዔኩዋ ዓሶኬ፤ ቤዘና ፃላሄ ሙኪ ዲና ዜርቂንታ ቃኣሎ ዔካኔ።

20 ሃኣቾ ሳያይዳ ዜርቂንቲ ዜርፃላ ደዋሢ፡- ቃኣሎ ዋይዘያ ዋዘና ጉሙርቂ ዔካ ዓሶኬ።

21 ማዔቶዋ ደካ ዋዴሮ ማዓንዳፓዓቲሞ ፃጲ ዔያቶኮ ባኣሴ፤ ዩያሮ ቃኣሎ ዘሎና ሜቶና ዲዲንቲ ዳኪንቲሢ ሄሌ ዋዶና ዑኬና ዔያታ ደቢንታኔ።

22 ዓንጊያ ቶሾ ባኣካ ዜርቂንቲዘ ደዋሢ፡- ቃኣሎ ደካ ዋዴሮ ዋይዘ ዓሶኬ፤ ያዲ ማዔቶዋ ሃያ ዓጮ ዘሎ ማሊ ሜታዲሢና ቆሎ ናሹሞና ዲና ጌሊ ቃኣሎ ዋሊሳሢር ዓኣቸሞ ዓታኔ።

23 ኮዥ ሳያይዳ ዜርቂንቲዘ ደዋሢ፡- ቃኣሎ ዋይዚ ዲና ዔካ ዓሶኬ፤ ዩያታ ዓኣፒ ዓኣፓኔ፤ ፔቲዘ ፃኤታ፥ ባጌላ ላሂታሚ ዓቲዘ ሃይሢታሚ ዓኣፓኔ» ጌዔኔ።

ዓዣሢ ኮኦኪንሃ

24 ዩያጉዲ ሃሣ ዩሱሴ ሜሌ ኮኦኪንሢ፡- «ጫሪንጮ ካኣቲማ ጎሺዳ ጌኤሺ ዜርሢ ዜርቂ ዓሲ ማላኔ፤

25 ዓሳ ቢያ ላሄ ዋዶና ሞርኬ ሙካዖ ባርቾ ባኣካ ዓዣ ዜርቂ ዓኣዴ።

26 ባርቾ ባቃሊ ፑርቃዘ ዓዣሢ ባኣካ ጰዴ።

27 ዩያሮ ጎዣ ዓዶኮ ማዳ ዓሳ ዲዘ ኮይላ ሙካዖ ሳዳሢዮ! ኔ ጎዣይዳ ጌኤሺ ዜርሢ ኔ ዜርቂባኣዓዳ? ሂዳዖ ዓዣሢ ዓንካፓ ኬሰኬይ? ጌዔኔ።

28 ዲዚ ማሃዖ ላሃ ማዴሢ ሞርካሢዋይ! ዔያቶሞ ጋዓዘ፥ ማዳ ዓሳ ላሄዴቲ ዴንዲ ኑ ዓዣሢ ሃርማንዳጉዲ ኔ ኮዓ? ጌዔኔ።

29 ዲዚ ጋዓንቲ ላይዔ! ዓይጎሮ ጌዔቶ ዓዣሢ ዲንሢ ሃርማ ዋዶና ባርቾ ዋላ ቲጎንዳ።

30 ዩያሮ ሃሹዋቲ፤ ባርቾ ማንዲንታ ዋዶ ሄላንዳኣና ባርቾንታ ዓዣሢንታ ዋላ ዑጎንጎ፤ ማንዲንታ ዋዶና ጋዓንቲ ማንፃ ዓሶሞ ዓዣሢ ቤርታዲ ቱጊ ታሚና ሚቺንታንዳጉዲ ናኣራ ናኣራ ቱኩዋቲ፤ ባርቾ ጋዓንቲ ማንዲ ታኣኮ ኮኖይዳ ዋሁዋቲ ሂዚ ታ ጋዓንዳ።» ጌዲ ዔያቶሞ ኬኤዜኔ።

ሴናፒጩ ጌይንታ ዳኮ ዜርፃሎ ኮኦኪንሃ
(ማር. 4:30-32፤ ሉቃ. 13:18-19)

31 ዩሱሴ ሃሣ ሜሌ ኮኦኪንሢ፡- «ጨሪንጮ ካኦቱማ ፔቴ ዓሲ ጎሺዳ ዜርቁ፥ ሴናፒጮ ጌይንታ ዳኮ ዜርዪሎ ማላኔ፤

32 ዒዛ ዜርሢዳፓ ቢያ ዳካኬ፤ ባቃሊ ዑጌ ዎዶና ጋዓንቴ ቱኮና ሚያይዳፓ ቢያ ባሼ፥ ዴኤፒ ሚሢ ማዓኔ፤ ሃሣ ካፓኦ ዒዞኮ ካኦፖይዳ ማኦሪ ማዢ ዴዓኔ» ጌይ ኬኤዜኔ።

ሙኑቆ ፃኦዞ ኮኦኪንሢ
(ሉቃ. 13:20-21)

33 ሃሣ ዔያቶም ዩሱሴ፡- «ጨሪንጮ ካኦቱማ ፔቴ ላኦሊ ሃይሣ ሻምባ ዲርኮና ዲኢሊዳ ዋሃ ሙኑቃ ፃኦዞ ማላኔ፤ ዩና ሙኑቆ ፃኦዞ ሙኑቆ ቢያሢ ዔቁሳኔ» ጌዒ ኬኤዜኔ።

ኮኦኪንሢና ዩሱሴ ኬኤዚሴ ባኮ
(ማር. 4:33-34)

34 ዩሱሴ ዩያ ባኮ ቢያ ኮኦኪንሢና ዴርም ኬኤዜኔ፤ ኮኦኪንሢ ባኦያ ዓይጎ ባኦዚያ ዔያቶም ኬኤዚባኦሴ።

35 ዩይ ያዲ ማዔሢ፡-
«ሃይሶ ታኦኮ ታ ኮኦኪንሢና ኬኤዛንዳኔ፤
ዓጫ ማዢንቴሢዳፓ ዓርቃየ
ዓኦሻንቴ ባኦዚ ታ ኬኤዛንዳኔ»
ጌይንቴ ያኦሲ ማሊያ ኬኤዛሢ ዛሎና ፃኦፒንቴሢ
ኩማንዳጉዲኬ።

ዩሱሴ ዓዣሢ ኮኦኪንሢ ቡሊሢ

36 ዩካፓ ዩሱሴ ዴር ሃሺ ኬኤያ ጌሌኔ፤ ዒዛኮ ጊንያ ሃንታዞንሢ ዒዛ ኮራ ሙኪ፡- «ጎኩኮ ዓዣሢ ኮኦኪንሢ ቡሊያ ኑም ኬኤዜ» ጌዔኔ።

37 ዩሱሴ ማሃያ፡- «ጌኤዢ ዜርያ ዜርቁሢ ዓሲ ናዓሢኬ፤
38 ጎዣ ሃያ ዓጮኬ፤ ጌኤዢ ዜርያ ያኦሲ ናኦቶኬ፤ ዓዣሢ ጋዓንቴ ፃላሄ ናኦቶኬ፤

39 ዓዣሢ ዜርቁሢ ሞርካሢ ፃላሄኬ፤ ባርቾ ማንዒፃ ዓጮኮ ጋፒንያኬ፤ ማንፃ ዓሳ ያኦሲ ኪኢታንቾኬ።

40 ዓዣሢ ቱጊ ቡኩሲ ታሞይዳ ሚቾሢጉዲ ዓጮኮ ጋፒንያና ያዲ ማዓንዳኔ።

41 ዓጮኮ ጋፒንያ ዎዶና ዓሲኮ ናዓሢ ፔ ኪኢታንቾ ዳካንዳኔ፤ ዔያታኦ ዓሶ ዳቢሻዞንሢና ፑርቶ ማዳዞንሢ ቢያ ዒዛ ካኦቱሞይዳፓ ቡኩሲ ኬሳንዳኔ።

42 ዩካፓ ደኤፖ ታዋይዳ ዓጋንዳኔ፤ ዒኢካ ዩኤፒና ዓቺ ደይሢና ዒያቶም ማዓንዳኔ።

43 ዪሎንሢ ጋዓንቴ ፔ ዓዳሢ ካኣቱዋይዳ ዓቢጉዲ ፖዓንዳኔ፤ ዋይዛ ዋይዚ ዓኣሢ ዋይዘንጎ!» ጌዔኔ።

ዓኣሺንቴ ቆሎ ኮኦኪንሢ

44 ሄሊሳዖ ዩሱሴ፡- «ጫሪንጮ ካኣቱማ ጎሺ ሳዛይዳ ዓኣቾና ባኣዚ ማለኔ፤ ፔቲ ዓሲ ዩኖ ባኤሎ ዳንቃዖ ማሂ ጊንሢ ዓኣቼኔ፤ ሚርጌ ዋዛዳሢሮ ዳንዲ ዓኣ ባኮ ቢያ ሻንቺ ዩኖ ጎዡሎ ሻንቄ» ጌዔኔ።

ሚዛጰ ሹጮኮ ኮኦኪንሢ

45 ላሚ ሃሣ ዩሱሴ፡- «ጫሪንጮ ካኣቱማ ኮሺ ሚዛጰ፡ ሹጮ ሻንቃኒ ኮዓ ኮርሞ ዓሢ ማለኔ፤

46 ዩይ ኮርማ ዓሢ ሚርጌ ቦንቺንታ ኮሺ ሚዛጰ ሹቺ ዳንቄ ዋዶና ዳንዲ ዓኣ ባኮ ቢያ ሻንቺ ዩኖ ሹጮሎ ሻንቄ» ጌዔኔ።

ዋላሢ ዓርቆ ሮኦጮ ማላ ሱዞ ኮኦኪንሢ

47 ሃሣ ዩሱሴ፡- «ጫሪንጮ ካኣቱማ ባዛይዳ ዓገንቴ ዋላሢ ዓርቆ ሮኦጮ ማላ ሱዞ ማለኔ፤ ዩና ዲማ ዲማ ዋላሢ ቢያ ዓርቆያኬ።

48 ዋላሢ ጌሊ ዓርቁንቴ ኩሜ ዋዶና ዋላሢ ዓርቃ ዓሳ ዩኖ ሱዜሎ ባዛፓ ጎቺ ዓጮ ኬሲጋፓ ዳዒ ኮዡ ኮዡ ቁሪ ዔካዖ፡ ፑርቶ ጋዓንቴ ዒኢካ ኬኤሪ ሃሻኔ።

49 ዓጮኮ ጋፒንዖ ዋጎ ኬሎና ያዲ ማዓንዳኔ፤ ዖኦሲኮ ኪኢታንቻ ሙኪ ጎሞ ዓሶ ጌኦኮይዳፓ ቁሪ።

50 ባይቁዋ ታዋይዳ ዓጋንዳኔ፤ ዒኢካ ዩኤፒና ዓቺ ደይሢና ማዓንዳኔ» ጌዔኔ።

51 ላሚ ሃሣ ዩሱሴ፡- «ዩይ ኮኦኪንሢ ቢያ ዒንሢም ዔርቲያ?» ጋዓዛ፤ ዔያታኣ «ሂዮ» ጌዔኔ።

52 ዒዚያ፡- «ጫሪንጮ ካኣቱሞኮ ዓኣሺንቴ ባኮ ኮሺ ዔራ ዓሲ ያኣፒ ዓርቆና ዓኮና ጨሞ ባኮናፓ ዔሪ ዔሪ ኬሳ፡ ሙሴ ዋጎ ዔርዛ ዓሲጉዲኬ» ጌዔኔ።

**ዩሱሴ ናዚሬቴይዳ ዒዒንቴሢ
(ማር. 6፡1-6፤ ሉቃ. 4፡16-30)**

53 ዩሱሴ ዩንሢ ኮኦኪንሢንሢ ኬኤዚ ኩርሴሰካፓ ዩኖ ቤዛፓ ዳንዳኔ።

54 ፔ ዓጮ ናዚሬቴ ካታሞዋ ሙኪ፣ ዒኢካ ዓይሁዶ ዓሶኮ ቡኪንቶ ቤዛ ዔርዛንቴ ዒዛሲ ዋይዛ ዓሳ ቢያ ዲቃቲ ሄርሻዮ፡- «ሃይ ዓሢ ሃያጉዴ ዔራቶና ያኦሲ ዋልቄና ማዲንታ ዓኮ ባኮና ዓንካፓ ዔሬይ?»

55 ሃይ ሚያ ዓርሳ ሃኣማሢ ናኣዚቱዋዓዳ? ዒንዳ ዒዛኮ ማይራሞቱዋዓዳ? ሃሣ ጌርሲንሢያ ዒዛኮ ያይቆኦቤንታ ዮሴፔንታ ሃሣ ሲሞኦኦንታ ዪሁዳንታቱዋዓዳ?

56 ጌርንሢ ዒዛኮ ቢያ ኦኡና ዋላቱዋዓዳ? ዓካሪ ሃይ ዓሢ ሃያ ቢያ ዓንካፓ ዔሬይ?» ጋዓዮ፡

57 ዒዛ ጎናሲ ጉሙርቁዋዮ ሃሺኔ።

ዬሱሴ ጋዓንቴ፡- «ያኦሲ ማለሢ ከኤዛሢ ፔ ዓጮና ፔ ማኣር ዓሶና ባኣካ ቦሂንታኔ፤ ጋዓንቴ ሜሌ ቤሲዳ ቦቦንቲንታኔ» ጌዔኔ።

58 ዔያታ ጉሙርቁ ጎናሲ ዔኪባኣሢር ዬሱሴ ዒኢካ ሚርጌ ያኦሲ ዋልቄና ማዲንታ ዓኪ ባኣዚ ማዲባኣሴ።

14

ማሰካ ዮሃንሴኮ ሃይቦ

(ማር. 6፡14-29፤ ሉቃ. 9፡7-9)

1 ዬኖ ዋዶና ጌለላ ዓጮ ዋይሣ ሄርዲሴ ዬሱሴ ማዳ ባኮ ዛሎ ዋይዚ፡

2 ዒዛኮ ደንዞ ኮራ፡- «ያኣዳ ማዔቶ ማሰካ ዮሃንሴ ሃይባፓ ዔቂ ሙከኔ ጌይሢከ፤ ሃይ ቢያ ማዲንታ ዓኮ ባካ ማዲንታሢ ዬያርኬ» ጌዔኔ።

3 ዬያኮ ቤርታ ሄርዲሴ ዒዛኮ ጌርሲ ፒልጶሴ ማቾ፡ ሄርዲያዳ ዔኬ ዛሎና ዮሃንሴ ዓይሢ ቱኡዞ ማኣራ ቱከኔ።

4 ዮሃንሴ ዒ ቱኪሴሢ፡- «ኔኤኒ ዒዞ ዔካንዳያ ዋጋ ዓይሱዋሴ» ጌዔሢርከ።

5 ዬያር ሄርዲሴ ዮሃንሴ ዋዳኒ ኮዔኔ፤ ጋዓንቴ ዓይሁዶ ዓሳ ዮሃንሴ ያኦሲ ማለሢ ከኤዛያ ማሂ ዛጋሢር ዒ ዒጊጩኔ።

6 ፔቴ ከሊ ሄርዲሴ ፔኤኮ ሾይንቴ ከሎ ቦንቻንቴ ሄርዲያዳ ናኣ ሙዮም ዔኤለንቴ ዓሶ ቤርታ ሙኪ ኮርጋዮ ሄርዲሴ ዋዛሴኔ።

7 ዬያር ሄርዲሴ ናዔሎሞ፡- «ኔ ኮዓ ባኣዚ ታና ያኦጩ፤ ታ ኔኤም ዒንጋንዳኔ» ጌዒ ዒዞም ጫኣቄኔ።

8 ዬካፓ ዒዛ ዒንዳ ዒዞ ዞሬሞ፡- «ማሰካ ዮሃንሴኮ ቶኣኮ ሃሢ ታኣም ጎንጊዳ ዓጊ ዒንጌ» ጌዔኔ።

9 ዬያ ወይዘላ ካኦቲ ኮሺ ያዬኔ፤ ማዕቶዋ ዲ ዓሶ ቤርታ ዲዞም ጫኦቁሂሮ የሃኒሴኮ ቶኦካ ዲዞም ዲንገንታንዳጉዲ ዓይህኔ።

10 ዬያሮ ዓሲ ዳኪ ማሰካ የሃኒሴኮ ቶኦኮ ቱኡዞ ማኦራ ቲቂሲ፤

11 ቲቂንቲ ቶኦኮ ጎንጊዳ ዓገ ዔኪ ሙኪ፤ ናዔሎም ዲንገም ዲዛ ዔኪ ዲንደም ዲንገኔ።

12 ዬካፓ የሃኒሴኮ ጊንያ ሃንታ ናኦታ ሙኪ ዲዛኮ ሌዞ ዔኪ ዲኡካያ ዴንዲ ዬያ ባኮ ዬሱሴም ኬኤዜኔ።

ዬሱሴኮ ደንጎ ሺዮ ዓሶ ሙኡዚያ

(ማር. 6:30-44፤ ሉቃ. 9:10-17፤ ዮሃ. 6:1-14)

13 ዬሱሴ የሃኒሴኮ ሃይሶ ወይዘ ወደና ወኦያና ፒንቆ ጎንጎ ቶጊ፤ ዓሲባኦ ዔዌ ቤሲ ፔኤሮ ሌሊ ዴዓኒ ዓኦዴኔ፤ ዴራ ጋዓንቲ ዬያ ወይዘያ ዔያታ ዓኦ ካታማፓ ኬሰኪ ኬሰኪ ቶኪና ዲዛ ጊንያ ዲ ዓኦ ቤዞ ዓኦዴኔ።

14 ዬሱሴ ወኦያና ፒንቆ ጎንጋፓ ኬዴ ወደና ሚርጌ ዴሬ ዛጋያ ዔያቶ ሚጨንቲኔ፤ ዔያቶ ባኦካፓ ሃርጌ ዓሶዋ ፖሲሴኔ።

15 ሳዓ ዓማዛ ዲዛኮ ጊንያ ሃንታ ናኦታ ዲዛ ኮይላ ሙካያ፡- «ሃይ ቤዞ ዓሲ ናንጉዋ ዳውሎኬ፤ ሳዓ ሃሂ ዓሚሂሮ ዴራ ሃያ ኮይሎይዳ ዓኦ ጉርዶ ዴንዲ ፔኤኮ ሙዖንዶ ባኦዚ ሻንቃንዳጉዲ ዔያቶ ዳኬ» ጌዔኔ።

16 ዬሱሴ ጋዓንቲ፡- «ዲንሂ ዔያታ ሙዓንዳ ባኦዚ ዲንጉዋቲ፤ ዔያታ ዴንደፓ» ጌዔኔ።

17 ዬሱሴኮ ጊንያ ሃንታ ናኦታ፡- «ኦኡኮ ሃሂ ሃካ ዓኦዞንሂ ደንጎ ካህና ላምዖ ሞሎና ሌሊኬ» ጌዔኔ።

18 ዬሱሴያ፡- «ሂንዳ ዓኦዞንሂ ታኦም ዔኪ ዬዑዋቲ» ጋዓያ፤

19 ዴራ ቡጫ ዴዓንዳጉዲ ዓይህኔ፤ ዬካፓ ደንጎ ካህንሂና ላምዖ ሞሎንሂና ዔኪ ሌካ ጫሪንጫ ባንሂ ዛጊ ያኦሲ ሺኢቃያ ካህ ቡንዒ ዲዛኮ ጊንያ ሃንታዞንሂም ዲንጋዛ ዔያታኦ ዴሮም ዲንገኔ።

20 ዬካፓ ቢያሂ ሙዲ ሚሽኬኔ፤ ዓቲ ደምሶ ዲዛኮ ጊንያ ሃንታዞንሂ ታጳ ላምዖ ዴኤፒ ሌማቲ ኩሙሂ ዔኬኔ።

21 ዬያ ካህ ሙዔ ዓሳ ላኦሎና ናኦቶና ፓይዲንቲባኦንቲ ዓቲንቃ ሌሊ ደንጎ ሺዮ ዓሲ ማዓያኬ።

ዬሱሴኮ ባዞ ዑፃ ሃንቲያ

(ማር. 6:45-52፤ ዮሃ. 6:15-21)

22 ዬካፓ ዬሱሴ ጊንያ ሃንታዞንሂም፡- «ታኦኒ ዓሶ ሳራሂ ዳካንዳኦና ወኦያና ፒንቆ ጎንጎ ቶጊ፤ ቤርታ ባዞ ሱኮ ፒንቁዋቲ» ጌዲ ዓይህኔ።

23 ዳር ዲ ዳክሢኮ ጊንፃ ፔኤር ሺኢቃኒ ዲኮ ከሰካዎ ሳዓ ዓማንቴያ ዲ ዲኢካ ዓኣኔ።

24 ዩማና ናኣታ ዓኣ ዋኣዎና ፒንቆ ጎንጌላ ሳዓፓ ባዞ ሳዞ ጌሊ ዓኣንቴ ዴኤፒ ዋኣሢ ጉዳ ቤርቶ ዛሎና ዠብርሻሢሮ ጎንጌላ ሴካ ሃንጋ ጌዲ ሚርጌ ዓጊፃኔ።

25 ዲሞኮ ባራሪ ኮይዳ ቁኢቃ ዎዴ ማዓኣና ዩሱሴ ባዞ ዑፃ ቶኪና ሃንቲ ሙኬኔ።

26 ዲዛኮ ጊንፃ ሃንታ ናኣታ ባዞ ዑፃ ዲ ሃንቲ ሙካሢ ዛጊ ሚርጌና ዲቃቲ ዲጊጫዎ፡- «ሃይ ዔኤዠኬ!» ጌዲ ዲላቴኔ።

27 ዩሱሴ ዲማና፡- «ዲንሢ ዎይታይ ዲጊጪፖቴ፤ ታናኬ!» ጌዔኔ።

28 ጳዲርሴ ጋዓንቴ፡- «ጎዳሢዮ! ኔናታቶ ዋኣዎ ዑፃ ሃንቲ ኔ ባንሢ ታ ሙኮም» ጌዔኔ።

29 ዲዚያ፡- «ሃኒ ሙኬ!» ጌዔኔ። ዩካፓ ጳዲርሴ ዋኣዎና ፒንቆ ጎንጎይዳፓ ከዲ ዋኣዎ ዑፃ ዩሱሴ ባንሢ ዓኣዲሢ ዓርቄኔ።

30 ጋዓንቴ ዴኤፖ ዠብር ዲ ዛጌ ዎዶና ዲጊጩኔ፤ ዩካፓ ዋኣዎይዳ ዔኤዲንቲሢ ዓርቃዎ፡- «ጎዳሢዮ፡ ታና ዓውሴ!» ጌይ ዲላቴኔ።

31 ዩሱሴ ዩማና ኩጮና ዲዛ ዓርቃዎ፡- «ኔኤኒ ጉሙርቁፃ ፓጩሢ ሃይ፡ ዓይጋ ኔ ሂርጌይ?» ጌዔኔ።

32 ዩካፓ ዩሱሴና ጳዲርሴና ጎንጎ ጋር ጌሌ ዎዶና ዠብራ ዠብርሺፃ ሃሺኔ።

33 ዲማና ዋኣዎና ፒንቆ ጎንጎ ጋራ ዓኣዞንሢ ሲያ፡- «ጎኔ ኔ ያኦሲ ይይኬ!» ጌይ ዩሱሴም ዚጌኔ።

ዩሱሴ ጌንሴሬዔይዳ ሃርጊንቴ ዓሶ ፓሢሢ
(ማር. 6:53-56)

34 ዩሱሴና ዲዛኮ ጊንፃ ሃንታዞንሢና ባዞ ፒንቁ ጌንሴሬዔ ዓጮ ሄሌኔ።

35 ዩኖ ዓጮይዳ ዓኣ ዓሳ ዲ ዩሱሴ ማዔሢ ዔሬ ዎዶና ኮይላ ዓኣ ዓጮ ዓሲ ዳኪ ሃርጊንቴ ዓሶ ዲዛ ባንሢ ዔኪ ሙኡሴኔ።

36 ሃርጊንቴ ዓሳ ዲዛኮ ዓፒሎ ዓጮ ዔያቶ ዓርቁሳንዳጉዲ ዲዛ ሺኢቃዎ፡ ካኣሚዞንሢ ሲያ ዔያቶኮ ዓኣ ዶርዓሰካፓ ፖዔኔ።

15

ዓይሁዶ ዓሶኮ ዓዶንሢ ዎጎ
(ማር. 7:1-13)

1 ዩካፓ ዩሩሳሌሜይዳፓ ሙኩ ፔርሴ ዓሶና ሙሴ ዔርዜ ዋጎ ዔርዘዘንሢና ዩሱሴ ኩራ ሙካዎ፡-

2 «ኔኤኮ ጊንዖ ሃንታዘንሢ ኑ ዓደንሢ ዋጎ ዓይጎር ካፑዋይ? ሃሃ ዔይታ ሙዎ ሙዓሢያ ኩጮ ማሰቱዋዎኬ» ጌሩ ያኦጩኔ።

3 ዩሱሴ ዔይቶም ማሃዎ፡- «ሲንሢ ሲንሢኮ ዋጎ ካፓኒ፥ ያኦሲ ዓይሢዎ ዓይጎር ሲንሢ ሃሻይ?

4 ዩይ ዓይሢዎ ያኦሲ ኔኤኮ ዓደና ሲንደና ቦንቹ፤ ዓይ ሃሃ ሲንደ ጫሽካሢ ሲያ ሃይሲና ዋጊንታንዳኔ» ጋዓሢኬ።

5 ሲንሢ ጋዓንቱ ፔቱ ዓሲ ዓደታቱያ ዓንደ ታጊዳፓ ሲንሢ ዴንቃንዳ ማኣዳሢ ታኣኒ ያኦሲም ሲንጎ ባኣዚ ማሃ ሲንጌኔ» ጌዔቶ።

6 ዩይ ዓሢ ዓደታቶም ሲንደ ቦንቻኒ ዓዛ ኮይሱዋሴ ሲንሢ ጋዓኔ፤ ዩያር ሲንሢኮ ዳምቦ ደዲሻኒ ጌሩ ያኦሲ ቃኣሎ ሲንሢ ሃሻኔ፤

7 ሃይ ሲንሢ፡ ዲሎቱዋታዎ ፔና «ዲሎኬ» ጋዓ ዓሳ! ዓሲያሴ ሲንሢ ዘሎ፡-

8 ሃይ ዴራ ዳንጎና ታና ቦንቻኔ፥
 ዒና ጋዓንቱ ታጊዳፓ ሃኬያኬ፤

9 ዓሲ ኬሴ ዋጊና ዳምቤና
 ያኦሲ ዋጌ ማሃ ዔርዚ ዔርዚ
 ጉሪ ታና ዔይታ ካኣሽካያ ማላኔ »

ጌሩ ኬኤዜሢ ፒዜኬ።

ዓሲ ጌኤሽቱዋያ ማሃ ባኣዚ
(ማር. 7:14-23)

10 ዩካፓ ዩሱሴ ዴር ፔ ባንሢ ዔኤላዎ፡- «ሲና ዔኪ ዋይዙዋቱ፤

11 ዓሲ ጌኤሽቱዋያ ማሃሢ ዓሲዳፓ ኬሰካ ባኣዚ ማሃንዳፓዓቱም ዙልካፓ ዳንጋና ጌላ ባኣዚቱዋሴ» ጌዔኔ።

12 ዩካፓ ዓዛኮ ጊንዖ ሃንታ ናኣታ ዓዛ ባንሢ ሙካዎ፡- «ፔርሴ ዓሳ ዩያ ኔ ጌዔ ባኮ ዋይዚ ዒኔ ዱጴሢ ኔ ዔሪያ?» ጌዔኔ።

13 ዓዚ ጋዓንቱ፡- «ታኣኮ ጫሪንጮ ዓዳሢ ቱኪባኣ ሚሢ ሲያ ቱጊንታንዳኔ፤

14 ዔይታ ዓኣፒ ባይቄያ ሃሃ ዓኣፓ ባይቄ ዓሶኮ ዓርና ማዔሢር ዔይቶ ባኣዚ ሃሹዋቱ፤ ዓኣፒ ባይቄ ዓሲ ዓኣፒ ባይቄያ ዔኪ ዓኣዳያ ማዔቶ ላምዎንሢ ዋሊ ዔኪ ዔቲይዳ ሎኣማንዳኔ» ጌዔኔ።

15 ጴዳርሴ ዩሱሴ ኩራ፡- «ዩና ኮኣኪንሦኮ ቡሊዎ ኑም ኬኤዜ» ጌዔኔ።

16 ዩሱሴ ዔይቶም፡- «ሲንሢያ ሃና ሄላንዳኣና ማሊ ጳቂሡዋያዳ?

15:4 ኬሲ. ማፃ 20:12፤ 21:17፤ ላሚ. ዋማ 5:16፤ ሌዊ. ዓኬ 20:9። 15:9 ዓሲ. 29:13። 15:14 ሉቃ. 6:39።

17 ዳንጋና ሊካ ጌላ ባአዚ ቢያ ጎጾ ከዳጋ ጊንሣ ዙሎ ከሰካሢ ሲንሢ ዔጅዋዳ?

18 ዳንጋና ከሰካ ባአዚ ጋዓንቴ ዒናይዳፓ ከሰካኔ፤ ዓሲ ጌኤሺቱዋያ ማሃሢ ይያኬ።

19 ፑርታ ማሊሢ፣ ዓሲ ዋዲሢ፣ ዓኒ ሃሃ ማኛ ማዒ ባአያና ለሃሢ፣ ኮይሱዋ ጎይሢና ዘአሰካ ኮኦሚሢ፣ ዉሱሞ፣ ሉኡዙሞ፣ ዓሲ ፑሽኪሢ፤ ይይ ቢያ ዓሲ ዒናይዳፓ ከሰካኔ።

20 ዓሲ ጌኤሺቱዋያ ማሃሢ ይያጉዴ ባኮ ማዓንዳፓዓቴም ማሰቲባአ ኩቸና ሙዒሢቱዋሴ» ጌዔኔ።

ካአናኔ ዓጮ ላአሌሎኮ ጉሙርቁያ

(ማር. 7:24-30)

21 ዬሱሴ ዬካፓ ዲርሴና ሲዶና ጎጾ ዓጮ ዓአዳኔ፤

22 ዬዩ ዓጮይዳ ፔቴ ካአናኔ ዓጪ ላአሊሰኬና ዬሱሴ ኮራ ሙካዎ፡- «ዳሙቴ ናዓሢዮ፣ ታ ጎዳ! ሃዳራ ታና ማአዴቴራ፤ ታኦኮ ናይሰኬና ፑርታ ዓያና ዓርቁም ሚርጌ ሜታዳኔ» ጌዒ ዒላቴኔ።

23 ዬሱሴ ጋዓንቴ ፔቴታጎ ዔኤቢ ጎዑዋያ ዚቲ ጋዓዛ፣ ዒዛኮ ጊንያ ሃንታ ናአታ ዒዛ ኮይላ ሙካዎ፡- «ሃና ላአሌላ ኦ ጊንያ ዒላቲ ዒላቲ ሃንታሢሮ ሃዳራ ዒዛ ዳኬ» ጌዒ ሺኢቄኔ።

24 ዒዚ ማሃዎ፡- «ታኦኒ ዳኪንቴሢ ያኦሲኮ ዣኦሊ ባይቄ ማራቶ፣ ዒሰራዔኤሌ ዓሶም ሌሊኬ» ጌዔኔ።

25 ላአሌላ ጋዓንቴ ዑኪ ሙኪ ዒዛኮ ቶኮ ዴማ ጉምዓታዎ፡- «ታ ጎዳሢዮ! ሃዳራ ታና ማአዴ!» ጌዔኔ።

26 ዬሱሴ ማሃዎ፡- «ናኦቶ ካሃ ዔኪ ካናቶም ዓጊሢ ኮይሳያቱዋሴ» ጌዔኔ።

27 ላአሌላ፡- «ጎዳሢዮ ጎኔኬ! ጋዓንቴ ካናታ ዔያቶኮ ዓዶንሢ ሙዓፓ ዲኢኔሢሢ ሙሙዓኔ» ጌዔኔ።

28 ዬሱሴ፡- «ዔና! ኔኤኮ ጉሙርቁያ ዳኤፒኬ፤ ኔ ኮዔሢጉዲ ኔኤም ማጎንጎ» ጌዔኔ። ላአሌሎኮ ናዔላ ዒማዒ ጋጋዓማና ዳቄኔ።

ዬሱሴ ሚርጌ ሃርጌ ዓሶ ፓሢሢ

29 ዬሱሴ ዬካፓ ዔቄ ጌሊላ ባዘ ዓጮ ሙካዎ ሌካ ዲኮ ከሰኪ ዒኢካ ዴዔኔ።

30 ሚርጌ ዓሳ ሃንታኒ ዳንደዑዋ ዋቦ ዓሶ፣ ዓአፓ ባይቄ ዓሶ፣ ዋቦ ዓሶ፣ ዳንጎ ባይቄ ዓሶ፤ ዬያጉዲ ሚሌ ሃርጌ ዓሶዋ ዬሱሴ ባንሢ ዔኪ ሙኪ ዒዛኮ ቶኮ ዴማ ጌሢም ዔያቶ ዒ ፖሲኔ።

31 ይያር ደራ ዳንጎ ባይቁ ዓሳ ጌሰቴሢሮ፣ ሃንታኒ ዳንዳዑዋ ዋሶ ዓሳ ዳቄሢሮ፣ ዋሶ ዓሳ ፒኪ ሃንቴሢሮ፣ ዓአፖ ባይቁ ዓሳ ዛጌሢሮ ዲቃቲ ሄርሺ ዲሰራዔኤሌ ያኦዛሢ ጋላቴኔ።

ዩሱሴ ያይዶ ሺዮ ዓሶ ሙኡዜሢ
(ማር. 8:1-10)

32 ዩሱሴ ዲዛኮ ጊንያ ሃንታዞንሢ ዔኤላያ፡- «ዓሳ ታእና ዋላ ሃይሣ ኬሊ ዳዔሢሮ ሙዓ ባአዚያ ዔያቶኮ ባአሢ ታና ሚቻኔ፤ ሃሢ ዔያታ ዳንዳያ ጎይያ ላቢ ዓቲዋጉዲ ዔኤቢ ሙኡዙዋያ ታ ዔያቶ ዳካኒ ኮዑዋሴ» ጌዔኔ።

33 ዲዛኮ ጊንያ ሃንታ ናኦታ ማሃያ፡- «ሂዴቶ ሃያ ቢያ ዓሶም ጊዳ ሙኡዚ ሃይካ ዓሴ ናንጉዋ ዳውሎይዳ ዓይጋፓ ኑ ዳንቃንዳይ?» ጌዔኔ።

34 ዩሱሴ ዔያቶ ኮራ፡- «ዓአፒኒ ካሣ ዲንሢኮ ዓአይ?» ጌዲ ያኦጩኔ፤

ዔያታ፡- «ላንካይ ካሣና ዳካ ሞሎና ዓአኔ» ጌዔኔ።

35 ዩካፓ ዩሱሴ ዳራ ሳያይዳ ዳዓንዳጉዲ ዓይሣያ፡

36 ላንካዋ ካሣንሢና ሞሎንሢና ዔኪ ያኦሲ ሺኢቁ፣ ቡንፂ ጊንያ ሃንታዞንሢም ዲንጋዛ ዔያታኦ ዳሮም ሺኢሺኔ።

37 ቢያሢ ሙዒ ሚሽኬም ዓቲ ደምሶ ጊንያ ሃንታዞንሢ ቡኩሲ ላንካይ ዳኤፒ ሌማቴ ኩሙሢ ዔኬኔ።

38 ሙዔ ዓሳ ላኦና ናኦቶና ዓታዛ ዓቲንቃ ሌሊ ያይዶ ሺያ ማዓያኬ።

39 ዩካፓ ዩሱሴ ዳሮ ሳራሢ ዳካያ፣ ዋኦያና ፒንቆ ጎንጎ ቶጊ፣ ማጌዶኔ ዓጮ ዓአዳኔ።

16

ያኦሲ ዋልቁና ማዲንታ ባኮ ዛጋኒ ያኦጩንቴ ያኦጩሢ
(ማር. 8:11-13፤ ሉቃ. 12:54-56)

1 ፔርሴ ዓሶና ሶዶቁ ዓሶና ዩሱሴ ኮይላ ሙኪ፣ ዒ ዋዚ ጋዓቴያ ኑ ዛጎም ጌዲ፡- «ጫሪንቺዳፓ ያኦሲ ዋልቁና ማዲንታ ዓኪ ባአዚ ማዲ ኑና ዳቄ» ጌዲ ያኦጩኔ።

2 ዲዚ ጋዓንቴ ማሃያ፡- «ዓማዛ <ጫሪንጫ ጌኤሺታሢሮ፣ ሃና ዲርዚ ዋርቃዓ> ዲንሢ ጋዓኔ፤

3 ጉቶ ሃሣ ላላ ሳባ ሻኦሬናኬ፤ ዲርዚ ዋርቃንዳኔ፤ ዲንሢ ጋባኔ፤ ይያይዲ ጫሪንጮ ዛጊ ዲንሢ ዔሪ ዔራኔ፤ ጋባንቴ ሃሢ ማዲንቴ ማዲንቴ ዓኣ ባኮ ዛሎ ዲንሢ ዔራኒ ዳንዳዒባኣሴ። *

4 ፑርታ ሃሣ ጉሙርቂሢ ሳኣ ማዔ፤ ሃያ ዋደ ዓሳ ማላታ ዛጋኒ ኮባኔ፤ ጋባንቴ ያኦሲ ማሊያ ኬኤዛ ዮናሴ ማላቶይዳፓ ባታዛ ማሌ ማላታ ዔያቶም ዳዊንታባኤ» ጋባዖ፣ ዬሱሴ ዔያቶ ሃሺ ማሌ ቤሲ ዓኣዴኔ።

ፔርሴ ዓሶና ሶዶቄ ዓሶናኮ ዓሶ ዳቢሻ ሙኑቆ ፃኣዛ
(ማር. 8:14-21)

5 ዲዛኮ ጊንያ ሃንታ ናኣታ ጋላ ዔኩዋዖ ዋሊ ባዞ ሱኮ ፒንቄ፤

6 ዬሱሴ ዲዛኮ ጊንያ ሃንታዘንሢ ኮራ፡- «ኮሺ ዔሩዋቴ! ፔርሴ ዓሶና ሶዶቄ ዓሶናኮ ዓሶ ዳቢሻ ሙኑቆ ፃኣዛፓ ዲንሢና ካፑዋቴ» ጌዔኔ።

7 ዔያታ፡- «ዲዛኮ ዬያ ጌይፃ ጎዖንቴ ጋሎ ኑ ዋሌሢሮ ናንዳኔ» ጌዔ ዋላ ጌሰቴኔ።

8 ዬሱሴ ጋባንቴ ማሊያ ዔያቶኮ ዔራዖ፡- «ዲንሢ ጉሙርቂፃ ፓጮ ዓሳ! ላሃ ኑ ዋሌሢሮኬ» ጌይ ዓይጎሮ ዋላ ዲንሢ ጌሰታይ?

9 ሄኤዶ ሄላዖ ዲንሢ ጳቂሁዋዓዳ? ደንጎ ካሃ፣ ደንጎ ሺያ ዓሲ ሚሽኬም ዓቴ ደምቦ ዋኣዲ ዴኤፒ ለማቴ ኩሙሢ ዲንሢ ዔኬቶዋ ዲንሢ ጳቂሁዋዓዳ?

10 ዬያፕዲ ሃሣ ላንካይ ካሣ ዖይዶ ሺያ ዓሲ ሚሽም ዓቴ ደምቦ ዋኣዲ ዴኤፒ ለማቴ ኩሙሢ ዲንሢ ዔኬቶዋ ዲንሢ ጳቂሁዋዓዳ?

11 ዓካሪ ፔርሴ ዓሶና ሶዶቄ ዓሶናኮ ዓሶ ዳቢሻ ሙኑቆ ፃኣዛፓ ዲንሢና ካፑዋቴ» ጌዔ ታ ዲንሢም ኬኤዛኣና ካሣ ዛላቱዋኣሢ ዋይቲ ዲንሢ ጳቂሁዋይ?» ጌዔኔ።

12 ዲዛኮ ጊንያ ሃንታዘንሢ ዬሱሴ ዲንሢና ካፒንቱዋቴ ዔያቶም ጌዔሢ ፔርሴ ዓሶና ሶዶቄ ዓሶናኮ ዔርዚያይዳፓ ማዓንዳኣፓ ዓቴም ካሣ ዛላቱዋኣሢ ዔያታ ዔሬኔ።

ጳደርሴኮ ጉሙርቂዖና ማርካዲዖና
(ማር. 8:27-30፤ ሉቃ. 9:18-21)

13 ዬሱሴ ፒላጶሴ ቁሳሪያ ጎዖ ዓጮ ሄላዖ ዲዛኮ ጊንያ ሃንታዘንሢ ኮራ፡- «ዓሳ ዓሲኮ ናዓሢ ዖናኬ ጋባይ?» ጌዔ ዔያቶ ዖኑጮኔ፤

* 16:3 ፔቴ ፔቴ ሚና ማፃኣፓ ፓይዲ ሃይሃና ላምዖናይዳ ዬሱሴ ጌዔ ባኮ ከኤዙዋሴ።
16:4 ማቴ. 12:39፤ ሉቃ. 11:29። 16:6 ሉቃ. 12:1። 16:9 ማቴ. 14:17-21።
16:10 ማቴ. 15:34-38።

14 ዔያታ፡- «ፔቴ ፔቴ ዓሳ ለማሰካ የሃኒሴኬ» ጋዓኔ፤ ዛላ ሃሃ ለዔሌሊያሴኬ» ጋዓኔ፤ ዓቲ ዓሳ ሃሃ ለዔርሚያሴኬ፤ ሃንጎ ያኦሲ ማሊያ ከኤዛዞንሢዳፓ ፔቴሢኬ» ጋዓኔ» ጌዔኔ።

15 ዩሱሴያ፡- «ዒንሢ ታና ያናኬ ጋዓይ?» ጌዔኔ።

16 ዩማና ሲሞኦኔ ጌይንታ ጳደርሴ፡- «ኔኤኒ ናንጊና ናንጋ ያኦዛሢ ናኦዚ፣ ሜሲሃኬ!» ጌዔኔ።

17 ዩሱሴ ማሃዮ፡- «የና ናዓሃ ሲሞኦኔ! ኔኤኒ ዓንጂንቴያኬ፤ ዓይጎሮ ጌዔቶ ዬያ ኔና ዔርዜሢ ጫሪንጫ ዓኦ ታ ዓዳሢ ማዓንዳፓዓቲሞ ዓሲቱዋሴ፤

18 ታ ኔኤሞ ሂዚ ጋዓኔ፡- ጳደርሴ፣ ኔኤኒ ላሌኬ፤ ሃያ ቦኦኮላሢ ማዔ ሹጫሢዳ ታኦኮ ሹኢጲያ ማኦሮ ዓሶ ታ ዶዲሺ ዔቁሳንዳኔ፤ ዩኖ ሹኢጲያ ማኦሮ ዓሶ ሃይቢ ዋልቄታዮ ባይዛዓኬ።

19 ሃይሹ ታ ኔኤሞ ጫሪንጫ ማኦሮ ካኦቱሞኮ ካሮ ቡሎ ቁልፖ ዒንጋንዳኔ፤ ሳዓ ኔ ማዮንጎ» ጌዔ ባካ ጫሪንጫ ዒማዲ ማዓንዳኔ፤ ሳዓ ኔ ማዮፓ» ጌዔ ባካ ጫሪንጫኦ ማዓንዳኬ» ጌዔኔ።

20 ዩካፓ ዩሱሴ ዒዛኮ ጊንያ ሃንታዞንሢ ኮራ ዒዚ ከሪሰቶሴ ማዔሢ ያኦማኦ ዔያታ ከኤዙዋጉዲ ላቲ ዓይሢኔ።

**ዩሱሴ ፔና ሄላንዳ ሜቶና ሃይቦና ዛሎ ከኤዜሢ
(ማር. 8:31—9:1፤ ሉቃ. 9:22-27)**

21 ዩማፓ ዓርቃዮ ዩሱሴ ዒዛኮ ጊንያ ሃንታ ናኦቶ ኮራ፡- «ሃሢ ዩሩሳላሜ ታ ዓኦዳንዳያ ኮይሳኔ፤ ዒኢካ ጨሞና ቁኤሶኮ ሱኡጎና ሃሃ ሙሴ ዔርዜ ዋጎ ዔርዛ ዓሶና ታ ጊዳ ፑርታ ሜቶ ዔኪ ዩዔሞ፣ ሃይቁሰካፓ ሃይሃሳ ከሎና ሃይባፓ ታ ዔቃንዳኔ» ጌዒ ጌዒ ከኤዚሢ ሳርቄኔ።

22 ጳደርሴ ጋዓንቴ ዩሱሴ ዱማሳዮ፡- «ጎዳሢዮ! ፔቴታዮ ዩይ ማዓንዳኬ! ዩይ ባካ ኔና ሄሎፓ!» ጌዒ ዘሪሢ ሳርቄኔ።

23 ዩሱሴ ጋዓንቴ ጳደርሴ ባንሢ ሹራዮ፡- «ፃላሄ፣ ኔ ታ ኮራፓ ሃኬ! ኔኤኒ ዓሲ ባኦዚዳፓ ዓታዛ ያኦሲ ባኦዚ ማሎዋኦሢሮ ታኦኮ ኔ ዱቆ ማዓኔ» ጌዔኔ።

24 ዩካፓ ዩሱሴ ዒዛኮ ጊንያ ሃንታ ናኦቶ ኮራ፡- «ታ ጊንያ ሃንታኒ ኮላሢ ፔና ከኤሪ ሃሹንጎ፤ ሃሃ ሃይቢማኦ ጊኢጊ ታ ጊንያ ሃንቶንጎ።

25 ፔናንጎ ዓይሳኒ ኮላሢ ቢያ ናንጎ ባይዛንዳኔ፤ ፔናንጎ ታ ጋይቴ ጌዒ ባይዛሢ ጋዓንቴ ዓይሳንዳኔ።

16:14 ማቴ. 14:1-2፤ ማር. 6:14-15፤ ሉቃ. 9:7-8። 16:16 ዮሃ. 6:66-69።
16:19 ማቴ. 18:18፤ ዮሃ. 20:23። 16:24 ማቴ. 10:38፤ ሉቃ. 14:27።
16:25 ማቴ. 10:39፤ ሉቃ. 17:33፤ ዮሃ. 12:25።

26 ፔቴ ዓሲ ዓጫ ዓኣ ባካ ቢያ ዒዛም ማዕም ፔ ናንጎ ጋዓንቴ ባይዜቶ ዓይጎ ዒዛ ማኣዳንዳይ? ሃሣ ዓሲ ፔኤኮ ባይቄ ናንጎ ማሂ ዴንቃኒ ዓይጎና ዳንዳዓይ?

27 ዓሲኮ ናዓሢ ዓደኮ ቦንቸና ጾኦሲ ኪኢታንቸና ዋላ ሙካንዳኔ፤ ዒማና ፔቴ ፔቴሢም ፔኤኮ ማዶጉዲ ዒንጋንዳኔ።

28 ጎኔ ታ ዒንሢም ጋዓኔ፤ ዓሲኮ ናዓሢ ጫሪንጮ ካኣቱም ቦንቸና ሙካኣና ዛጋንዳያ ሄላንዳኣና ሃይካ ዔቄ ዓሶ ባኣካፓ ሃይቁንዲዋ ዓሲ ዓኣኔ» ጌዔኔ።

17

ዩሱሴኮ ዓውካሮ ላኣሚንቶ

(ማር. 9:2-13፤ ሉቃ. 9:28-36)

1 ላሆ ኬሊኮ ጊንፃፓ ዩሱሴ ጳጳርሴና ያይቆኦቤና ሃሣ ያይቆኦቤኮ ጌርሲ ዮሃኒሴና ሌሊ ዔኪ ዴኤፒ ደካ ኬሰኬኔ።

2 ዩካ ዔያቶኮ ቤርታ ዒ ላኣሚንታዎ ዓኣፖ ካራ ዒዛኮ ዓቢጉዲ ፖዔኔ፤ ሃሣ ዒዛኮ ማኣዓሢያ ዓኣፓ ዲካያ ማዒ ቦኣሬኔ።

3 ዩማና ሙሴንታ ዔኤሊያሴንታ ዩሱሴና ዋላ ጌሰታንቴ ዔያታ ዴንቄኔ።

4 ጳጳርሴ ዩሱሴ ኮራ፡- «ጎዳሢዮ! ሃይካ ኑ ናንጌቴ ኮሺኬ፤ ኔ ናሽኬቶ ፔቴ ኔኤም፣ ፔቴ ሙሴም፣ ፔቴ ሃሣ ዔኤሊያሴም ሃይሣ ዉዲ ታ ማዦም» ጌዔኔ።

5 ዒ ኬኤዛ ጎይሣ ዓኣንቴ ቦኣሬ ቫኣሬ ሙኪ ዔያቶ ባይዜኔ፤ ዩያ ቫኣሮ ባኣካፓ፡- «ታ ዒዛና ዋዛዳ፣ ታ ናሽካ ናዓሢ ሃያኬ፤ ዒዛሲ ዋይዙዋቴ» ጋዓ ዑኡሲ ዋይዘንቴኔ።

6 ዒማና ዒዛና ዋላ ዓኣ ዩሱሴኮ ጊንፃ ሃንታዞንሢ ዩያ ዋይዜ ዋደና ዲቃቲ ሳዎይዳ ባለቲና ሎኦሚኔ።

7 ዩሱሴ ሙኪ ዔያቶ ኩጮና ዓርቃዎ፡- «ዒጊጪፖቴ፣ ዔቄዋቴ» ጌዔኔ።

8 ዩካፓ ዔያታ ዴግ ጌዒ ዛጋንቴ ዩሱሴይዳፓ ዓታዛ ሜሌ ዖኣኒያ ባኣሴ።

9 ዴካፓ ዔያታ ኬዲያይዳ ዓኣንቴ ዩሱሴ ዔያቶም፡- «ዓሲኮ ናዓሢ ሃይቄ ሃይባፓ ዔቃንዳያ ሄላንዳኣና ዒንሢ ዛጌ ባኮ ያኦማኣ ኬኤዚፖቴ» ጌዔኔ።

16:27 ማቴ. 25:31፤ ዓይኑ. 62:12፤ ሮሜ 2:6። 17:1 2ጴጫ. 1:17-18። 17:5 ማገኢ. ማፃ 22:2፤ ላሚ. ዋማ 18:15፤ ዓይኑ. 2:7፤ ዒሲ. 42:1፤ ማቴ. 3:17፤ 12:8፤ ማር. 1:11፤ ሉቃ. 3:22።

10 ዲዛኮ ጊንፆ ሃንታዞንሢ፡- «ዓካሪ፣ ሙሴ ዔርዜ ዎጎ ዔርዛዞንሢ ዔኤሊያሴ ቤርታዲ ሙካንዳያ ኮይሳኔ ጋዓሢ ዓይጎርዳይ?» ጌዒ ዲዛ ፆኦጩኔ።

11 ዲዚ ዔያቶም ማሃዎ፡- «ዔኤሊያሴ ጎኔ ሙኪ ቢያ ባኣዚ ጊኢጊሻንዳኔ፤

12 ጋዓንቲ ታ ዒንሢም ሂዚ ጋዓኔ፡- ዔኤሊያሴ ሙኪናኣኮከ፤ ማዔቶዎ ዔያታ ኮዔ ባኣዚ ዒዛይዳ ማዲያፓዓቲም ዒዛ ዔሪባኣሴ። ዬያጉዲ ሃሣ ዓሲኮ ናዓሢ ዔያታ ሜታሳንዳኔ» ጌዔኔ።

13 ዬማና ዒዛና ዓኣ ጊንፆ ሃንታዞንሢ ዬሱሴ ዔያቶም ከኤዜሢ ማሰካ ዮሃኒሴ ዛሎ ማዔሢ ዔሪኔ።

ዬሱሴ ፑርታ ዓያና ዓርቁ ናይ ፓሢሢ
(ማር. 9:14-29፤ 9:30-32፤ ሉቃ. 9:37-43፤ 9:43-45)

14 ዬሱሴና ሃይሃ ዲዛኮ ጊንፆ ሃንታዞንሢና ዴር ባንሢ ማዒ ሙካዛ ፔቴ ዓሲ ዬሱሴኮ ቤርታ ሙኪ ጉምዓታዎ፡-

15 «ታ ጎዳሢዮ! ታኣኮ ናዓሢ ዓውሴ፤ ዴንሣ ፑርታ ዓያና ዶርዓ ዒዛ ሜታሳኔ፤ ማርጌ ዎዴ ታሚዳ ሎኦማኔ፤ ሃሣ ዎኣሢዳኣ ጌላኔ።

16 ኔኤኮ ጊንፆ ሃንታዞንሢ ኮራ ታ ዔኪ ሙከንቲ ዔያታ ዒዛ ዓውሳኒ ዳንዳዒባኣሴ» ጌዔኔ።

17 ዬሱሴ፡- «ሃይ ዒንሢ ጉሙርቁዎ ዎቦ ዓሳ! ዓይዴ ሄላንዳኣና ታ ዒንሢና ናንጋንዳይ? ሃሣ ዓይዲ ሄላንዳኣና ታ ዒንሢ ጊቢ ዳንዳዓንዳይ? ሂንዳ ናዓሢ ታኣም ዔኪ ዬዑዎቴ!» ጌዔኔ።

18 ዬካፓ ዬሱሴ ፑርቶ ዓያናሢ ጎራዛ፣ ፑርቶ ዓያናሢ ናዓሢዳፓ ከሰከም ናዓሢ ዬማፓ ዓርቃዎ ዳቄኔ።

19 ዬካፓ ዲዛኮ ጊንፆ ሃንታ ናኣታ ፔኤር ዬሱሴ ኮይላ ሙካዎ፡- «ኑኤኒ ፑርቶ ዓያና ከሳኒ ዳንዳዒባኣሢ ዓይጎርዳይ?» ጌይ ፆኦጩኔ።

20 ዬሱሴ ማሃዎ፡- «ጉሙርቁዎ ዒንሢኮ ዳከሢርከ፤ ጎኔ ታ ዒንሢም ጋዓኔ፤ ሴናፒጩ ጌይንታ ባኮማ ዓኣፖ ጉዴያታዎ ጉሙርቁሢ ዒንሢኮ ዓኣቶ ሃያ ዲኮ ሃካፓ ሺኤኪ ጌዔቶ ዒንሢም ዓኣዳንዳኔ፤ ዒንሢ ባሻንዳ ባኣዚ ፔቴታዎ ባኣሴ። [

21 ሃያ ጉዴሢ ሙኡዚ ሃሺ ሺኤቆ ሺኤጲሢና ማዒባኣቶ ከሰከዎሴ» ጌዔኔ።]

22 ጌሊላይዳ ዲዛኮ ጊንፆ ሃንታዞንሢ ቡኪንቲ ዓኣንቲ ዬሱሴ ዔያቶም፡- «ዓሲኮ ናዓሢ ዓሰም ዓኣሢንቲ ዒንጊንታንዳኔ፤

17:10 ሚል. 4:5። 17:12 ማቴ. 11:14። 17:20 ማቴ. 21:21፤ ማር. 11:23፤ 1ቆር. 13:2።

23 ዔያታኣ ዒዛ ዎዳንዳኔ፤ ዒዚያ ሃይባፓ ሃይሣጎ ኬሎና ዔቃንዳኔ» ጌዔሢሮ ዒዛኮ ጊንዖ ሃንታ ናኣታ ሚርጌና ዖዬ።

ጌኤዡ ማኣሮም ጨገንታ ጊኢራ ዛላ

24 ዩሱሴና ዒዛኮ ጊንዖ ሃንታዞንሢና ቂፒርናሆማ ጎዖ ዓጮ ሄላዛ ጌኤዡ ማኣሮኮ ጊኢሮ ጨገሳ ዓሳ ጳዒሮሴ ኮይላ ሙካዖ፡- «ዒንሢኮ ዔርዛሢ ጌኤዡ ማኣሮም ጨሳ ሚኢሾ ጨጋ?» ጌዒ ዖኦጮ።

25 ጳዒሮሴ፡- «ሂዮ፤ ጨጋኔ» ጌዔ።

ዩካፓ ጳዒሮሴ ጋሮ ጌላዛ ዩሱሴ ቤርታዲ ሲሞኦኔ ኮራ፡- «ዓጮ ካኣታ ጊኢሮ ሚኢሾንታ ኮርሞ ዓሶፓ ዔኮ ሚኢሾ ዔካሢ ዓጮ ዓሶይዳፓሞ? ዙሎ ዓሶይዳፓዳይ?» ጌዒ ዖኦጮ።

26 ጳዒሮሴ ማሃዖ፡- «ዙሎ ዓሶይዳፓኬ» ጌዔ።

ዩያሮ ዩሱሴ፡- «ሂዴቶ ዓጮ ዓሳ ጊኢራ ጨገዎሴ ጌይሢኬ!

27 ዓካሪ ኦና ዔያታ ቆፁዎጉዲ ዴንዲ ሞላሢ ዓርቆ ዓንጎ ከሮ ባዛ ዓጌ፤ ዩካፓ ቤርታዲ ኔ ዓርቂ ሞሎማ ሹካዖ ዳንጋፓ ኔ ዔካንዳ ሹጮ ቢሮ ታኣና ኔኤናና ዛሎ ጨጌ» ጌዔ።

18

ጨሪንጮ ካኣቱሞይዳ ቢያፓ ባሼሢ ዖናዳይ?

(ማር. 9:33-37፤ ሉቃ. 9:46-48)

1 ዩናና ዩሱሴኮ ጊንዖ ሃንታዞንሢ ዩሱሴ ኮራ ሙካዖ፡- «ጨሪንጮ ካኣቱሞይዳ ቢያፓ ባሼሢ ዖናዳይ?» ጌይ ዒዛ ዖኦጮ።

2 ዩሱሴ ፔቲ ዳካ ናይ ዔኤሊ ዔያቶኮ ባኣካ ዔቂሳዖ፡-

3 «ጎኔ ታ ዒንሢሞ ጋዓኔ፤ ዒና ዒንሢኮ ላኣሚንቲባኣቶ ሃሣ ዳካ ናይጉዲ ዒንሢ ማዒባኣቶ ጨሪንጮ ካኣቱሞይዳ ፔቲታዖ ዒንሢ ጌላዓኬ።

4 ሃይማ ናዖጉዲ ፔና ሂርኪዳሢ ጨሪንጮ ካኣቱሞይዳ ዴኤፒ ማዓንዳኔ።

5 ሃይማጉዴ ናዖ ታ ሱንዖና ቦንቺ ዔካሢ ታናኣ ዔካኔ።

6 ታና ጉሙርቃዞንሢ፣ ሃንሢ ዳኮንሢዳፓ ፔቲማ ዳቢሻ ዓሲ ዴኤፒ ዎንሢ ሹቺ ባቃና ቱኪ ባዙ ቁልባ ኬኤሪንቲ ሃይቂቶ ቃራ ማዓንዳኔ» ጌዔ።

17:24 ኬሲ. ማዖ 30:13፤ 38:26። 18:1 ሉቃ. 22:24። 18:3 ማር. 10:15፤ ሉቃ. 18:17።

ዓሲ ዳቢቫ ባአዚ
(ማር. 9:42-48፤ ሉቃ. 17:1-2)

7 ሃሣ ዩሱሴ ኬኤዛዎ፡- «ዓሲ ጌሺ፣ ጎሜ ማዲሻኒ ዳንዳባ ባአዚና ኩሜ ሃኖ ዓጨሎም ባዴዔ! ዎይቲቲያ ጌሺ ዳቢቫ ባአዚ ሙኩዎዎ ዓታዓኬ፤ ጋዓንቲ ጌሺ ዳቢቫኒ ማዳ ዬያ ዓሢም ባዴዔ!

8 ዬያሮ ኔኤኮ ኩጫ ሃሣ ቶካ ዳቢቪ ጎሜ ማዲሳያ ማዔቲ ቲቂ ኔጊዳፓ ኬኤሬ፤ ላምዎ ኩቺና ሃሣ ላምዎ ቶኪና ዓአዎ ናንጊና ባይቁዎ ታምይዳ ኔ ኬኤሪንታሰካፓ ጉንዎ ሃሣ ዎቦ ዓሲ ማዒ ናንጊና ናንጎይዳ ጌሊፃ ኔኤም ኮሺኬ።

9 ዓአፓ ኔኤኮ ኔና ዳቢቪ ጎሞ ማዲሻዞ ማዔቶ ኬሲ ኔጊዳፓ ኬኤሬ፤ ላምዎ ዓአፒ ኔኤኮ ዓአንቲ ጋአናአሜ ታምይዳ ኔ ኬኤሪንታሰካፓ ፔቲ ዓአፒና ማዒ ናንጊና ናንጎይዳ ጌሊፃ ኔኤም ኮሺኬ።

10 «ሃንሢ፡ ዳኮንሢዳፓ ፔቲማታዎ ዒንሢ ቦሁዋጉዲ ዒንሢና ዔሩዋቲ፤ ጨሪንጮይዳ ዓአ ዔያቶም ጊአጊንቲ ኪኢታንቻ ጨሪንጮ ዓአ፣ ታዓዳሢ ቤርታ ቢያ ኬሊ ዓአኔ። [

11 ዓሲኮ ናዓሢ ሙኬሢ ባይቁሢ ዴንቂ ዳቂሻኒኬ]» ጌዔኔ። *

ባይቁ ማራይ ኮኦኪንሢ
(ሉቃ. 15:3-7)

12 ሃሣ ዩሱሴ ኬኤዛዎ፡- «ዒንሢም ዓይጎ ማላይ? ፔቲ ዓሲኮ ጄኤታ ማራይ ዓአዎ ዔያቶይዳፓ ፔቲ ባይቁቲ ታዞጲታም ታዞጲ ሄንቃ ዲኮይዳ ሃሺ ባይቁ ማራዓሢ ኮዓኒ ዓአዲዎዓዳ?

13 ጎኔ ታ ዒንሢም ጋዓኔ፤ ዬያ ማራዓሢ ዴንቂ ዎዶና ባይቁባአ ታዞጲታሚ ታዞጲንሢዳፓ ባሽ ባይቁ ጴዴሢሮ ሚርጌና ዒ ዎዞዳኔ።

14 ዬያጉዲ ጨሪንጮይዳ ዓአ፣ ዒንሢኮ ዓዳሢ ሃንሢ ዳኮንሢዳፓ ፔቲማታዎ ባይቃንዳጉዲ ኮዑዋሴ» ጌዔኔ።

ዳቤ ዓሲ ዛላ

15 ዬካፓ ዩሱሴ፡- «ታና ጉሙርቃዞንሢዳፓ ፔቲ፣ ኔኤኮ ዒሾ ማዓይ ኔኤም ዳቤቶ ኔኤና ዒዛና ሌሊ ማዒጋፓ ዒ ዳቤ ጎይዎ ኬኤዜ፤ ኔ ጋዓሢ ዔ ዎይዜቶ ጊንሣ ዒንሢኮ ፔቱም ዎንዳሲጉዲ ኔ ማሄኔ ጌይሢኬ።

18:8 ማቴ. 5:30። 18:9 ማቴ. 5:29። * 18:11 ፔቲ ፔቲ ሚናአ ማፃላፓ ፓይ. 11 ቃሳኔ፤ ቃአሌላ ሉቃ. 19:10 ጊዳ ዓአዞ ማላኔ። 18:11 ሉቃ. 19:10። 18:15 ሉቃ. 17:3።

16 ኔኤም ዒ ወይዘባአቶ ጌኤሲ ላምዎ፤ ሃሣ ሃይሣ ዓሲ ማርካቶና ጎናዳሢሮ ላምዎ ሃንጎ ሃይሣ ዓሲ ዔኪ ዒዛ ኮይላ ዳንዴ።

17 ዔያታ ጋዒሢያ ዒ ወይዘባ ጌዔቶ ሸኢጲዎ ማኦሮ ዓላም ኬኤዘ፤ ሃሣ ሸኢጲዎ ማኦሮሲያ ወይዘባ ዒፃቶ ኪሪሰቶሴ ጉሙርቁዎ ዓሲ ሃሣ ጎሜ ዓሲ ማሂ ዒዛ ዛጌ» ጌዔኔ።

18 ሃሣ ዒ ኬኤዛዎ፡- «ጎኔ ታ ዒንሢም ጋዒኔ፤ ሳይይዳ ዒንሢ ሃዲ ማዎም ጌዔ ባካ ጨሪንጫ ዒማዲ ማዒንዳኔ፤ ሳይይዳ ዒንሢ ማዎም ጌዔ ባካ ጨሪንጫይዳኦ ማዐቀያ ማዒንዳኔ።

19 «ሃሣ ታ ዒንሢም ጋዒኔ፡- ዒንሢ ላምዎ ማዒ ሳይይዳ ፔቱምና ዒይጎ ባኦዚያ ሸኢቁቶ ጨሪንጫ ዓኦ ታ ዒዳሢ ዒንሢም ከንሣንዳኔ።

20 ዓይጎሮ ጌዔቶ ላምዎ ሃሣ ሃይሣ ማዒ ታ ሱንዎና ዒንሢ ቡኪንታ ቤዛ ቢያ ታ ዒንሢኮ ባኦካ ማዒንዳኔ» ጌዔኔ።

ዓሲም ዓቶም ጌይሢ

21 ዩማና ጴጂሮሴ ዩሱሴ ባንሢ ሙካዎ፡- «ጎዳሢዮ! ኔና ጉሙርቁ፣ ፔቱ ታ ዒሻሢ ታኦም ዳቤቶ ዓኦፒኒ ማይንቲ ታ ዒዛም ዓቶም ጎዎንዳይ? ላንካይ ሄላንዳኦና ጎዎንዳም?» ጌዒ ያኦጩኔ።

22 ዩሱሴ ማሃዎ፡- «ላንካይታሚ ማይንቲ ላንካይ ሄላንዳኦና ማዒንዳኦ፣ ማይንቲ ሌሊ ላቶም» ጌዔ ታ ኔና ጎዐቀሴ፤

23 ዩያሮ ጨሪንጫ ካኦቱማ ፔኤኮ ማዳ ዓሶ ኮራ ዓኦ ሚኢሾ ዛጋኒ ኮዔ ካኦቲሰኬያ ማላኔ፤

24 ዩይ ካኦታሢ ሚኢሾ ዛጎ ዓርቁ ዎደና ሸያ ዓሲ ፔቱ ሌዔ ማዳ ማዳም ዒንጎ ሚኢሾ ጉዴያ ባይዜ፣ ጋሌና ዓኦ፣ ዒዛኮ ማዳ ዓሲ ዓርቁንቲ ሙኬኔ።

25 ዩይ ማዳ ዓሢ ጋሎ ጪጋኒ ዳንዳዒባኦሢሮ ካኦታሢ ዒዛንታ ዒዛኮ ማቸንታ ናኦቶንታ ዓኦ ባካኦ ቢያ ሻንቸንቱም ጋላ ጪጊንታንዳጉዲ ዓይሜኔ።

26 ማዳሢ ጋዒንቱ ካኦታሢኮ ቶካ ሎኦማዎ፡- ታ ጎዳሢዮ! ሃደራ፣ ታ ኔኤም ጋሎ ቢያ ጪጋንዳኔ፤ ዳካ ኬሊ ታኦም ማሌ ጌዒ ሸኢቁኔ።

27 ጎዳሢ ዒዛ ሚጪንታዎ ዒዛኮ ዓኦ ጋሎ ሃሺ፣ ማሂ ዳኬኔ።

28 «ጋዒንቱ ዩይ ዓሢ ዩካፓ ኬሰኪ ዓኦዳንቱ ጸኤታ ሹቺ ቢራ ዒዛይዳፓ ታልዔ፣ ዒዛና ዎላ ማዳ ዓሲሰኬያ ዳንቃዎ ፖኦሪንደ ዓሢኮ ጩኤሊ ዓርቁ ሄኔ ታኦኮ ታልዔ ቢሮ ታኦም ጪጌ! ጌዔኔ።

18:16 ላሚ. ዎማ 19:15። **18:18** ማቲ. 16:19፤ የሃ. 20:23። **18:21** ሉቃ. 17:3-4። **18:22** ማኲ. ማፃ 4:24።

29 ይህ ዲዛር ለጋህ ቶካ ዲዛር ሎኦማዎ ለሃዳራ፡ ታ ኔኤም ጋሎ ጪጋንዳኔ፤ ዳካ ከሌ ታኦም ማሌ፤ ጌራ ሺኢቄኔ፤

30 ታላዔህ ጋላንቴ ይያ ዋይዞ ዲዎ፣ ጋሎ ጪጋንዳያ ሄላንዳኦና ዔኪ ዓኣዲ ቱኡሲ ማርካ ቱኪሴኔ።

31 ማሌ ይያ ዓህረ ማዳ ለጎንህ ይያ ዛጌ ዋደና ማርጌና ያያ ደንዲ ማዳንቴ ባኮ ቢያ ዔያቶኮ ካኦታህም ከኤዘኔ።

32 ዔያቶኮ ካኦታህ ይያ ማዳ ዓህ ዔኤሊሳዮ፡- ለኤኒ ሃይ ፑርታህ! ኔ ታና ሺኢቄህሮ ኔኤኮ ዓኣ ጋሎ ቢያ ታ ኔኤም ሃሺኔ፤

33 ዓካሪ ታኣኒ ኔኤኮ ጋሎ ኔኤም ሃሺህጉዲ ኔኤኒ ኔ ለጋህ ማዔ፡ ማዳህም ጋሎ ሃሻንዳያ ኮይሱዋዓዳ?

34 ጋዎ፡ ጎዳህ ዲዛይዳ ጎሪንቴሰካ፣ ቤርታ ሃሺ ጋሎ ቢያ ጪጋንዳኦና ቱኪ ዲዛ ማታሰንዳጉዲ ቱካ ዓሶም ዓኣህ ዲንጌኔ።

35 «ዓካሪ ዲንህ ፔቴ ፔቴህ ታና ጉሙርቃ፡ ዲንህኮ ዲጊኖንህም ዲና፣ ማቶም ጌራ ባኣቶ ጫሪንጮይዳ ዓኣ ታ ዓዳህ ዲንህም ዓቶም ጋዓባኔ» ጌዔኔ።

19

ለኣሊ ዓንጂህ ዛላ ያኦጪንቴ ያኦጪህ (ማር. 10:1-12)

1 ዩሱሴ ይያ ባኮ ከኤዘ ጋፒሴህኮ ጊንፃ ጌሊላ ዓጮ ሃሺ ዮርዳኖሴ ዋሮ ሱካ ዓኣ፡ ዩሁዳ ዓጮ ደንዳኔ።

2 ይማና ማርጌ ዓሲ ዲዛ ጊንፃ ዓኣዳዛ ዔያቶይዳ፣ ሃርጊንቴ ዓሶዋ ዲኢካ ዲ፣ ፓህኔ።

3 ፔርሴ ዓሳ ዲ ዋዚ ጋዓቴያ ዋይዛኒ ዲዛ ኮይላ ሙካዮ፡- «ማዔ ባኣዚ ቢያና ዓሲ ፔኤኮ ማቾ ዓንጅንዳጉዲ ዋጋ ዓይህ?» ጌራ ያኦጮኔ።

4 ዩሱሴ ማሃዮ፡- «ያኦሲ ቤርታዲ ዓቴንቄና ለኣሊና ማህ ዓሲ ማጉፎህ ዲንህ ናባቢባኣዓዳ?

5 ሃህ ለይዘሎና ዓሲ ዓደና ዲንደና ሃሺ ማቾና ዋላ ፔቴ ማዓኔ፤ ለምጎንህያ ፔቴ ዓሲ ማዓኔ» ያኦሲ ጌዔህ ዲንህ ናባቢባኣዓዳ?

6 ይያር ዔያታ ፔቴከ፤ ለምጎቱዋሴ፤ ያኦሲ ዋላ ዋኣፃዘንህ ዓሲ ቡሎ፣» ጌዔኔ።

7 ፔርሴ ዓሳ ጊንህ፡- «ሂዴቶ ሙሴ ዓይጎር ለፔቴ ዓሲ ለኣሌሎ ዓንጅያ ማዔህ ዔርዛ፡ ማርካ ማዔ፡ ፃኣፒንቴ ባኣዚ ዲንጊ ማቾ ዓንጅንጎ ጌራ ዓይህይ?» ጌዔኔ።

19:4 ማዚ. ማፃ 1:27፤ 5:2። 19:5 ማዚ. ማፃ 2:24። 19:7 ለሚ. ዋማ 24:1-4፤ ማቴ. 5:31።

8 ዩሱሴ ማሃዎ፡- «ሙሴ ዲንሢኮ ዲኖ ደዲሞ ዛጊ ላኣሊ ዲንሢ ዓንጃንዳጉዲ ዓይሣንዳኣፓዓቲሞ ማዢንታፓ ዓርቃዎ ዓኣ ዎጋ ያዲቱዋሴ፤

9 «ታ ዲንሢሞ ሃሢ ጋዓሢ ማቻ ፔኤኮ ማሌና ዲኢቲባኣንቲ ማቻ ዓንጃ ማሌ ላኣሊ ዔካሢ ሲያ ዘኣሰካ ኮኣማያ ማዓኔ» ጌዔኔ።

10 ዲዛኮ ጊንፆ ሃንታዘንሢ ዬያ ዋይዘዎ፡- «ዓነና ማቻና ዛላ ባኣዚ ያዲ ማዔቲ ዔኪቦኦቲ ሃሃ ሎዲቦኦቲ ቃራኬ» ጌዔኔ።

11 ዩሱሴ ጋዓንቲ፡- «ፆኣሲ ደማ ዳንዳዒሢ ዲንጌ ዓሲዳፓ ዓታዛ ዬይ ባካ ፆኣማኣ ዳንዳዒንቲዋያኬ።

12 ጋዓንቲ ዓሲ ላኣሊ ዔኩዋዎ ሃሃ ሌውዋዎ ዓታሢ፡- ፔቲ ፔቲሢ ዓሸቲሚ ማዒ ሸይንታኔ፤ ዛላ ሃሃ ዓሲ ኩቸና ዓሸቲንቃኔ፤ ዓቲሢ ሃሃ ጫሪንጮ ካኣቲሞ ማዶሮ ሸዓዒ ጌዒ ፔና ዓሸቲሚጉዲ ማሃኔ፤ ዬያ ታ ጌዔ ባኮ ዔካኒ ዳንዳዒሢ ያዲ ማዶንጎ» ጌዔኔ።

ዩሱሴኮ ናኣቶ ዓንጃዎ
(ማር. 10:13-16፤ ሉቃ. 18:15-17)

13 ዲማና ናኣቶኮ ዑፆይዳ ኩጮ ጌሢ ሸኢቃንዳጉዲ ዓሳ ዳኮ ናኣቶ ዲዛ ባንሢ ዔኪ ሙካዛ ዲዛኮ ጊንፆ ሃንታዘንሢ ጋዓንቲ ዓሶ ጎሬኔ።

14 ዩሱሴ፡- «ናኣታ ታ ባንሢ ሙኮንጎ፣ ላኣጊፖቲ፤ ጫሪንጮ ካኣቲማ ዔያቶ ጉዳዘንሢሞኬ» ጋዓዎ፤

15 ኩጮ ናኣቶ ዑፆ ጌሢ ዓንጃሢኮ ጊንፆፓ ዬኖ ቤዛፓ ዔቂ ዓኣዳኔ።

ፔቲ ዖርጎቹ ዳጌሰኬያኮ ፆኣጪሢ
(ማር. 10:17-31፤ ሉቃ. 18:18-30)

16 ዩካፓ ፔቲ ዓሲ ዩሱሴ ኮራ ሙካዎ፡- «ዔርዛሢሃ፡ ናንጊና ናንጊ ዳንቃኒ ዓይጎ ኮሺ ባኣዚ ታ ማዶንደይ?» ጌዒ ፆኣጪኤ።

17 ዩሱሴ ማሃዎ፡- «ኮሺ ማዶ ዛላ ኔ ታና ዓይጋ ፆኣጪይ? ኮሺ ማዓይ ፔቲ ፆኣዛሢ ሌሊኬ፤ ናንጊና ናንጊ ኔ ዳንቃኒ ኮዔቲ ዓይሢፆንሢ ኩንሢ» ጌዔኔ።

18 ዓሢያ፡- «ዋንሢ ዓይሢፆንሢ?» ጌዔኔ።
ዩሱሴ ማሃዎ፡- «ዓሲ ዋዲፖ፣ ማቻ ሃሃ ዓነ ማዒባኣያና ላሂፖ፣ ዉኡቂፖ፣ ሉኡዙሞና ማርካዲፖ፣

19:9 ማቲ. 5:32፤ 1ቆሮ. 7:10-11። 19:18 ኬሲ. ማፆ 20:13-16፤ ላሚ. ዎማ 5:17-20።

19 ኔ ዓደና ኔ ዒንደና ቦንቹ፣ ዓሲ ኔናጉዲ ማሂ ናሽኬ ጋዓ ዓይሂያንሂኬ» ጌዔኔ።

20 ጰጌሂያ፡- «ዩንሂ ታ ቢያ ካፔያኬ፤ ሜሌ ዓቲ ባአዚ ዓይጌ ዓአይ?» ጌዔኔ።

21 ዩሱሴ ማሃያ፡- «ፔቶ ኔ ሂሎ ማዓኒ ኮዔቶ ኔኤኮ ዓአ ባኮ ቢያ ሻንቺ ሚኢሾ ማንቆ ዓሶም ዒንጌ፤ ጫሪንጮይዳ ቆሎ ኔ ዴንቃንዳኔ። ዓካሪ ዩካፓ ታ ጊንፆ ሙኩ» ጌዔኔ።

22 ጰጌሂ ዩያ ዋይዛያ፡ ሚርጌ ቆሎ ዒዛኮ ዓአሂር ኮሺ ያዪ ያዪ ዴንዴኔ።

23 ዩካፓ ዩሱሴ ዒዛኮ ጊንፆ ሃንታ ናአቶ ኮራ፡- «ጎኔ ታ ዒንሂም ጋዓኔ፤ ያርጎቹም ያኦሲ ካአቱምይዳ ጌሊሂ ሚርጌ ማቶኬ፤

24 ለሚ ታ ሃሃ ዒንሂም ጋዓኔ፡- ያርጎቹ ያኦሲ ካአቱምይዳ ጌሊሂዳፓ ጋአላ ናርፔ ሂኢናና ጌላኒ ሸሌዔ ማዓንዳኔ» ጌዔኔ።

25 ዒዛኮ ጊንፆ ሃንታ ናአታ ዩያ ዋይዜ ዋደና ኮሺ ዲቃቲ ሂርሻያ፡- «ዓካሪ ሂዴቲ ያኦኒ ዳቃኒ ዳንዳዓንዳይ?» ጌዔ ያኦጮኔ።

26 ዩማና ዩሱሴ ዔያቶ ባንሂ ዛጋያ፡- «ዩይ ዓሲም ዳንዳዒንቱዋ ባአዚኬ፤ ያኦሲም ጋዓንቲ ቢያ ባአዚ ዳንዳዒንታያኬ» ጌዔኔ።

27 ጰዒርሴ፡- «ሃይሻ ቢያ ባአዚ ኑ ሃሽ ኔ ጊንፆ ሃንታንቲም? ዓካሪ፡ ኑ ዴንቃንዳ ባካ ዓይጌንዴ ናንዳይ?» ጌዔኔ።

28 ዩሱሴ ማሃያ፡- «ጎኔ ታ ዒንሂም ጋዓኔ፤ ሙካንዳ ዓኮ ዓጮይዳ ዓሲኮ ናዓሂ ቦንቹንቲ፣ ካአቱም ያይቶይዳ ዴዔ ዋደና ዒንሂያ ታ ጊንፆ ሃንታዘንሂ ታጰ ለምያ ካአቱም ያይቶይዳ ዴዔ፣ ታጰ ለምያ ዒሰራዔኤሌ ፃጰይዳ ዋጋንዳኔ።

29 ታ ሱንፆር ጌዒ፡- ፔ ማአር፣ ፔ ጌርሲንሂ፣ ጌርንሂ፣ ዓደ፣ ዒንደ፣ * ናአቶ ማዔቶዋ ጎዡ ሃሻሂ ቢያ ጸኤታ ጰንጮ ማሂ ዔካንዳኔ፤ ሃሃ ናንጊና ናንጎዋ ዴንቃንዳኔ።

30 ጋዓንቲ ቤርታ ማዔ፡ ጎኦሶ ማላ ሚርጌ ዓሳ ጊንሂም፤ ጊንፆ ዓቲ ላቤያ ማላ ሚርጌ ዓሳ ቤርቲም ማዓንዳኔ» ጌዔኔ።

20

ዋይና ጎዡ ጎሽካ ዓሶ ኮኦኪንሃ

1 ዩካፓ ዩሱሴ፡- «ጫሪንጮ ካአቱማ ፔኤኮ ዋይና ጎዡ ጎሽኪሳኒ ጎሽካ ዓሶ ኮዒ ጉቲ ዓሚ ኬሰኬ ዓሲ ማላኔ፤

19:19 ኪሲ. ማፃ 20:12፤ ለሚ. ዋማ 5:16፤ ለዊ. ዓኬ 19:18። 19:28 ማቴ. 25:31፤ ሉቃ. 22:30። * 19:29 ዒንደ፡- ጋዓዛ ፔቲ ፔቲ ማፃአፓ «ዒንደ ሃሃ ማቸ» ጋዓኔ። 19:30 ማቴ. 20:16፤ ሉቃ. 13:30።

2 ዲዚ ፔቴ ፔቴ ዓሶም ፔቴ ፔኤሺኮ ፔቴ ኬሊ ማዳዛ ዲንጎ ሚኢሾ ጨጋኒ ዓሶና ጌሰቲ ጊኢጊ ጎዡ ቤዘ ዓሶ ዳኬኔ» ጌዔኔ።

3 ዩሱሴ ኬኤዛዮ፡- «ዩይ ዓሢ ጉቴ ሶኦፓ ዎዴኮ ቤርታ ቦኦኮ ቤዘ ኬሰኪ ማዶ ባይቁም ዔቂ ዓኣ ዓሲ ዴንቁ።

4 <ዲንሢ ታኦኮ ዎይኖ ጎዡይዳ ዴንዲ ማዲዎቴ፤ ታ ዲንሢም ኮይሳሢጉዲ ጨጋንዳኔ» ጋዓዛ።

5 ዔያታ ዓኣዴኔ። ሃሣ ዓባ ሳዛ ሄላኣና ጊንሣ ማሢ ዶምቦልሳ ዎዴ ማዓኣና ኬሰኪ ሜሌ ማዳንዳ ዓሲ ዴንቁ።።

6 ዩካፓ ዓባ ዲባናኣና ኬሰኪ ማዶ ባይቁም ዔቂ ዓኣ ሜሌ ዓሲ ዴንቃዎ፡ <ማዶ ባኣያ ሃይካ ዲንሢ ዓይጋ ዔቂ ፔኤቃይ?> ጌዔ ያኦጫዛ።

7 ዔያታ ማሃዎ <ኦና ማዲሻኒ ጋዓ ዓሲ ባይቁሢሮኬ» ጌዔኔ፤ ዓሢ ዩያ ዎይዛዮ <ዲንሢያ ዓኣዲ ታኦኮ ዎይኖ ጎዡይዳ ማዲዎቴ» ጌዔኔ።።

8 «ዩካፓ ሳዓ ዓማዛ ጎዡ ዓዳሢ ማዳ ዓሶኮ ሱኡጋሢም <ጋፒንፃ ሙኬዘንሢዳፓ ዓርቃዮ ቤርታ ሙኬ ዓሶ ሄላንዳኣና ማዶ ዓሶ ቢያ ዔኤሌ ዔያታ ማዴሢ ዛሎ ዔያቶም ጨጌ» ጌዔኔ።።

9 ዲማና ዓባ ዲባናኣና ማዳኒ ሙኬ ዓሶንሢ ሚኢሾ ጨጋሢ ኮይላፓ ፔቴ ኬሊ ማዴም ዲንጎ ሚኢሾ ዔኬኔ።።

10 ቤርታ ማዶ ዓርቁዘንሢ ዲማና ባሼ ኦም ጨጎንዶኔ ጌዔ ማሌኔ፤ ጋዓንቴ ዔያቶማኣ ፔቴ ኬሊ ማዴም ዲንጎ ሚኢሾ ዲንጊንቴኔ።።

11 ጨጎና ሚኢሾ ዔያታ ዔካዮ ጉንዲሚሢና ጎዡ ዓዶ ኮራ፡-

12 <ሃንሢ ዓባ ዲባናንቴ ማዶሮ ሙኬዘንሢ ዳካ ሌሊ ማዳዛ ሮኦሪ ማዶና ላቢንቲ ዓቦ ሩኡጳ ሜታዲ ፔኤቁ ዓሶ፡ ኦኡና ዎላ ሄኮ ዎይቴ ኔ ዔያቶም ጨጋይ?> ጌዔኔ።።

13 «ጎዡ ዓዴ ዩያ ማዳሢ ኮራ ታ ዲሻሢዮ፡ ታ ፑርታ ኔኤም ማዳባኣሴ፤ ፔቴ ኬሊ ማዴም ጨጎ ሚኢሾም ማዳኒ ኔ ታኣና ዎላ ጌሰቲ ጊኢጊባኣዓዳ?

14 ሃኣዛጌ፤ ኔኤሮማ ዔኪ ዓኣዴ፤ ኔኤም ታ ዲንጌሢጉዴያ ጋፒንፃ ሙኬ ዓሢማኣ ታ ዲንጋኒ ኮዓኔ።።

15 ታኣኒ ታ ሚኢሾና ኮዔ ባኣዚ ማዳኒ ዳንዳዑዎዓዳ? ጊንሣ ሃሣ ሚጨጎታያ ታ ማዔሢሮ ኔና ቁኢሪሻ?»

16 «ዩያር ቤርታ ማዔ፡ ጎኡሶ ማላ ሚርጌ ዓሳ ጊንሢም፤ ጊንፃ ዓቴ ላቤያ ማላ ሚርጌ ዓሳ ቤርቲም ማዓንዳኔ» ጌዔኔ።።

20:8 ሊዊ. ዓኬ 19:13፤ ላሚ. ዎማ 24:15። 20:16 ማቴ. 19:30፤ ማር. 10:31፤ ሉቃ. 13:30።

ዩሱስ ዒዛ ሄላንዳ ሜታሢ ዛሎ ሃሣ ኬኤዜሢ
(ማር. 10:32-34፤ ሉቃ. 18:31-34)

17 ዩሱስ ዩሩሳሌም ዓኣዲያይዳ ዓኣዶ፡- ታጾ ለምዖ ዒዛኮ ጊንዖ ሃንታዞንሢ ሌሊ ዲማሲ፡

18 «ሃኣዛጉዋቲ፣ ሃሢ ኑ ዩሩሳሌም ዓኣዲይ፤ ዓሲኮ ናዓሢ ቄኤሶኮ ሱኡጎና ሙሴ ዔርዜ ዋጎ ዔርዛ ዓሶናም ዓኣሢንቲ ዒንጊንቲም ዔያታ ዒዛ ሃይቃንዳጉዲ ጌዒ ጌሰቲ ዋጋንዳይ፤

19 ዔያታ ቦሃንዳጉዲና ዠራጋና ጳርቃንዳጉዲ ሃሣ ሱፃንዳጉዲ ዓይሁዴ ማዒባኣ ዓሶም ዓኣሢ ዒንጎንዳይ፤ ዩካፓ ሃይቁ፣ ሃይባፓ ሃይሣሳ ኬሎና ዒ ዔቃንዳይ» ጌዔይ።

ዜብዲዮሴ ማቾኮ ፔ ናኣቶ ዛሎ ዖኦጪዖ
(ማር. 10:35-45)

20 ዩካፓ ዜብዲዮሴ ማቾ ፔ ናኣቶና ዋላ ዩሱስ ኮይላ ሙኪ ዒዛም ጉምዓቲ ዚጋዖ ፔቲ ባኣዚ ዒዛም ማዲንታንዳጉዲ ሸኢቄይ።

21 ዩሱሱ፡- «ዓይጌንዴ ኔ ኮዓይ?» ጌዔይ።

ዒዛ፡- «ኔ ካኣቲም ቤዛ ሃንሢ ታኣኮ ለምዖ ናኣቶንሢ፡- ፔቲሢ ኔኤኮ ሚዛቃ፣ ፔቲሢ ኔኤኮ ሻውሎ ዛላ ኔኤና ዋላ ዋይሣያ ማዓንዳጉዲ ማሃ ዴይሢ!» ጌዔይ።

22 ዩሱሱ ጋዓንቲ፤ «ዓይጎ ሸኢቆንደቲያ ዒንሢ ዔሩዋሴ፤ ታኣኒ ሃሢ ዑኬ ዔካንዳ ሜታሢ ዒንሢ ዔካኒ ዳንዳዓ? ሃሣ ታ ጌላንዳ ሜታሰካ ዒንሢ ጌላኒ ዳንዳዓንዳ?» ጋዓዛ፣ ዔያታኣ፡- «ሂዮ፤ ኑ ዳንዳዓንዳይ» ጌዔይ።

23 ዩካፓ ዩሱሱ፡- «ጎኔ ዒንሢ ታ ዔካንዳ ሜታሢ ዔካንዳይ፤ ጋዓንቲ ታኣኮ ሚዛቆና ሻውሎናይዳ ዴዒ ታኣና ዋላ ዋይሣንዳጉዲ ማሃሢ ታናቲዋሴ፤ ዩይ ቤዛ ዒንጊንታሢ ታ ዓዴ ጊኢጊሼዞንሢ» ጌዔይ።

24 ዩማና ዓቲ ታጾ ዒዛኮ ጊንዖ ሃንታዞንሢ ዩያ ዋይዜ ዋዶና ለምዖንሢ ዑፃ ጎሪንቲይ።

25 ዩሱሱ ጋዓንቲ ቢያሢ ፔ ባንሢ ዔኤላዖ፡- «ዓይሁዴ ማዒባኣ ዓሶኮ ሱኡጎንሢ ዴሮ ዋይሣዞንሢኬ፤ ዩያጉዲ ዴሮ ሱኡጎንሢኮ ዴሮ ዑፃ ቢታንቶ ዓኣሢ ዒንሢ ዔራይ።

26 ዒንሢ ባኣካ ጋዓንቲ ያዲ ማዓንዳያ ኮይሱዋሴ፤ ዒንሢዳፓ ባሽ ማዓኒ ኮዓሢ ዒንሢኮ ዴማ ማዲያ ማዖንጎ።

27 ዒንሢዳፓ ዑፃ ማዓኒ ኮዓሢ ዒንሢኮ ዴማ ዓይሌ ማዖንጎ።

28 ዓሲኮ ናዓሢ ዓሲ ዒዛም ማዳንዳጉዲቱዋንቱ፣ ዓሲም ማዳኒና ሸምፓሢ ፔኤሲ ሚርጌ ዓሶ ዛሎ ባይዛኒ ሙኬኔ» ጌዔኔ።

ዓኣፒ ባይቄ ላምዖ ዓሲሰኬንሢኮ ዓኣፖ ፖዒዖ
(ማር. 10:46-52፤ ሉቃ. 18:35-43)

29 ዩሱሴና ዒዛኮ ጊንዖ ሃንታዞንሢና ዒያርኮይዳፓ ኬሰኪ ዓኣዳኣና ሚርጌ ዴሬ ዒዛና ዋላ ዓኣዳኔ።

30 ዒኢካ ላምዖ ዓኣፒ ባይቄ ዓሲ ጎይዖ ዓጩ ዴዒ ዓኣዖ፣ ዩሱሴ ዒኢኣና ዓኣዳሢ ዋይዚ፡- «ዳውቴ ናዓሢዮ፣ ጎዳ! ኑና ማኣዴ!» ጌዒ ጌዒ ዒላቴኔ።

31 ዴራ ዒማና ዚቲ ጋዓንዳጉዲ ዔያቶ ጎራዛ፣ ዔያታ ጋዓንቲ ኮሺ ዴጊዲ፡- «ዳውቴ ናዓሢዮ፣ ጎዳ፣ ኑና ማኣዴ!» ጌዔኔ።

32 ዒማና ዩሱሴ ዴንዲቤቃ ዔቃዖ፣ ዔያቶ ዔኤሊ፡- «ዓይጎ ታ ዒንሢም ማዳንዳጉዲ ዒንሢ ኮዓይ?» ጌዔኔ።

33 ዔያታ ማሃዖ፡- «ዓኣፓ ኑኡኮ ዛጋንዳጉዲ ኑ ኮዓኔ» ጌዔኔ።

34 ዩሱሴ ዔያቶ ሚጨንታዖ፣ ዓኣፖ ዔያቶኮ ፔ ኩጮና ካኣማዛ ቤዘማና ዛጊ ዒዛ ጊንዖ ዔያታ ዓኣዳኔ።

21

ዩሱሴኮ ዴኤፖ ቦንቾና ዩሩሳላሜ ጌሊዖ
(ማር. 11:1-11፤ ሉቃ. 19:28-40፤ ዮሃ. 12:12-19)

1 ዩሱሴና ዒዛኮ ጊንዖ ሃንታዞንሢና ዩሩሳላሜ ሄላኒ ዑካዖ፣ ዛይቶ ሪሚቶ ዲኮ ኮይላ ዓኣ ቤቴፓጌ ጌይንታ ጉርዶ ሄሌኔ። ዩካፓ ዩሱሴ ዒዛኮ ጊንዖ ሃንታዞንሢዳፓ ላምዖንሢ፡-

2 «ሃና ሴኮ ቤርታ ዓኣ ጉርዴሎ ዓኣዲዋቴ፤ ዒኢካ ዒንሢ ሄሄላዖ ፔቴ ቴኡቴ ዓኣ ሃሬ ናዖና ዋላ ዴንቃንዳኔ፤ ዩያር ዩማ ሃርማ ቡሊ ዔኪ ታኣም ዩዑዋቴ።

3 ዖኢኒያ ዒንሢ ኮራ ዔኤቢ ጌዔቶ ሳዳ ዔያቶ ኮዓኔ ዒንሢ ጋዓዛ ቤዘማና ዔያታ ዳካንዳኔ» ጌዒ ዳኬኔ።

4 ዩይ ያዲ ማዓኒ ዳንዳዔሢ ዖኢሲ ማሊዖ ኬኤዛሢ ዛሎና፡-

5 «ሚዛጺ ዉዴር ናይ ማላ ዩሩሳላሜ ካታሜሎዎ

ሃይሸ ኔኤኮ ካኣታሢ ሚጨንታዖ ማዒ

ሃሬሎ ሃሃ ሃሬሎኮ ናዖ ቶጊ

ኔ ባንሢ ሙካኔ ጎዑዋቴ» ጌይንቲሢ ኩማንዳጉዲኬ።

6 ዩያር ዒዛኮ ጊንዖ ሃንታዞንሢ ዩሱሴ ዓይሢ ጎይዖ ማዳኔ።

21:5 ዛካ. 9:9።

7 ሃረሎቅ ናዖማና ዋላ ዔኪ ሙካዖ ፔኤኮ ዓፒሎ ዔያታ ሃሮንሢ ዑፃ ጌሣዛ ዬሱሴ ቶጌኔ።

8 ዬማና ዴሮይዳፓ ሚርጌሢ ዓፒሎ ፔኤኮ ጎይፃ ሂኢሣዛ፥ ዛላ ሃሣ ዋላሺ ሜንሢ ሜንሢ ጎይፃ ሂኢሣኔ።

9 ዒዛኮ ቤርታ ቤርታ ዓኣዳ ዓሶና ገንፆ ሙካ ዓሳ፡- «ዳውቴ ናዓሢም ጋላታ ማዖንጎ! ጎዳ ሱንፆና ሙካሢ ፆኦሲ ዓንጅንጎ! ጋላታ ጫሪንጮይዳ ፆኦሲም ማዖንጎ» ጌዒ ጌዒ ዒላታኔ።

10 ዬሱሴ ዬሩሳሌሜ ካታሞ ጌሌ ዋዶና ዓሳ ጉቤ፡- «ሃይ ዖናዳይ?» ጌይሢና ዋኦቶንዶ ጎይሢ ባይዘኔ።

11 ዒዛና ዋላ ሙካ ዓሳ፡- «ሃይ ጌሊላይዳ ዓኣ፥ ናዚሬቴ ካታሜሎይዳፓ ሙኬያ፥ ፆኦሲ ማሊፆ ኬኤዛ ዬሱሴኬ» ጌዔኔ።

ዬሱሴ ጌኤዢ ማኣራ ማዳ ባኮ
(ማር. 11:15-19፤ ሉቃ. 19:45-48፤ ዮሃ. 2:13-22)

12 ዬካፓ ዬሱሴ ጌኤዢ ማኣሪ ጌሊ፥ ጌኤዢ ማኣሮ ጋሮይዳ ሻንቻ ዓሶና ሻንቻ ዓሶና ዳውሲ ኬሴኔ፤ ሃሣ ሚኢሾ ላኣማ ዓሶኮ ዴጌ ሎኦኸ ፆይቶና ዶኦሎ ሻንቻ ዓሶኮ ዴፆ ፆይቶ ሂዒ ዶይሳዖ፡-

13 « <ማኣራ ታኣኮ ሺኢጲሢ ማኣሪ ጌይንታንዳኔ> ጌይንቲ ፃኣፒንቲኔ፤ ዒንሢ ጋዓንቲ <ዉሲ ዓኣሺንታ ቤሰ> ማሄኔ» ጌዔኔ።

14 ዒማና ጌኤዢ ማኣሮይዳ ዓኣፓ ባይቁ ዓሶንታ ዋሶ ዓሶንታ ዒዛ ኮራ ሙካዛ ዒዚ ዔያቶ ፓሢኔ።

15 ጋዓንቲ ቁኤሶኮ ሱኡጎና ሙሴ ዔርዜ ዋጎ ዔርዛዘንሢና ዬሱሴ ማዳ ፆኦሲ ዋልቁና ማዲንታ ዓኮ ባኮ ዛጌሢሮ ሃሣ «ዳውቴ ናዓሢም ጋላታ!» ጌዒ ጌዒ ዒላታ ናኣቶ ዋይዜሢሮ ሚርጌና ዳጋዴኔ።

16 ዔያታ ዬሱሴ ኮራ፡- «ሃይ ናኣታ ጋዓ ባኮ ኔ ዋይዙዋዓዳ» ጌዔኔ።

ዬሱሴ ማሃዖ፡- «ሂዮ፥ ታ ዋይዛኔ፤ ጌኤዢ ማፃኣፖይዳ ሩኮ ናኣቶንታ ዳንቃ ናኣቶንታ ኔና ጋላታንዳጉዲ ኔ ማሄኔ» ጋዓሢ ዒንሢ ፔቴታፆ ናባቢባኣዳዳ?» ጌዔኔ፤

17 ዬካፓ ዬሱሴ ዔያቶ ሃሺ ካታማፓ ኬሰካዖ፥ ቢታኒያ ጌይንታ ጉርዶ ዴንዲ ዒኢካ ዋርቁኔ።

ዬሱሴ ጋዳንቁ ቤሌሴ ጌይንታ ሚፃሎ
(ማር. 11:12-14፤20-24)

21:9 ዓይኑ. 118:25-26። 21:13 ዒሲ. 56:7፤ ዔር. 7:11። 21:16 ዓይኑ. 8:2።

18 ዚሮ ጉቴሎ ዩሱሴ ጉቴ ዓማ ሃንጋ ካታሞ ማዒ ሙኪቤቃ ናይዲንቴኔ፤

19 ዒማና ጎይያ ዓጮይዳ ፔቴ ቤሌሴ * ሚሢ ዳንቃያ ዒዞ ባንሢ ዳንዲ፣ ዒሊሺዳፓ ዓታዛ ፔቴታያ ዓኣፒ ዳንቁባአሢሮ፡- «ሃይፓ ሴካ ዓኣፒ ዓኣፒፕ!» ጋዓዛ፣ ቤሌሶ ሚጻላ ዩካፓ ኔጉሞያ ሃይቁኔ።

20 ዒዛኮ ገንያ ሃንታዞንሢ ማዔ ባኮ ዛጋያ ዲቃቲ ሄርሺሢሮ፡- «ቤሌሶ ሚጻላ ሞይቲ ዑኩና ሃይቃኒ ዳንዳዔይ?» ጌዔኔ።

21 ዩሱሴ ማሃያ፡- «ጎኔ ታ ዒንሢሞ ጋዓኔ፤ ዒንሢኮ ጉሙርቁሢ ዓኣቶ ሃሢ ማዓንዳሞ ማዒንዳሞይ» ዒንሢ ጌይባኣቶ ቤሌሶ ሚጻሎይዳ ማዔ ባኮ ማዳኒ ሌሊቱሞንቴ ሃያ ዳኮ ሃይካፓ ዔቁ ባዞ ጌሌ» ዒንሢ ጌዔቴታያ ማዓንዳኔ፤

22 ዒንሢኮ ጉሙርቁሢ ዓኣቶ ዒንሢ ሺኢቃ ባኮ ቢያ ዒንሢ ዳንቃንዳኔ» ጌዔኔ።

**ዩሱሴኮ ቢታንቶ ዛሎ ያኦጪንቴ ያኦጪሢ
(ማር. 11:27-33፤ ሉቃ. 20:1-8)**

23 ዩሱሴ ጌኤዦ ማኦር ጌሊ ዔርዚያይዳ ዓኣንቴ ቁኤሶኮ ሱኡጎና ዴሮኮ ጪሞና ሙካያ፡- «ሃያ ቢያ ኔ ማዳ ባኮ ማዳሢ ዓይጎ ቢታንቶናዳይ? ሃያ ቢታንቶ ኔኤም ዒንጌሢያ ያናዳይ?» ጌዒ ዒዛ ያኦጪኔ።

24 ዩሱሴ ማሃያ፡- «ታኣኒያ ፔቴ ባኣዚ ዒንሢ ያኦጪንዳኔ፤ ዩኖ ዒንሢ ታኣም ማሄቶ ታኣኒ ሃያ ባኮ ዓይጎ ቢታንቶና ማዳቴ ዒንሢሞ ኬኤዛንዳኔ፤

25 ማሰካ ዮሃኒሴኮ ሞኣያና ማሰኪያ ዓንካፓዳይ? ያኦሲዳፓሞ ዓሲዳፓዳይ?» ጌዔኔ።

ዩያሮ ዔያታ ሞላ ጌሰታያ፡- «ያኦሲዳፓኬ» ኑ ጌዔቶ ሂዳያ ዒንሢ ዓይጎር ዒዛሲ ጉሙርቁባኣይ? ዒ ጋዓንዳኔ፤

26 «ዓሲዳፓኬ» ኑ ጌዔቶ ሃሢ ማሰካ ዮሃኒሴ ዓሳ ያኦሲ ማሊሢ ኬኤዛ ዓሲ ማሂ ዛጋሢሮ ዴራ ኑና ዒጊቻኔ» ጌዔኔ።

27 ዩካፓ ዔያታ ዩሱሴም፡- «ኑኣኒ ዔሩሞስ» ጌዒ ማሃዛ፣ ዒዚያ፡- «ታኣኒያ ሂዴቶ ዓይጎ ቢታንቶና ሃያ ቢያ ማዳቶ ዒንሢሞ ኬኤዛዓኬ» ጌዔኔ።

ዓይሢንቴሢ ዛላ

* 21:19 ቤሌሴ ጌይንታ ሚጻላ፡- ቦኣቢ ማላያ ዓኣፖ ዓሲ ሙሙዓ ሚሢኪ።
21:21 ማቴ. 17:20፤ 1ቆሮ. 13:2።

28 ዩካፓ ዩሱሴ፡- «ሂንዳ ዲንሂሂሞ ዓይጎ ማላቶዎ? ፔቴ ባኣዚ ታ ዲንሂሂሞ ከኤዘም፤ ፔቴ ዓሲኮ ላምዎ ናይ ዓኣኔ፤ ዔያቶይዳፓ ፔቴሂ ኮራ ዓዳሂ ሙካዎ ታ ናዓሂዮ! ሃኖ ጎዡ ዴንዲ ማዶ ማዴ» ጌዔ።

29 ናዓሂ «ዴንዳዓ፣ ዲዩኔ» ጌዔ፤ ያዲ ዲ ጌዔዎ ጊንፃፓ ደቢንቲ ማዔሂ ዔሪ፣ ማዶ ማዶኒ ዴንዴ።

30 ሃሃ ዓዳሂ ባጎ ናዓሂ ኮራ ዴንዳዮ፣ ዲዚያ ዴንዲ ማዶንዳጉዲ ዓይሃዛ ናዓሂ «ዔኤዔ፣ ታ ዓኣዳንዳኔ» ጌዔ፤ ጋዓንቲ ማዶኒ ዴንዲባኣሴ።

31 ዓካሪ ዩንሂ ላምዎ ናኣቶንሂዳፓ ዓዶኮ ዓይሂዎ ኩንሂሂሂ ዎያዳይ?» ጋዓዛ፣ ዔያታ፡- «ቤርታኣ ናዓሂሹ!» ጌዔ።

ዩሱሴያ ማሃዮ፡- «ጎኔ ታ ዲንሂሂሞ ጋዓ፤ ኮርሞ ዓሶፓ ሚኢሹ ቡኩሳ ዓሶና ዓኒ ሃሃ ማቾ ማዒባኣ ዓሶና ላሃ ዓሳ ያኣሲ ካኣቱሞይዳ ዲንሂሂ ቢሪ ጌላንዳኔ፤

32 ማሰካ ዮሃኒሴ ጌኤሹሞ ጎይሂ ዲንሂ ደዋኒ ዲንሂ ኮራ ሙካዛ ዲንሂ ዲዛሲ ጉሙርቂ ዔኪባኣሴ፤ ሚኢሹ ቡኩሳ ዓሶና ዓኒ ሃሃ ማቾ ማዒባኣ ዓሶና ላሃ ዓሳ ጋዓንቲ ጉሙርቂ ዲዛሲ ዔኬ። ዲንሂ ዩያ ዛጌሂኮ ጊንፃኣታዎ ጎሞ ዲንሂኮ ቡኡዲ ጎናሲ ዲዛሲ ዔኪባኣሴ።»

ዎይኖ ጎዡ ጎሽካ ዓሶ ኮኣኪንሃ
(ማር. 12:1-12፤ ሉቃ. 20:9-19)

33 ሃሃ ዩሱሴ ሜሌ ማሊሂ ኮኣኪንሂና፡- «ፔቴ ዎይኔ ጎሺ ዓኣ ዓሲ ጎዡኮ ቲኢያ ዲርቂ፣ ዎይኖ ጩኡጶንዶ ዔቴያ ላሌ ሹቹዳ ቦኣኪ ኮሼ፤ ሃሃ ካፒዎም ማዓ ሴኤላኣ ሴኤሊ፣ ዩካፓ ጎዡ ዲዛማኣ ጎሽካንዳ ዓሲም ዲንጊ ሜሌ ዓጪ ዓኣዳ።

34 ዎይኖ ካፃ ዎይኖ ዲዛ ሄላ ዛሎ ዓሶ ኮይላፓ ዔኪ ዩዓንዳጉዲ ዲዛኮ ማዶ ዓሶ ጎሽካ ዓሶ ኮራ ዲ ዳኬ።

35 ጎሽካ ዓሳ ጋዓንቲ ዓሂኮ ማዶ ዓሶ ዓርቃዎ ፔቴሂ ጳርቂ፣ ባጋሂ ዎዲ ሃሃ ዓቴሂያ ሹቻ ዲይ ዑራ።

36 ዩይ፣ ጎዡኮ ዓዳሂ ላሚ ሃሃ ቤርታኣሲዳፓ ሚርጌ ዲዛኮ ማዶ ዓሲ ዳካዛ፣ ጎሽካ ዓሳ ሃሃ ቤርታ ማዶ ጎይዎ ማዶ።

37 ጋፒንዎይዳ ጎዡኮ ዓዳሂ ታኣኮ ናዓሂ ዔያታ ቦንቹዎዎ ዓታዓ! ጋዓዮ፣ ናዓሂ ፔኤኮ ጎሽካ ዓሶ ኮራ ዳኬ።

38 ጎሽካ ዓሳ ጋዓንቴ ናዓሢ ዴንቁ ዎድና ሃይ ዒዛ ደካላሢኬ፤ ሃሂ ሙኩዎቴ ዒዛ ኑ ዎዲ ዒዛኮ ዓኣ ባኮ ደካሎም፤ ዎሊ ኮይላ ጋዓዖ።

39 ናዓሢ ዓርቂ ጎዡኮ ዙላ ዔኪ ዴንዲ ዎዴኔ።

40 «ዓካሪ ዬኖ ጎዡሎኮ ዓዳሢ ሙካዖ ዬንሢ ጎሽካ ዓሶንሢ ዎዳንዳያ ዒንሢም ማለይ?» ጌዔኔ።

41 ዔያታ ማሃዖ፡- «ዬንሢ ፑርቶ ዓሶንሢ ሚጨንቱዎዖ ዒ ዎዎዳንዳኔ፤ ዎይና ካፄ ዎድና ቢያ ዒዛም ዒንጋንዳ፤ ሜሌ ጎሽካ ዓሶም ጎዡ ዒንጋንዳኔ» ጌዔኔ።

42 ዬካፓ ዬሱሴ፡-

« ማኣር ማዡ ዓሳ ቦሂ ሃሺ ሹጫሢ

ማኣርኮ ሄላሢ ማዔኔ።

ዬይያ ያኦሲ ማዳኔ፤

ኑ ዛጋዛ ዓኪ ባኣዚኬ»

ጌይንቴ ያኣፒንቴሢ ዒንሢ ፔቴታዖ ናባቢባኣዓዳ?

43 «ዬያሮ ታ ዒንሢም ሂዚ ጋዓኔ፤ ያኦሲ ካኣቱማ ዒንሢዳፓ ዔውቴ ዓኣፒ ዓኣፓ ዴሬም ዒንገንታንዳኔ። [

44 ዬያ ሹጫሢዳ ሎኦማሢ ማቃንዳኔ፤ ሃሃ ዬይ ሹጫሢ ዒዛ ዐፃ ዶዔ ዓሢያ ደኣፂንታንዳኔ» ጌዔኔ።]†

45 ዒማና ቁኤሶኮ ሱኡጎና ፔርሴ ዓሶና ዬንሢ ኮኦኪንሦንሢ ዎይዜ ዎድና ዬሱሴ ዔያቶም ጨርጌሢ ዔዔ፤

46 ዒዛ ዓርቂ ቱካሂ ኮዔኔ፤ ጋዓንቴ ዴራ ዬሱሴ ያኦሲ ማላሢ ኬኤዛያ ማሂ ዛጋሢሮ ዔያታ ዒጊጨ ሃሺኔ።

22

ዔፖ ሙዖም ዔኤሊንቴ ዓሶ ኮኦኪንሦ

(ሉቃ. 14:15-24)

1 ዬሱሴ ሃሃ ሜሌ ኮኦኪንሢ ኬኤዛዖ፡-

2 «ጫሪንጮ ካኣቱማ ናዓ ላኣሊ ዔካኣ ጌዔም፤ ሙኡዚ ገኢጊሺ ካኣቲሰኬያ ማለኔ።

3 ዬይ ካኣታሢ ዔኤሊንቴ ዓሶም ኬኤዛንዳጉዲ ዒዛኮ ማዳ ዓሶ ደኬኔ፤ ጋዓንቴ ዓሳ ዒኣካ ሙካሂ ኮይባኣሴ።

4 ዬካፓ ካኣቲ ላሚ ሃሃ ሜሌ ማዳ ዓሲ ዔኤሊንቴ ዓሶም፡- ሉዎ ጌመይንታ ሃሃ ማሌ ባይያ ታ ሹኪ ሙዖ ገኢጊሺኔ፤ ቢያ ባካ ገኢጌያ ማዔሢሮ ዔፖ ቤዞ፤ ታ ማኣሪ ሙኩዎቴ ጎዑዎቴ፤ ጌይ ደኬኔ።

21:42 ዓይኑ. 118:22-23። † 21:44 ፔቴ ፔቴ ማፃኣፓ ፓይ. 44 ጊዳ ቃሳኔ፤ ዒኣካ ዓኣ ማሊያ ሉቃ. 20:18 ጊዳ ዓኣዞ ማለኔ።

5 ዔኤሊንቴ ዓሳ ጋዓንቴ ዔኤሊያ ቦሂ ዛላ ጎሺዳ፤ ዓቴ ዓሳ ሃሃ ኮርሞይዳ ዓኣዳ፤

6 ሃንጎዎታ ሃሃ ኪኢቶና ሙኬ ዓሶንሂ ዓርቃያ ጳርቂ ቦርሲሲ ሃሃ ማታሲ ዎዲያ ዎዴ።

7 ዬያሮ ካኣታሂ ዳጋዳያ ፔኤኮ ፖኦሊሶ ዳኪ ዬንሂ ኪኢቶ ዓሶንሂ ዎዴዞንሂ ዎዲ ባይዚ ካታሞዎ ዔያቶኮ ታሚና ሚቹ።

8 ዬካፓ ካኣቲ ማዳ ዓሶም፡- ሩግ ሙዓ ገኢገንቴ፤ ዔኤሊንቴ ዓሳ ጋዓንቴ ኮይሱዎ ዓሲ ማዒ ጴዳሂሮ፤

9 ጎይያ ኬሰኪጋፓ ዳንቄ ዓሲ ቢያ ግግ ሙዎ ቤዞ ዔኤሊዎቴ ጋዓዛ፤

10 ማዳ ዓሳ ጎይያ ኬሰኪ ዳንቄ ዓሶ ኮፍንታ ፑርቶንታ ቢያሂ ቡኩሲ ዔፖ ማኣሮ ሾኦጭና ኩንሂ።

11 «ዬካፓ ካኣቲ ዔኤሊንቴ ሾኦጭ ዛጋኒ ጌሌ ዎዳና ፔቴ ዔፒ ማኣያ ማይንቲባኣ ዓሲ ዳንቃያ፤

12 ታ ቤኤሊ! ዔፒ ማኣያ ኔ ማይንቲዎዎ ሃይካ ጌላኒ ዎይቲ ዳንዳዔይ?» ጋዓዛ፤ ዓሂ ጋዓንቴ ዚቲዮ ጌዔ፤

13 ካኣቲ ማዳዞንሂም ሃያኮ ኩጭና ቶኮና ቱኪ፤ ኬሲ ካሮይዳ ዲሞ ቤዞ ኬኤሩዎቴ፤ ዒኢካ ዒ ዬኤኪ፤ ማታዲ ዓቺ ዳዓንዳ።»

14 «ሚርጌ ዓሲ ዔኤሊንቴ፤ ዶኦሪንቴ ዓሳ ጋዓንቴ ዳካኬ» ጌዔ።

ገኢራ ጨገሂ ዛላ ያኦጨንቴ ያኦጨሂ
(ማር. 12:13-17፤ ሉቃ. 20:20-26)

15 ዬካፓ ፔርሴ ዓሳ ኬሰኪ ዳንዲ፤ ዬሱሴ ጌሰታ ጌኤዞና ዎዲ ዔያታ ፒሪ ዓርቃንዳቴያ ዎላ ዘርታያ፤

16 ዔያቶኮ ገንያ ሃንታ ናኣቶና ሄሮዲሴ ዛላፓ ማዔ ዓሶና ዬሱሴ ባንሂ ዳኪ፡- «ዔርዛሂዮ! ኔኤኒ ጎኔ ዓሲ ሃሃ ያኦሲ ጎይያዎ ጎኦምና ዔርዛሂ ዬያጉዲ ሃሃ ያናኣ ኔ ዲማሱዎዎ፤ ቢያሂ ሄኮ ኔ ዛጋሂ ኦ ዔራ፤

17 ኦም ሂንዳ ኬኤዜ፤ ዓይጎ ኔኤም ማላይ? ሮሜ ዓጮ ካኣቲም ገኢራ ጨጎንዶም ሃሾንዶይ?» ጌዔ።

18 ዬማና ዬሱሴ ዔያቶኮ ጌሮ ማሊያ ዔራዎ፡- «ዒንሂ ዲሎቱዎዎ ፔና ዲሎኬ ጋዓ ዓሳ! ዓይጎሮ ጌኤሲና ታና ዒንሂ ፒራኒ ኮዓይ?

19 ገኢሮ ጨጎ ሚኢሾ ሂንዳ ታና ዳውዎቴ» ጋዓዛ፤ ዔያታ ፔቴ ሹቺ ቢራ ዒዛም ዔኪ ሙኬ።

22:13 ማቴ. 8:12፤ 25:30፤ ሉቃ. 13:28።

20 ይማና ዒዚ፡- «ሃኖ ሚኢሹሎይዳ ዓኣ ዓውካርና ፃእፕገጉ ሱንጎና ያኦርዳይ?» ጌዔኔ።

21 ዒያታ፡- «ሮሜ ዓጮ ካኣቲሲኬ» ጌዔኔ።

ይካፓ ዒዚ ማሃ፡- «ሂዴቶ ሮሜ ዓጮ ካኣቲሲ ካኣቲሞ፤ ያኦሲሲ ያኦሲሞ ዒንጉዋቲ» ጌዔኔ።

22 ዒያታ ይያ ዋይዛዎ ዲቃቲ ሄርሺ፣ ዒዛ ሃሺ ዴንዴኔ።

ሃይቄ ዓሲኮ ዔቂሂ ዛላ

(ማር. 12:18-27፤ ሉቃ. 20:27-40)

23 ዬኖ ኬሎና፡- «ሃይቄ ዓሲ ዔቂዋሴ» ጋዓ ሶዶቄ ዓሳ ዬሱሴ ኮይላ ሙኪ ሂዚ ጌዒ ያኦጮኔ፡-

24 «ዔርዛሂዮ! ሙሴ <ፔቴ ዓሲ ላኣሊ ዔካዎ ሾውዋዎ ሃይቄቶ፣ ጌኤዚ ሃይቄሂ ማቾ ዔኪ ዒዛ ዳካላ ናይ ሾጎንጎ» ጌዔኔ።

25 ኑ ኮይሎይዳ ዋሊኮ ጌርሲንሂ ማዓ ላንካይ ዓሲ ዓኣኔ፤ ይያቶኮ ቶይዳሂ ላኣሊ ዔካዎ ሾውዋዎ ሃይቄሞ ሄሌ ጌኤዛሂ ማቾ ዒዛኮ ዔኬኔ፤

26 ዬይ ዔኬሂ ቶይዲሞ ናይ ሾውዋዎ ሃይቄኔ፤ ዬያይዴ ጎይህ ላኣሊላ ላንካሳሂሞ ሄላዛ ዒዚያ ሾውዋዎ ሃይቄኔ።

27 ዬካፓ ጋፒንጎይዳ ላኣሊላ ሃይቄኔ።

28 ዓካሪ ቢያሂ ዒዛ ዔኬሂሮ ጋፒንጎና ሃይባፓ ዓሳ ዔቃኣና ዬና ዋያኮ ማቾ ማዓንዳይ?» ጌዔኔ።

29 ዬሱሴ ማሃ፡- «ዒንሂ ጌኤኮ ማፃኣፖና ያኦሲኮ ዋልቆና ዔሩዋኣሂሮ ዳቢንታኔ፤

30 ሃይቢዳፓ ዓሲ ዔቂሂኮ ጊንፃ ጫሪንጮይዳ ዓኣ ያኦሲ ኪኢታንቾጉዲ ማዓኔ፤ ዔኩዋሴ ሃህ ሎዑዋሴ።

31 ሃይቢዳፓ ዔቃ ዓሶ ዛሎ ያኦሲ ዒንሂሞ ኬኤዜሂ ዒንሂ ናባቢባኣዳ?

32 ዒዚ ታኣኒ ዓብራሃሜ ያኦሲ፣ ዩሳኣቄ ያኦሲ ሃህ ያይቆኦይ ያኦሲኬ» ጌዔኔ፤ ዬያሮ ያኦሲ ሸምፖና ናንጋ ዓሶ ያኦሲ፤ ሃይቄቶዋ ናንጊና ናንጋ ዓሶ ያኦሲኬ» ጌዔኔ።

33 ዴራ ዬያ ዋይዛዎ ዒዛኮ ዔርዚያና ዲቃቲ ሄርሺኔ።

ቢያፓ ባሽ ማዔ ዓይሂያ

(ማር. 12:28-34፤ ሉቃ. 10:25-28)

34 ዬሱሴ ሶዶቄ ዓሶ ጎጎንዶ ጎይሂ ባይዚሴሂ ዋይዛዎ ፔርሴ ዓሳ ፔቴይዳ ሙኪ ቡኬኔ፤

22:23 ዳኪ. ማዶ 23:8። 22:24 ላሚ. ዋማ 25:5። 22:32 ኬሲ. ማፃ 3:6።

35 ዲያቶይዳፓ ፔቴ ሙሴ ዋጎ ዔርዛስኬይ ዩሱሴ ዋዚ ጋዓቴያ ዋይዛኒ፡-

36 «ዔርዛሢዮ! ቢያፓ ባሼ ዓይሢጻላ ዋናዳይ?» ጌዒ ያኦጩኔ፤

37 ዩሱሴ ዒማና፡- « ጆኦሲ ኔኤኮ ጎዳ ጉቤ ዒናፓ፣ ጉቤ ሹምፓፓ፣ ጉቤ ማሊፃፓ ናሽኬ»

38 ቢያፓ ባሼ ማዔ ቤርታኣ ዓይሢፃ ዩኖኬ።

39 ሃሣ ዩኖ ማላ ላምዓሳ ዓይሢፃ ላሲ ቢያ ዓዳ ኔና ማሂ ናሽኬ» ጋዓኔ፤

40 ሙሴ ዔርዛ ዋጎና ያኦሲ ማሊፃ ኬኤዛዘንሢኮ ዔርዚፃ ዩንሢ ዓይሢፃ ጋራ ዓኣያኬ» ጌይ ማሄኔ።

ማሲሄ ዛሎ ያኦጩንቴ ያኦጩሢ
(ማር. 12:35-37፤ ሉቃ. 20:41-44)

41 ፔርሴ ዓሳ ቡኩንቴ ዓኣንቴ ዩሱሴ ዔያቶ ሂዚ ጌዒ ያኦጩኔ፤

42 «ማሲሄ ዛሎ ዒንሢ ዋዚ ጋዓይ? ዒ ያናይ ዒንሢም ማላይ?» ጋዓዛ፣ ዔያታ ማሃዮ፡- «ዒ ዳውቴ ናይኬ» ጌዔኔ።

43 ዩሱሴ ዔያቶም፡- «ሂዳቶ ዳውቴ ዓያና ጌኤሺ ዒዛ ማሊሴም፣ ታኣኮ ጎዳ» ጌዒ ዋይቴ ዒዛ ዔኤሌይ?

44 ዳውቴ ናንጊና ናንጋ ጎዳ ታ ጎዳሢም፡

ኔኤኮ ሞርኮ ታ ኔና ባሺሳንዳያ ሄላንዳኣና

ታኣኮ ሚዛቆ ዛላ ደዔ» ጌዔኔ።

45 ዩያሮ ዳውቴ ታ ጎዳሢ» ጌዒ ዒዛ ዔኤሌቶ ዋይቴ ዳውቴኮ ናይ ማዓኒ ዒ ዳንዳዓይ?» ዩሱሴ ጋዓዛ፡

46 ዒማና ፔቴታዮ ዔኤቢ ማሂ ኬኤዛኒ ዳንዳዔ ዓሲ ባኣሴ። ዩኖ ኬሎይዳፓ ዓርቃዮ ጫርቂ ዒዛ ዔኤቢ ያኦጩ ዓሲያ ባኣሴ።

23

ዩሱሴ ሙሴ ዔርዜ ዋጎ ዔርዛ ዓሶና ፔርሴ ዓሶና ቦሂ ጌሰቴ ጌኤዘ

(ማር. 12:38-40፤ ሉቃ. 11:39-51፤ 20:45-47)

1 ዩካፓ ዩሱሴ ዳሮና ዒዛኮ ጊንፃ ሃንታዘንሢዮም፡-

2 «ሙሴ ዔርዜ ዋጎ ዔርዛ ዓሶና ፔርሴ ዓሶናኮ ሙሴጉዲ ዋጎ ዔርዛኒ ቢታንቶ ዓኣኔ፤

3 ዩያሮ ዒንሢም ዔያታ ጋዓ ባኮ ማዲዋቴ፣ ሃሣ ካፑዋቴ፤ ጋዓንቴ ዔያታ ጋዓሢጉዲ ፔኤሮ ማዲዋኣሢሮ ዔያቶጉዲ ማዲፖቴ።

22:35 ሉቃ. 10:25-28። 22:37 ለሚ. ዋማ 6:5። 22:39 ሉዊ. ዓከ. 19:18።
22:44 ዓይኑ. 110:1።

4 ዔያታ ሚርጌ ዴኤሢ ሃሃ ሚታሳ ኩዲ ዓሲ ኩዲሳኔ፤ ዔያታ ፔኤር ጋዓንቴ ኩቻ ካኣማኒያ ኮዑቀሴ።

5 ዔያታ ማዳ ማዳ ቢያ ዓሲ ዛጎሞ ጌዲኬ፤ ዩያር ካኣዠ ዛሎ ባኮ ፻፳፮ ቶኣካ ሃሃ ቃሳ ቱኮ ዓፒሎቀ ዔያታ ኮሺ ዳልጊሻኔ፤ ሃሃ ዓፒሎኮ ማጫርቀ ያደሳኔ፤

6 ሙዖ ቤዘይዳ ቦንቹንታ ቤሲ፣ ዓሳ ቡኪንታ ቤዘይዳኣ ቤርቶ ዛላ ዴዓኒ ኮዓኔ።

7 ዩያጉዲ ሃሃ ቦኣኮ ባኣኮይዳ ኮሺ ዔኤለሢ ዔኤለንታኒና ሩርርዛሢ ጌይንቴ ዔኤለንታኒያ ኮዔኔ።

8 ዓኒሢ ጋዓንቴ ሄርሺንቴር ሩርርዛሢ ጌይንቴ ዔኤለንቴ፣ ዓኒሢኮ ሩርርዛሢ ፔቴ ሌሊ ማዓዛ ዓኒሢሢ ቢያሢ ዋሊኮ ጌርሲንሢከ።

9 ጫሪንጮይዳ ዓኒሢኮ ፔቴ ዓዴ ሌሊ ዓኣሢር ሳይይዳ ያና ማዔቶዋ ያኦሲ፣ ባሺ ማሂ ሩዴ ጌይ ዔኤለ፣።

10 ዓኒሢኮ ባሺ ዔራሢያ ኪሪሰቶሴ ሌሊ ማዔሢር ሳሺ ዔራሢ ጌዒ ዔኤለንቴ፣።

11 ዓኒሢ ባኣካ ቢያ፣ ዑሃ ዓኣዴ፣ ሱኡጌ ማዔሢ ዓኒሢኮ ዴማ ማዒ ማዳያ ማዖንጎ።

12 ፔና ዴጊዳሢ ዳውሲንታንዳኔ፤ ፔና ሄርኪዳሢ ጋዓንቴ ዴግ ጋዓንዳኔ» ጌዔኔ።

13 ሃሃ ዩሱሴ፡- «ዓኒሢ፣ ዲሎቱዋ፣ ፔና ረሎኬ» ጋዓ ሙሴ ዔርዜ ዋጎ ዔርዛ ዓሳና ፔርሴ ዓሳ! ዓሳ ጫሪንጮ ካኣቱሞይዳ ጌሎቱዲ ዓሳኮ ካር ዓኒሢ ዋዳሢር ዓኒሢና ባዴዔ! ዓኒሢ ዓኒሢር ጌሎቱ፤ ሃሃ ጌላኒ ኮዓ ዓሳቀ ዓኒሢ ጌልዙቀሴ።

[14 «ዓኒሢ ዲሎቱዋ፣ ፔና ረሎኬ» ጋዓ፣ ሙሴ ዔርዜ ዋጎ ዔርዛ ዓሳና ፔርሴ ዓሳ ዓኒሢ ባዴዔ! ዓኒሢ ሃይቁ ላኣሎኮ ማኣር ዓኒሢ ቡራያታ፣ ዓሲ «ያኦሲ ሺኢቃኔ» ዓኒሢ ጎዖንጎ ጌዒ ያደሲ ሺኢጲሢ ዓኒሢ ሺኢቃኔ፤ ዩያር ፑርታ ዋጌ ዓኒሢዳ ዋጊንታንዳኔ።]*

15 «ዓኒሢ ዲሎቱዋ፣ ፔና ረሎኬ» ጋዓ፣ ሙሴ ዔርዜ ዋጎ ዔርዛ ዓሳና ፔርሴ ዓሳ! ፔቴ ዓሲ ዓይሁዴ ካኣዠ ካኣሸኪሳኒ ባዞ ዋኣያና ሳያናይዳ ዓኒሢ ሃንቴ፣ ካኣዠኣ ጌልዜሢ ጊንፃ ዓኒሢዳ፣ ባሺና

23:5 ማቴ. 6:1፤ ፓይ. ማፃ 15:38፤ ላሚ. ዋማ 6:8። 23:11 ማቴ. 20:26-27፤ ማር. 9:35፤ 10:43-44፤ ሉቃ. 22:26። 23:12 ሉቃ. 14:11፤ 18:14። * 23:14 ፔቴ ፔቴ ማፃ፳፣ 14 ጌዳ ቃሳኔ፤ ቃኣሌላ ማር. 12:40 ጌዳ ዓኣዞ ማላኔ።

ጋገንዎ ከሌ ፑርታና ዬይ ዋገንታንዳጉዲ ዲንሢ ማሃሢሮ ዲንሢ ባዴዔቴ።

16 «ሃይ፡ ዲንሢ ዓኣፖ ባይቄ ዓርኖ ማዔ ዓሳ! ዲንሢና ባዴዔ፡ ሩሲ ጌኤዢ ማኣሮ ዔኤሊ ጩኣቄቴ ዔኤቢባኣሴ፤ ጋዓንቴ ጌኤዢ ማኣሮኮ ዋርቆ ዔኤሊ ጩኣቄቴ ቶላ ካራ ባኣሴ» ዲንሢ ጋዓኔ፤

17 ዲንሢ ዔኤያ ሃሃ ዓኣፖ ባይቄ፡ ዓርኖ ማዔ ዓሳ! ዋርቆና ዋርቃ ያኣሲም ዲማዴያ ማዓንዳጉዲ ማሃ ጌኤዢ ማኣሮናይዳፓ ዋና ባሼዳይ?

18 ዬያጉዲ ሃሃ ሩሲ ያኣሲም ሚቺ ዲንገ ካኣሽኮ ቤዘ ዔኤሊ ጩኣቄቴ ዔኤቢባኣሴ፤ ጋዓንቴ ያኣሲም ሚቺ ዲንጎ ቤዘይዳ ዓኣ ዲንጎና ባኮ ዔኤሊ ጩኣቄቶ ቶላ ካራ ባኣሴ» ዲንሢ ጋዓኔ።

19 ሃይ ዲንሢ ዓኣፖ ባይቄ ዓሳ! ያኣሲም ዲንጎ ባኮና ዲንጎ ባኮ ዲማዴያ ማሃ ሚቺ ዲንጎ ቤዘናይዳፓ ዋና ባሼዳይ?

20 ዬያሮ ያኣሲም ዲንጎ ባኮ ዲንጎ ቤዘ ዔኤሊ ጩኣቃሢ ዲንጎ ቤዘና ዲዘ ዑፃ ዓኣ ዲንገንቴ ባኮ ቢያሢ ዔኤሊ ጩኣቃኔ።

21 ጌኤዢ ማኣሮ ዔኤሊ ጩኣቃሢ ጌኤዢ ማኣሮና ጋርይዳ ናንጋ ያኣዘሢና ዔኤሊ ጩኣቃኔ።

22 ጩሪንጮ ዔኤሊ ጩኣቃሢ ያኣሲ ዴዔ፡ ካኣቱዋ ያይቶንታ ዒኣካ ዴዔሢንታ ዋላ ዔኤሊ ጩኣቃኔ።

23 «ዲንሢ ዲሎቱዋፖ ፔና ዲሎኬ ጋዓ፡ ሙሴ ዋጎ ዔርዘ ዓሶና ፔርሴ ዓሳ፡ ዲንሢ ባዴዔቴ! ዳኮ ዲማ ዲማ ሳዉቃ ጴኤሽይዳፓ ቢያታጳይዳፓ ፔቴማ ዲንጎ ዋጎና ዲንሢ ዲንጋኔ፤ ጋዓንቴ ዓይሢንቴ ዋጎ ጌዳ ዓኣ ጴኤፖ ባኮ ዲንሢ ሃሻኔ፤ ዬይ፡ ፒዜ ዋገሢ፡ ዳቤሢም ዓቶም ጌይሢና ጉሙርቂንቲሢናኬ፤ ዬያቶ ዲንሢ ቦሃኔ። ዬንሢ ዳኮ ባኮንሢ ዲንሢ ሃሽባኣፖ ዬያ ባኮዋ ዲንሢ ማዳንዳያ ኮይሳኔ።

24 ዲንሢ ዓኣፖ ባይቄ፡ ዓርኖ ማዔ ዓሳ! ዑሽካ ባኮይዳፓ ዉናጉዴ ዳኮ ባኮ ዲንሢ ኬሲ ኬኤራኔ፤ ጋኣላሢጉዴ ጴኤፖ ባኮ ጋዓንቴ ዲንሢ ዔኤዲ ዔኤዳኔ።

25 «ዲንሢ ዲሎቱዋፖ ፔና ዲሎኬ ጋዓ ሙሴ ዋጎ ዔርዘ ዓሶና ፔርሴ ዓሳ፡ ዲንሢና ባዴዔ፤ ዋኣፖ ዑሽኮ ዓንዶና ካሃ ሙዎ ዓንዶናኮ ዙሎ ዲንሢ ማሰኪ ጌኤሻኔ፤ ጋራ ጋዓንቴ ቡሪሢና ዲኤዲሞና ዲንሢኮ ኩሜያኬ፤

26 ሃይ ኔ ዓኣፖ ባይቄ ፔርሴ ዓሢ! ቤርታዲ ዋኣፖ ዑሽኮ ዓንዶና ካሃ ሙዎ ዓንዶናኮ ጋር ማሰኪ ጌኤሽ፤ ዬያይዴቶ ዓኣሪ ዙሎ ዘላኣ ጌኤሽ ማዓንዳኔ።

23:22 ዲሲ. 66:1፤ ማቲ. 5:34። 23:23 ሊዊ. ዓኬ 27:30።

27 «ዲንሢ ሃይ ዲሎቱዋዎ ፔና ዲሎኬ ጋዓ፥ ሙሴ ዋጎ ዔርዘ ዓሶና ፔርሴ ዓሳ! ዙሎ ዛላ ቦኑሪንቶና ማኔቲ ሚዛጲሶናያ ጋራ ጋዓንቴ ሃይቄ ዓሲ ማጌሢና ሌሲና ኩሜያ፥ ዲኡፒ ዲንሢ ማላሢሮ ዲንሢና ባዴዔቴ!

28 ዲንሢ ዙሌና ዓሶም ጌኤሺ ማላኔ፤ ጋራ ዲንሢኮ ጋዓንቴ ሄርሺንቴና ፑርቱሞና ኩሜያኬ።

29 «ዲንሢ ዲሎቱዋዎ ፔና ዲሎኬ ጋዓ፥ ሙሴ ዋጎ ዔርዘ ዓሶና ፔርሴ ዓሳ ዲንሢና ባዴዔ! ያኦሲ ማሊያ ኬኤዛ ዓሶኮ ዲኡፖ ከልቁ ኮሺ ኮሺ፥ ሃሣ ጌኤዡ ዓሶኮ ዲኡፖ ፓልሚሲ ኮሺ ኮሺ።

30 ኦ ዓድንሢ ዋድናታቴ፥ ያኦሲ ማሊያ ኬኤዛ ዓሶ ዋዲያይዳ ኑ ጌላዓኬ ዲንሢ ጋዓኔ።

31 ሃይሾ ሃሢ ዲንሢ ያኦሲ ማሊያ ኬኤዛ ዓሶ ዋዴ ዓሶኮ ናኣቶ ማዒያ ዲንሢሮ ዲንሢ ማርካዳኔ።

32 ዬያሮ ዓድንሢ ዲንሢኮ ዓርቄ ዛኣሮ ዲንሢ ዑዑሩዋቴ!

33 ሃይ ዲንሢ ሸኣዥ፥ ሸኣዥኮ ናኣታ ዲንሢ ሃይ! ጋፒንያ ታሞ ዋጎይዳፓ ዋይቲ ዲንሢ ቶላንዳይ?

34 ዬያሮ ያኦሲ ማሊያ ኬኤዛ ዓሶ፥ ዔሮ ዓሶንታ ዋጎ ዔርዘ ዓሶ ዲንሢ ባንሢ ታ ዳካንዳኔ፤ ዔያቶይዳፓ ፔቲ ፔቲሢ ዲንሢ ዋድንዳኔ፤ ሃሣ ፔቲ ፔቲዞንሢ ዲንሢ ሱፃንዳኔ፤ ዓቲዞንሢ ሃሣ ዲንሢኮ ቡከንቶ ቤዞይዳ ዢራፓና ዲንሢ ጸርቃንዳኔ፤ ዔያቶ ዓዲ ፔቲ ካታማፓ ማሌ ካታማ ዲንሢ ዳውሲ ዳካንዳኔ፤

35 ዬያ ዛሎና ጌኤዣሢ ዓኣቤኤሌ ሃይቦይዳፓ ዓርቃዎ ጌኤዡ ማኣሮና ያኦሲም ዲንጎ ባኮ ሺኢሾ ቤዞናኮ ባኣካ ዲንሢ ዋዴ፥ ባራኪዮ ናኣዚ ዛካሪያሴ ሃይቦ ሄላንዳኣና ሳይይዳ ሃይቄ ጌኤዡ ዓሶኮ ሱጉያ ዛሎ ዲንጎንታ ሜቶ ዲንሢ ዔካንዳኔ።

36 ጎኔ ታ ዲንሢም ጋዓኔ፤ ዬይ ሜታ ሃኖ ዋድ ዓሶ ሄላንዳኔ» ጌዔኔ።

ዬሩሳሌም ላቲ ኬኤዞና ባኮ
(ሉቃ. 13:34-35)

37 ዬካፓ ዬሱሱ፦ «ዬሩሳሌም! ኔኤኒ ያኦሲ ማሊያ ኬኤዛዞንሢ ዋዴዜሌ፥ ሃሣ ኔ ባንሢ ያኦሲ ዳካ ከኢቶ ዓሶ ሹጮና ዲዓዜሌ! ኮይዳ ፔኤኮ ጋኣዘ ዴማ ናኣቶ ቡኩሲ ዓርቃሢ፡-ዲ ታኣኒ ኔ ናኣቶ ፔቲይዳ ቡኩሳኒ ሚርጌና ኮዔንቴ! ኔ ዬያ ዒፆኔ።

38 ዓካሪ ሃኣዛጉዋቴ፥ ያኦሲ ሃሺም ዲንሢኮ ጌኤዡ ማኣራ ባዓ ማዒ ዓታንዳኔ።

23:27 ዳኪ. ማዶ 23:3። 23:33 ማቲ. 3:7፤ 12:34፤ ሉቃ. 3:7። 23:35 ማዢ. ማፃ 4:8፤ 2ዮኦሲ. ዓሃኬ 24:20-21። 23:38 ዔ.ር. 22:5።

39 ታ ቢንሢሞ ጋዓኔ፡- ሳዳ ሱንጾና ሙካሢ ባንጂንቴያኩ» ቢንሢ ጋዓንዲያ ሄላንዳኣና ላሚ ቢንሢ ታና ዳንቃዓኩ» ጌዔኔ።

24

ጌኤዥ ማእራ ደዓንዳሢ ዩሱሴ ኬኤዘሢ
(ማር. 13:1-2፤ ሉቃ. 21:5-6)

1 ዩሱሴ ጌኤዥ ማእራፓ ኬሰኪ ዳንዳኣና ቢዛኮ ጊንጾ ሃንታናኣታ ጌኤዥ ማእራ ማዢንቴ ጎይጾ ዳዋኒ ቢዛ ኮራ ሙኩኔ።

2 ቢዛ ጋዓንቴ፡- «ሃያ ቢንሢ ሲያ ዛጋ? ጎኔ ታ ቢንሢሞ ጋዓኔ፤ ሃይ ሹጮና ኬልቁንቴ ማዢንቴ ማእራ ፔቴ ሹቺታጾ ዓቴዋንቴ ደዓንዳኔ» ጌዔኔ።

ዓጮኮ ጋፒንፃ ማዓንዳ ባኮ
(ማር. 13:3-13፤ ሉቃ. 21:5-6፤20-24)

3 ዩሱሴ ዛይቶ ሪሚቶ ዲኮይዳ ዳዒ ዓኣንቴ ቢዛኮ ጊንጾ ሃንታዘንሢ ሌሊ ቢዛ ኮይላ ሙካጾ፡- «ሂንዳ ኑሞ ኬኤዘ፤ ኔ ሃይ ጋዓ ባካ ሲያ ዓይዲ ማዓንዳይ? ኔኤኮ ማዒ ሙኪጾና ዓጮኮ ጋፒጾናኮ ማላታ ማዓንዳ ባካ ዓይጎዳይ?» ጌዔኔ።

4 ዩሱሴ ማሃጾ፡- «ጾኢያ ቢንሢ ዳቢሹዋጉዲ ቢንሢና ዔሩዋቴ፤

5 ሚርጌሢ፡- ታኣኒ ሜሲሄኬ፤ ጌይሢና ታ ሱንጾ ዔኪ ሙኪ፤ ሚርጌሢ ዳቢሻንዳኔ።

6 ቢንሢኮ ዑኬ ጾሊንታ ጾልዚ ቢንሢ ዋይዛንዳኔ፤ ሃሃ ጾልዚኮ ሃይሴያ ቢንሢ ዋይዛንዳኔ፤ ዩይ ሲያ ማዓኒ ኮይሳያታሢር ዲቃቴፖቴ፤ ጋፒንፃ ጋዓንቴ ሃጊኬ።

7 ዴራ ዴር፤ ካኣታ ካኣቶ ጾላንዳኔ፤ ዲማ ዲማ ዓጮይዳ ናይዚና ሳዓ ባጊዲሢና ማዓንዳኔ።

8 ጋዓንቴ ዩይ ሲያ ሹይቺኮ ቤርታ ቆዳጾ ጉዳያኬ።

9 «ዩና ዋዶና ሚቶም ዓኣሢ ቢንሢ ቢንጎንዳኔ፤ ዋዲያ ዋዶንዳኔ፤ ታ ሱንጾር ዓሲ ሲያና ቢንጎንቴያ ቢንሢ ማዓንዳኔ።

10 ዩያር ሚርጌ ዓሳ ዳቢንታንዳኔ፤ ሃሃ ፔቴይ ባጋሢ ዓኣሢ ቢንጋንዳኔ፤ ዋሊ ቢንጎን ዳንዳኔ።

11 ሚርጌ ሉኡቁ ጾኢሲ ማሊሢ ኬኤዛያ ማላ ዓሲ ዔቁ ሚርጌ ዓሳ ዳቢሻንዳኔ።

12 ፑርቱሞ ሚርጋንዳሢር ሚርጌ ዓሶኮ ናሹማ ባይቃንዳኔ፤

13 ዳንዲ ጋፒንፃ ሄላንዳኣና ደይሢ ጋዓንቴ ዳቃንዳኔ።

14 ዴር ቢያም ማርካ ማዓንዳጉዲ ሃይ ያኦሲ ካኣቱም ኮዥ ሃይሶ ዓጮ ቢያይዳ ከኤዚንታንዳኔ፤ ዩካፓ ዓጮኮ ጋፒንፃ ሙካንዳኔ» ጌዔኔ።

15 ዩካፓ ዩሱሴ፡- «ያኦሲ ማሊያ ከኤዛ ዳኣኔኤሌ ከኤዜ ጎይያና ካኣዥ ዒኢሳ፣ ሻኣካ ባኣዚ ጌኤዥ ቤዘይዳ ማዲንታንቲ ዒንሢ ዛጋንዳኔ፤ ዩያ ናባባሢ ጳቂሦንጎ።

16 ዩና ዎዶና ዩሁዳይዳ ናንጋ ዓሳ ዲኮ ባንሢ ቤቱዋቲ፤

17 ሹጮና ማዥና ማኣሮኮ ዑያይዳ ዓኣ ዓሲ ከኤፃፓ ዓኤቢ ዔካኒ ከዶፓ፤

18 ጎዥ ቤዛ ዓኣሢያ ዓፒሎ ፔኤኮ ዔካኒ ማኣሪ ዓኣዶፓ።

19 ዩና ዎዶና ጎጶ ዒንዳሢና ዳንሢሣ ለኣሎናም ባዴዔ፤

20 ዒንሢኮ ቤቲፃ ባርጊና ሃሣ ዓይሁዶኮ ሃውሾ ከሎና ማዑዋጉዲ ሸኢቁዋቲ።

21 ዩናና ዓጮ ማዥንቲሢዲፓ ዩና ከሎ ሄለንዳኣና ማዒ ቤቁባኣ ባኣዚ ሃሣ ዩካፓ ጊንፆይዳኣ ቤቃያባኣ ሚርጌ ዴኤፒ ሜታ ማዓንዳኔ።

22 ዩንሢ ከሎንሢ ቃሚቁባኣያ ማዔቶ ዓሲ ቢያ ዓቲንዲዎያታንቲኬ፤ ዶኦሪንቲዘንሢ ዛሎሮ ዩንሢ ከሎንሢ ቃሚቃንዳኔ።

23 «ዩናና ያኦኒያ ሃይሾ፣ ሜሲሄ ሃካ ዓኣኔ!» ሃሣ «ዩካ ሶ ዓኣኔ!» ዒንሢም ጌዔቶ ጎኔኬ ጌይፖቲ።

24 ዓይጎሮ ጌዔቲ ከሪሰቶሴቱዎያ ፔና «ከሪሰቶሴኬ» ጋዓ ዓሲና ሉኡዙዋና ያኦሲ ማለሢ ከኤዛያ ማላ ዓሲ ከሰካንዳኔ፤ ዔያቶም ዳንዳዒንቲቶ ያኦሲም ታናኬ ጋዓ ዓሶ ዳቢሻኒ ዴኤፒ ዓኪ ባኣዚ ሃሣ ዲማ ዲማ ማላታኣ ማዲ ዳዋንዳኔ።

25 ዩያሮ ሃያ ቢያ ቤርታሲ ታ ዒንሢም ከኤዛኣኬ፤

26 «ሃሣ ጊንሣ ሃኣዛዙዋቲ፣ ከሪሰቶሴ ዓሲ ናንጉዋ ዳውሎይዳ ዓኣኔ!» ዒንሢም ጎያናቲ ዒኢኣ ዴንዲፖቲ፤ ሃይሾ፣ ዓኣሸንቲ ቤሰካ ዓኣኔ!» ዒንሢም ጎያናቲያ ጎኔኬ ጌይፖቲ።

27 ዓይጎሮ ጌዔቶ ዜኤሊንሢ ጫሪንቲዳ ዜኤሊንሣያ ዓባ ከሰካ ካራፓ ዴንዲ ጌላ ካራ ጴዳሢጉዲ ዓሲ ናዓሢኮ ሙኪፃ ያዲ ማዓንዳኔ።

28 ዔኤቢ ሃይቁ ቤሰካ ቢያ ሃምፑራ ቡኪንታኔ» ጌዔኔ።

24:15 ዳኣኔ. 9:27፤ 11:31፤ 12:11። 24:17 ሉቃ. 17:31። 24:21 ዳኣኔ. 12:1፤ ዮሃ. ያፔ. 7:14። 24:26 ሉቃ. 17:23-24። 24:28 ሉቃ. 17:37።

ኪሪሰቶስኮ ለምዓንሦ ሙኮ
(ማር. 13:24-27፤ ሉቃ. 21:25-28)

29 ሃሣ ዩሱሴ ከኤዛዎ፡- «ዩንሢ ሜታሢ ከሎንሢኮ ጊንፃ ቤዘማና ዓባ ዲማንዳኔ፣ ዓጊናኣ ፖዓዓኬ፣ ዠኦጋሢሢ ጫሪንጫፓ ዲኦናንዳኔ፣ ጫሪንጫ ማዠንታ ቢያ ዓጊፃንዳኔ።

30 ዩኖ ዎደና ዓሲ ናዓሢኮ ማላታ ጫሪንጫይዳ ዴዳንዳኔ፤ ዓጫይዳ ዓኣ ዓሳ ቢያ ዩኤካንዳኔ፤ ዓሲኮ ናዓሢያ ጫሪንጫ ሻኦሮና ማዒ፣ ዴኤፒ ቦንቸና ሙካንቲ ዔያታ ዒዛ ዛጋንዳኔ።

31 ዒማና ዒዛኮ ኪኢታንቸ ዴኤፒ ዛዩና ዓጫኮ ቢያ ዛሎ ዒ ዳከም ዔያታ ዴንዲ ዒዛም ዶኦሪንቲዘንሢ ዓጫ ማዔ ካራፓ ቢያ ቡኩሳንዳኔ» ጌዔኔ።

ጎዳኮ ሙኪዎ ዳዎ ማላቶ
(ማር. 13:28-31፤ ሉቃ. 21:29-33)

32 ሄሊሳዎ ዩሱሴ፡- «ቤሌሶ ሚፃላ ማላታ ማዒ ዒንሢም ዔርዛያ ማዎንጎ፤ ዒዛኮ ካኦፓ ዲሊ፣ ዒላሺ ኬሳ ዎደና ዎንሢ ዑኬሢ ዒንሢ ዔራኔ፤

33 ዩያጉዲ ዩያ ባኮ ቢያ ዒንሢ ዛጋ ዎደና ዒዛኮ ሙካ ኮሺ ዑኬሢ ዒንሢ ዔራንዳኔ።

34 ጎኔ ታ ዒንሢም ጋዓኔ፤ ዩይ ጉቤ ማዓንዳያ ሄላንዳኦና ሃይ ሾይንታ ዓኣዳዓኬ።

35 ጫሪንጫና ሳዎና ዓኣዳንዳኔ፤ ታኣኮ ቃኣላ ጋዓንቲ ፔቲታዎ ዓኣዳዓኬ» ጌዔኔ።

ጎዳ ሙካ ከሎ ዎኦንያ ዔራዎያ ማዒዎ
(ማር. 13:32-37፤ ሉቃ. 17:26-30፤ 34-36)

36 ዩሱሴ ሃሣ፡- «ዩኖ ከሎና ዎደና ጋዓንቲ ዓደይዳፓ ዓታዛ ጫሪንጫ ኪኢታንቸ ማዔቶዎ ናዓሢያ ዔራዎሴ።

37 ዓዳ ኖሄ ዎደና ማዔሢጉዲ ዓሲ ናዓሢኮ ሙኪዎ ዒማዲ ማዓንዳኔ፤

38 ዩኖ ዎደና ባይሲንቶ ዎኣዎኮ ቤርታ ኖሄ ዎኣዎ ካኦሚላ ጌላንዳ ከሎ ሄላንዳኦና ዓሳ ሙዒያ ሙዒ ዑሽኪያ ዑሽኪ ሃሣ ሎዒያ ሎዒ ዔኪያ ዔኪ ጌዔኔ።

24:29 ዓ.ሲ. 13:10፤ 34:4፤ ሂ.ኪ. 32:7፤ ዓ.ዩ. 2:10፤ 31፤ 3:15፤ ዮሃ. ዎፔዳ 6:12-13።
24:30 ዳኦኔ. 7:13፤ ዛካ. 12:10-14፤ ዮሃ. ዎፔዳ 1:7። 24:37 ማዠ. ማፃ 6:5-8።

39 ባይሲንቶ ዋኑ፣ ሙኪ ጉቤህ ሙዒ ጋፒሳንዲያ ሄላንዳኣና ዔያታ ዔሪባኣህጉዲ ዓሲ ናዓህኮ ሙካ ያዲ ማዓንዳኔ።

40 ዬኖ ዋደና ላምዖ ዓሲ ጎሺዳ ዋላ ጎሽካያ ማዓንዳኔ፤ ፔቴህ ዔውቴም ባጋህ ዓታንዳኔ።

41 ላምዖ ላኣሊ ዋንህ ዋላ ዋዳንዳኔ፤ ፔቴዛ ዔውቴም ባጌላ ዓታንዳኔ።

42 «ዓካሪ ዒንህኮ ጎዳህ ሙካ ኬሎ ዒንህ ዔሩዋኣህረ ጴጪ ካፑዋቴ።

43 ኮሺ ዔሩዋቴ፤ ፔቴ ማኣሪኮ ዓዴ ደሚና ዉሲ ዋማ ዋዴ ሙካንዳቴያ ዔራያ ማዔቶ ጊንዑዋዖ ካፒ፣ ዉዘና ማኣረ ቦኣኪሲንዲዋያታንቴ ዔሩዋ ዓቲያና ዉዘ ማኣሪ ጌላህጉዲ፣

44 ዓሲኮ ናዓህ ዒንህ ማሊባኣ ዋዴና ሙካንዳህረ ጊኣጊንቴ ናንጉዋቴ» ጌዔኔ።

ጉሙርቂንታያና ጉሙርቂንቱዋ ማዒ ማዳዘንህ ኮኣኪንህ (ሉቃ. 12:41-48)

45 ዬሱሴ ሃህ ኬኤዛዖ፡- «ፔኤኮ ማኣረ ዓሶም ኮይሳ ዋደና ሙዖ ዒንጋንዳጉዲ ማኣረ ዓዳህ ፔኤኮ ማኣረ ዓሶ ዑያይዳ ሱኡጋሲ ጌህ፣ ጉሙርቂንታያና ጨንጮ ማዔ ማዳህ ዖናደይ?

46 ዬማይዲ ማዳንቴ ማኣረ ዓዴ ሙኪ ዴንቁቶ፣ ዬይ ማዳህ ጋላቲንታያኩ።

47 ጎኔ ታ ዒንህም ጋዓኔ፤ ዬያ ማዳህ ማኣረ ዓዴ፣ ቢያ ባኮኮ ዑያይዳ ሱኡጋሲ ጌህንዳኔ።

48 ጋዓንቴ ዬይ ማዳህ ፑርታ ማዒ፣ ፔ ዒኖና ታ ጎዳህ ኔጊ ሙካንዳኔ» ጌዒ ማላዖ፣

49 ዒዘና ዋላ ማዳ ዓሶ ጳዲ ዓርቁቶ ሃህ ማህንታ ዓሶና ዋላ ሙዒ ዑሽካያ ማዔቴ፣

50 ዬያ ማዳህኮ ዓዳህ ዒ ዔሪባኣ ዋዴና ኬሊናይዳ ሙኪ፣

51 ዬያ ማዳህ ቲቂ ቲቂ ኬኤራንዳኔ፤ ዒዘኮ ናንጎ ቤዘዋ ጌኤሽቱዋዖ ፔና ጌኤሽ ማሊሳ ዓሶና ዋላ ማሃንዳኔ፤ ዒኣካ ዬኤኪ ሃህ ሜታዲ ዓቺ ዒ ዳዓንዳኔ።»

25

ታጳ ዉዴር ናኣቶንህ ኮኣኪንህ

1 ዩካፓ ዩሱሱ:- «ዬኖ ዎዶና ጫሪንጮ ካኣቱማ ጌሊያ ጎይፃ ዑኡታ ጎይሣ ዔካኒ ፖራ ዔከ፡ ከስኪ ካፔ ታጾ ዉዲር ናይሰከንሣ ሃይሱጉዲ ማዓንዳኔ።

2 ዩንሣዲፓ ደንጎ ዉዲር ናኣቶንሣ ሶኣዛ፡ ዓቴ ደንጎንሣ ጩንጫኬ፤

3 ሶኣዛንሣ ፖፖ ፖራሶሣ ዔካፃ፡ ጋዓንቴ ጋፓዛ ዋሃኒ ኮይላ ላምባሣ ዔከባኣሱ።

4 ጩንጫንሣ ጋዓንቴ ፖፖ ፖራሶሣንታ ሃሃ ጋፓዛ ዋሆንዶ ላምባሣ ኮይላ ዓርቄኔ።

5 ዑኡታሣ ኔጌም ቢያሣ ጊንዓ ባሼም ጊንዔኔ።

6 «ዩካፓ ሳዓ ጊዲሚሺ ማዓዛ <ዑኡታሣ ሙኬኔ፡ ዔካኒ ከስኮዋቴ!> ጋዓ ዔኤሊሣ ዋይዘንቴኔ።

7 ዩማና ዉዲር ናኣቶንሣ ቢያ ዔቃፃ፡ ፖራሶ ባኮ ጊኢጊሼኔ፤

8 ዒማና ሶኣዛንሣ ጩንጫንሣ ኮራ ሓ ፖዓ ሃይቃኒ ዎኦታሣር፡ ዒንሣኮ ላምባሰካፓ ኑም ዒንጉዋቴራ!» ጋዓዛ፡

9 ጩንጫ ዉዲር ናኣቶንሣ ማሃፖ «ኦኦኮ ዓኣ ላምባሣ ኦኦና ዒንሣናም ጊዲንዲዋኣሣር፡ ዴንዲ ሻንቻ ዓሶይዳፓ ዒንሣ ሻሻንቁዋቴ» ጌዔኔ።

10 ዩማና ዔያታ ላምባሣ ሻንቃኒ ዴንዲዛ ዑኡታሣ ሙኬም ጊኢጊ ዓኣ ዉዲር ናኣቶንሣ ዔፖ ሙፖ ቤዘ ዒዛና ዎላ ጌላዛ ካራ ዎዲንቴኔ።

11 «ዓቴ ዉዲር ናኣቶንሣ ሃሃ ዳካ ኔጊ ሙካፃ፡ ሳዳሣዮ! ካር ኦም ቡሌ» ጋዓዛ፡

12 ዒዚ ማሃፖ «ጎኔ ታ ዒንሣም ጋዓኔ፤ ታ ዒንሣ ዔሩዋሱ» ጌዔኔ።

13 ዩካፓ ሃሃ ዩሱሱ:- «ዬይ ማዓንዳ ዎዶና ከሎና ዒንሣ ዔሩዋኣሣር ጊኢጊንቴ ካፑዋቴ» ጌዔኔ።

**ማዳ ማዳ ሃይሃ ዓሲ ኮኦኪንሣ
(ሉቃ. 19:11-27)**

14 ሃሃ ዩሱሱ:- «ፆኦሲ ካኣቱማ ማዳ ዓሶ ዔኤሊ፡ ዓኣ ባኮ ሓጉዋቴ» ጌይ ሜሌ ዓጪ ዓኣዳ ፔቴ ዓሲ ማላኔ፤

15 ዒዚ ዓኣዳኒ ዔቃፃ ፔቴ ፔቴሣም ዴንዳዓሣጉዲ ፔቴሣም ደንጎ ሺያ ሹቺ ቢራ፤ ባጋሣም ላምፖ ሺያ ሹቺ ቢራ፤ ዓቴሣም ሃሃ ፔቴ ሺያ ሹቺ ቢራ ዒንጊ ጎይፃ ዓኣዳኔ።

16 ደንጎ ሺዮ ሹጮ ቢሮ ዔኬ ዓሢ ሚኢሾ ኮርሚ ጊዳ ደንጎ ሺያ ሹቹ ቢራ ሾይዜኔ፤

17 ዬያጉዲ ሃሣ ላምዎ ሺዮ ዔኬ ዓሢያ ጊዳ ላምዎ ሺያ ሾይዜኔ፤

18 ዓቴ፡ ፔቲ ሺዮ ሹጮ ቢሮ ዔኬሢ ጋዓንቴ ማኣሮ ዓዶኮ ሚኢሾ ዔካዎ ዔቴ ቦኣኪ ዱኡኬኔ።

19 «ሚርጌ ዎዴ ዳዓዎ፡ ዬንሢ ማዳ ዓሶንሢኮ ማኣሮ ዓዳሢ ሙኪ፡ ማዳዘንሢም ዒንጌ ባኮ ዛገሢ ሳርቄ፤

20 ደንጎ ሺዮ ሹጮ ቢሮ ዔኬሢ ጊዳ ደንጎ ሺያ ሹቹ ቢራ ቃሲ ዔኪ ሙኪ ዒንጋዎ፡ ሳዳሢዮ! ደንጎ ሺያ ቢራ ታኣም ኔ ሳርቄ ጌዒ ዒንጌንጌት ሃኣዛጌ ሃሢ ደንጎ ሺያ ሹቹ ቢራ ጊዳ ታ ሾይዜኔ፤ ጌዔኔ።

21 ማኣሮ ዓዴያ ቃራ ኔ ማዳኔ፤ ኔኤኒ ኮዢ፡ ጉሙርቁንታ ማዳሢዮ! ዳካ ባኣዚዳ ኔ ጉሙርቁንቴያ ማዔሢሮ ሚርጌ ባኣዚ ኔ ዎይሣንዳጉዲ ታ ኔና ማሃንዳኔ፤ ሃኒ ሙኪ ታኣና ዎዛዴ፡ ጌዔኔ።

22 «ዬያጉዲ ሃሣ ላምዎ ሺዮ ሹጮ ቢሮ ዔኬ ማዳሢ ሙካዎ፡ ሳዳሢዮ! ላምዎ ሺያ ሹቹ ቢራ ኔ ታኣም ዒንጌያታንቴ፡ ሃሢ ሃኣዛጌ ጊዳ ታ ላምዎ ሺያ ሾይዜኔ፤ ጋዓዛ፡

23 ማኣሮ ዓዴያ ቃራ ኔ ማዳኔ፤ ኔኤኒ ኮዢ፡ ጉሙርቁንታ ማዳሢዮ! ኔ ዳካ ባኣዚና ጉሙርቁንቴያ ማዔሢሮ ሚርጌ ባኣዚ ኔ ዎይሣንዳጉዲ ታ ኔና ማሃንዳኔ፤ ሃኒ ሙኪ ታኣና ዎዛዴ፡ ጌዔኔ።

24 «ጋፒንግ ፔቲ ሺዮ ሹጮ ቢሮ ዔኬ፡ ማዳሢ ሙካዎ ሳዳሢዮ! ኔኤኒ ዜርቁባኣ ቤሲዳፓ ጮኦራያ ሃሣ ዜርቁባኣዎ ታይዛያ ሜታሳ ዓሲ ኔ ማዔሢ ታ ዔራኔ፤

25 ዬያሮ ታ ዒጊጩ ኔ ዒንጌ ሹጮ ቢሮ ዔኪ ዓኣዲ ሳዎይዳ ዱኡኪ ካፔሢሮ ሃሢ ሃኣዛጌ፤ ጌዔኔ።

26 «ማኣሮ ዓዳሢ ማሃዎ ላይ ኔ ፑርታ፡ ሃሣ ቤልፃ ማዔሢ ሃይ! ታ ዜርቁባኣዎ ጮኦራያና ሃሣ ዜርቁባኣዎ ታይዛሢ ኔ ዔራያ ማዔቶ፡

27 ሚኢሾ ታኣኮ ኮርሚ ሾይዢ ዓሶም ሄኤዶ ኔ ዒንጌም፡ ታ ሾይቹና ዔካንዳያታንጌኬ፤ ጋዓዎ፡

28 ሲዛይዳፓ ሚኢሾ ዔኪጋፓ ታጸ ሺዮ ዓንጎ ቢራ ዓኣሢም ዒንጉዎቴ።

29 ዓይጎሮ ጌዔቶ ዓኣ ዓሶም ጊዳ ቃሲንቴም ሚርጋንዳኔ፤ ባኣሢዳፓ ጋዓንቴ ዳካ ዓኣማታዎ ዓቴዎ ዔውታንዳኔ።

30 ሃያ ፓሠዎ ማዳሢ ጋዓንቴ ዙላ ዲማ ኬሲ ኬኤሩዎቴ፤ ዒኢካ ዒ ዬኤኪ ሃሣ ሜታዲ ዓቺ ዳዓንዳኔ» ጌዔኔ።

25:29 ማቴ. 13:12፤ ማር. 4:25፤ ሉቃ. 8:18። 25:30 ማቴ. 8:12፤ 22:13፤ ሉቃ. 13:28።

ዓጮኮ ጋፒንያና ዋጊንታንዳ ዋጎ

31 ዬካፓ ዬሱሱ፡- «ዓሲኮ ናዓሢ ፔኤኮ ከኢታንቸ ቢያሢና ዋላ ቦንቸንቲ ሙከ፡ ቦንቸ ካአቱሞ ያይቶይዳ ዴዓንዳኔ፤

32 ዴራ ቢያ ዬማና ዒዛ ቤርታ ቡኪንታንዳኔ፤ ዒዚያ ሄንቃ ዓሲ ማራቶ ዋኣሮይዳፓ ቁራሢጉዲ ዴሮ ቁሪ ዴማሳንዳኔ፤

33 ዬካፓ ማራቶ ሚዛቆ ዛላ፡ ዋኣሮ ሻዉሎ ዛላ ዔቁሳንዳኔ።

34 ዬና ዋዶና ካአታሢ ዒዛኮ ሚዛቆ ዛላ ዓኣዞንሢሞ፡- <ዒንሢ ታ ዓዴ ዓንጃ ዓሳ፡ ሃኒ ሙኩዋቲ፤ ሳዓ ማኸንቴሢዳፓ ዓርቃዎ ዒንሢሞ ጊኢጌ ካአቱሞይዳ ጌሉዋቲ፤

35 ዓይጎሮ ጌዔቶ ታኣኒ ናይዴም ታና ዒንሢ ሙኡዜኔ፡ ዴኤቢንቴም ታና ዒንሢ ዑሼኔ፤ ሃሣ ሸኣቸንሢያ ታና ዒንሢ ዔኬኔ፤

36 ታ ካላዴም ታና ዒንሢ ማይሴኔ፡ ሃርጊንቴም ታና ዒንሢ ማይሢኔ፡ ቱኡቴማአ ታና ዒንሢ ያኦጩኔ።»

37 «ጌኤዠንሢያ ማሃዎ ሳዳሢዮ! ኔኤኒ ናይዲንቴም ኔና ኑ ዛጊ ዓይዴ ሙኡዜይ? ሃሣ ዴኤቢንቴም ዛጊ ዓይዴ ኔና ኑ ዑሼይ?

38 ጊንሣ ሸኣቸም ኔ ሙኬም ዓይዴ ዛጊ ኔና ኑ ሸኣቸንሢይ? ካላዴማአ ዓይዴ ዛጊ ኔና ኑ ማይሴይ?

39 ዬያጉዲ ሃሣ ሃርጊያ ሃርጊንቴ፡ ቱኡቴያ ኔ ቱኡቴም ዓይዲ ኔና ኑ ያኦጩይ? ጌዔኔ።

40 ካአታሢ ማሃዎ፡- ሳኔ ታ ዒንሢሞ ጋዓኔ፤ ሃንሢ፡ ታ ዓሶንሢዳፓ ፔቴ ለኣፓሢሞ ዒንሢ ማዴሢ ታኣም ዒንሢ ማዴሢጉዲኬ ጋዓንዳኔ።

41 «ዬካፓ ዒዛኮ ሻዉሎ ዛሎና ዓኣዞንሢሞ ሃሣ <ዒንሢ ጋዳንቁንቴዞንሢዮ! ፃላሃና ዒዛኮ ከኢታንቸናም ጊኢጊንቴ፡ ናንጊና ባይቁዋ ታሞይዳ ታ ኮራፓ ዓኣዲዋቲ፤

42 ዓይጎሮ ጌዔቶ ናይዴም ታና ዒንሢ ሙኡዚባኣሴ፡ ዴኤቤም ታና ዒንሢ ዑሼባኣሴ፤

43 ሸኣቸንቁ ታ ሙኬም ዒንሢ ታና ሸኣቸንሢባኣሴ፤ ካላዴማአ ታና ዒንሢ ማይሴባኣሴ፤ ሃርጊያ ሃርጊ፡ ቱኡቴያ ታ ቱኡቴንቴ ታና ዒንሢ ያኦጩባኣሴ» ጌዔኔ።

44 «ዔያታ ማሃዎ ሳዳሢዮ! ናይዲንቴ ሃሣ ዴኤቢንቴ፡ ሸኣቸያ ማዲ፤ ጊንሣ ካላዲ፡ ሃርጊያ ሃርጊ፡ ቱኡቴያ ኔ ቱኡቴም ዛጊ ዓይዴ ኔና ኑ ያኦጩዋዎ ሃሼይ? ጋዓንዳኔ።

45 ዒማና ሳኔ ታ ዒንሢሞ ጋዓኔ፤ ሃንሢ ታ ዓሶንሢዳፓ ፔቴሢሞ ዒንሢ ማዲባኣሢ ታኣም ዒንሢ ማዲባኣሴ» ጋዓንዳኔ።

46 ይንሢ ሂዚ ጋዓዘንሢ ናንጊና ጋፑዋ ማቶይዳ፤ ዲሎንሢ ጋዓንቴ ናንጎና ናንጎይዳ ጌላንዳ።»

26

ዩሱሴ ባይዛኒ ጌሰቶና ጌኤሲ
(ማር. 14:1-2፤ ሉቃ. 22:1-2፤ ዮሃ. 11:45-53)

1 ዩሱሴ ዩንሢ ባኮ ኬኤዚ ጋፐሢኮ ጊንፃ፡ ዒዛኮ ጊንፃ ሃንታ ናኣቶም፡-

2 «ላምዖ ኬሊኮ ጊንፃፓ ዓይሁዶ ዓሶኮ ዑሣ ዓኣዲፃ ኬላ ቦንቸንታፃ ማዔሢ ዒንሢ ዔራኔ፤ ዓሲኮ ናዓሢ ሱዲንታንዳጉዲ ዓኣሢ ዒንጊንታንዳ።» ጌዔ።

3 ዩካፓ ቄኤሶኮ ሱኡጎና ዳሮኮ ጨማ፡ ቄኤሶ ቢያሢኮ ሱኡጋሢ ቃያፓ ማኣሮ ካሮይዳ ቡኪንቴ።

4 ዒኢካ ዔያታ ዔርቴዋ ጎይሢና ዓርቂ ዩሱሴ ዎዲኒ ዎላ ዘርቴ።

5 ጋዓንቴ ዔያታ፡ «ዳሮኮ ባኣካ ዣላ ዔቁዎጉዲ ቦንቸ ኬሎና ማዖፓ» ጌዒ ዎላ ጌሰቴ።

ሳውቃ ቲዦና ዩሱሴ ቲሽኬ ላኣሌሎ
(ማር. 14:3-9፤ ዮሃ. 12:1-8)

6 ዒኢካ ዩሱሴ ቢታኒያይዳ ዑፃ ኬሰካ ዶርዓሢ ዓርቄንቴ ፖዔ፡ ሲሞኦኔ ማኣራ ዓኣንቴ፡

7 ፔቴ ላኣሊሰኬና ሹቺፓ ኮሸና ቢልቃፃይዳ ሻንቸናቴ ሚርጌ ሚኢሼ ዔካንዳ ሳውቃ ቲሺ ኩንሢ ዔኪ ሙካፃ፡ ዩሱሴ ሙዖሮ ዳዒ ዓኣንቴ ዒዛኮ ቶኣካ ዎሃ።

8 ዒዛኮ ጊንፃ ሃንታ ናኣታ ዩያ ዛጌ ዎዶና ጎሪንታ፡- «ሃያ ሳውቃ ቲዦ ጉሪ ላኣሎሢ ዓይጎሮዳይ!

9 ሃይ ሳውቃ ቲዦ ሚርጌ ሚኢሼም ሻንቸንቴ፡ ሚኢሻ ማንቆ ዓሶም ዒንጊንታንዳንቴኬ» ጌዔ።

10 ዩሱሴ ዩያ ዔያታ ጋዓሢ ዔራ፡- «ሃኖ ላኣሌሎ ዒንሢ ዓይጎሮ ማታጎይ? ዒዛ ኮሺ ባኣዚ ታኣም ማዳ።፤

11 ማንቆ ዓሶ ቢያ ዎዶ ዒንሢና ዎላኬ፤ ታኣኒ ጋዓንቴ ቢያ ዎዶ ዒንሢና ዎላ ማዓባኬ።

12 ሳውቃ ቲዦ ታ ዑፃ ዒዛ ዎሃሢ ታና ዲኡፖም ጊኢጊሻኒኬ፤

13 ጎኔ ታ ዲንሢም ጋዓኔ፤ ሃይ ኮፍ ሃይሳ ኬኤዘንታ ዓጮ ቢያይዳ ዓንካ ማዕቶዎ ዲዛ ማዴ ባካ ሩዚ ዩያይዳኔ፤ ጌይንቲ ኬኤዘንታንዳኔ» ጌዔኔ።

ዪሁደኮ ዩሱሴ ዓአሢ ዲንጊዖር ዓሶና ጌሰቲ ጊኢጊዖ
(ማር. 14:10-11፤ ሉቃ. 22:3-6)

14 ዩካፓ ታጳ ላምዖንሢዳፓ ፔቴሢ ማዔ፥ ዓሰቆሮንቶ ዪሁደ ጌይንታሢ ቄኤሶኮ ሱኡጎ ኮራ ዓአዲዖ፡-

15 «ታኢ ዲዛ ዓአሢ ዲንሢም ዲንጌቶ ዲንሢ ታአም ዓይጎ ዓንጋንዳይ?» ጋዓዛ፥ ዔያታ ዲዛም ሃይሢታሚ ሹቹ ቢራ ፓይዲ ዲንጌኔ።

16 ዩማፓ ዓርቃዖ ዪሁደ ዩሱሴ ዓአሢ ዲንጋኒ ጊኢጋ ኬሊ ኮዓኔ።

ዩሱሴ ዓይሁደኮ ዑሣ ዓአዲዖ ቦንቾ ኬሎ ካዎሢ ሙዔሢ
(ማር. 14:12-21፤ ሉቃ. 22:7-14፤ 21-23፤ ዮሃ. 13:21-30)

17 ዓይሁደኮ ላአደ ሙዔ ቦንቾሢኮ ቤርታሳ ኬሎ፥ ዲዛኮ ጊንዖ ሃንታ ናአታ ዩሱሴ ኮራ ሙካዖ፡- «ዑሣ ዓአዲዖ ቦንቾ ኬሎ ካዎሢ፥ ዎካ ኔኤም ኑ ጊኢጊሻንዳጉዲ ኔ ኮዓይ?» ጌዔ ዲዛ ዖኦጮኔ።

18 ዲዚ ማሃዖ፡- «ካታምይዳ ናንጋ፥ ሃያ ማአሬ ዴንዲፓፓ ሩርዘሢ፥ ታኡኮ ዎዳ ዑኬሢሮ ታኡኮ ጊንዖ ሃንታዘንሢና ዎላ ዑሣ ዓአዲዖ ቦንቾ ኬሎ ካዎሢ ኔ ማአራ ታ ሙዔ ቦንቾንዳኔ» ጋዓኔ፥ ጎዑዎቴ» ጌዔኔ።

19 ዲዛኮ ጊንዖ ሃንታዘንሢያ ዲዚ ዓይሢሢጉዲ ዑሣ ዓአዲዖ ቦንቾ ኬሎ ካዎሢ ጊኢጊሹኔ።

20 ዩካፓ ሳዓ ዓማዛ ዩሱሴ ታጳ ላምዖንሢና ዎላ ሙዖር ዴዔኔ፤

21 ዲኢካ ዔያታ ሙዔይይዳ ዓአንቲ ዩሱሴ፡- «ጎኔ ታ ዲንሢም ጋዓኔ፤ ዲንሢዳፓ ፔቴ፥ ታና ዓአሢ ዲንጋንዳኔ» ጌዔኔ።

22 ዩያሮ ዔያታ ሚርጌና ዖያዖ ፔቴ ፔቴሢ፡- «ጎዳሢዮ፥ ታናቴዎሴ፤ ታናኬ ኔ ጋዓ?» ጌዔኔ።

23 ዲዚ ዔያቶም፡- «ዲንሢዳፓ ዓአሢ ታና ዲንጋንዳሢ ሃሢ ታኡና ዎላ ጎንጋ ኩጮ ዳካሢኔ፤

24 ዓሲኮ ናዓሢ ዲዛ ዛሎ ያኣፒንቲ ጎይዖና ሃይቃንዳኔ፤ ጋዓንቲ ዓሲኮ ናዓሢ ዓአሢ ዲንጋ ዓሢም ባዴዔ! ዩይ ዓሢ ሸይንቲባኢያታቴ ኮሺታዖ ዓቴኔ» ጌዔኔ።

25 ዓአሢ ዲዛ ዲንጋንዳ፥ ዪሁደ ሃሢ፡- «ዔርዘሢዮ! ታናቴዎሴ፤ ታናኬ ኔ ጋዓ?» ጋዓዛ፥ ዩሱሴ ዲዛም፡- «ሢዮ፥ ኔ ጌዔሢጉዴያኬ» ጌዔኔ።

ጎዳ ማደ ካዋሢ

(ማር. 14:22-26፤ ሉቃ. 22:15-20፤ 1ቆር. 11:23-25)

26 ዔያታ ካዋሢ ሙዓኣና ዩሱሴ ካሣ ዔኪ ጋላታ ሺኢጲሢ ሺኢቃዖ፡ ቡንፂ ዒዛኮ ጊንዖ ሃንታዞንሢሞ፡- «ሃቦቴ ሙዑዋቴ፤ ሃይ ታናኬ» ጌይ ዒንጌ።

27 ዩያጉዲ ሃሣ ዑሽኮ ባኮዋ ዔኪ ጋላታ ሺኢጲሢ ሺኢቃዖ፡- «ቢያሢ ሃያይዳፓ ዑሽኮዋቴ፤

28 ሃይ ሚርጌ ዓሶኮ ጎሞ ጌኤሻኒ ላኣለንታንዳ ታኣኮ ዓኮ ጫኣቁሞ ሱጉዖኬ፤

29 ታ ዓዶ ካኣቱሞይዳ ዎይናፓ ኮሾና ዓኮ ዑዠ ዒንሢና ዎላ ታ ዑሽካንዳያ ሄላንዳኣና ሃይካፓ ሴካ ሃኖ ዎይናፓ ኮሾና ዑዠሎ ላሚ ታ ዑሽካዓኬ ታ ዒንሢሞ ጋዓ፤» ጌዔ።

30 ዩካፓ ዔያታ ዖኦሲ ቦንቾሞ ማዓ ዓይኑሞ ዓይናዳዖ፡ ዛይቶ ሪሚቶ ዲኮ ኬሰኬ።

ጲፂሮሴ «ታ ዒዛ ዔሩዋሴ» ጋዓንዳሢ ቤርታዲ ኬኤዚንቴሢ

(ማር. 14:27-31፤ ሉቃ. 22:31-34፤ ዮሃ. 13:36-38)

31 ዩካፓ ዩሱሴ ዒዛኮ ጊንዖ ሃንታዞንሢሞ፡- « <ሄንቃሢ ታ ዎዳንዳ፤ ማራታኣ ዣኣላንዳ፤ ጌይንቴ ፃኣፒንቴሢሮ ሃኖ ዒባኒ ታ ዒንሢኮ ዲቆ ማዕም ዒንሢ ቢያሢ ታና ሃሺ ዓኣዳንዳ፤

32 ጋዓንቴ ሃይባፓ ታ ዔቁሢኮ ጊንፃ፡ ጌሊላ ዒንሢ ቢሪ ታ ዓኣዳንዳ፤» ጌዔ።

33 ዒዞና ጲፂሮሴ ማሃዖ፡- «ሃንጎዋታ ቢያ ኔ ዛሎና ዲቂንቴ፡ ሃሺ ኔና ዓኣዳቶዋ ታኣኒ ፔቴታዖ ኔና ሃሺ ዓኣዳዓኬ!» ጌዔ።

34 ዩሱሴ፡- «ጎኔ ታ ኔኤም ጋዓ፤ ሃኖ ዒባኒ ኮይዳ ቂኢቃንዳሢኮ ቤርታ ሃይሢ ማይንቴ ኔ ታ ዒዛ ዔሩዋሴ» ጋዓንዳ፤» ጌዔ።

35 ጲፂሮሴ ጋዓንቴ፡- «ኔኤና ዎላ ሃሃይቆቴያ ፔቴታዖ ታ ኔና ታ ዒዛ ዔሩዋሴ» ጋዓዓ» ጋዓዛ፡ ሃንጎ ዒዛኮ ጊንዖ ሃንታዞንሢ ቢያ ዒማዲ ጌዔ።

ዩሱሴኮ ጌኤቴሴማኔይዳ ሺኢጲዖ

(ማር. 14:32-42፤ ሉቃ. 22:39-46)

36 ዩካፓ ዩሱሴ ዒዛኮ ጊንዖ ሃንታዞንሢሞ ዎላ ጌኤቴሴማኔ ጌይንታ ቤሲ ዓኣዳዖ፡ ዔያቶሞ፡- «ታኣኒ ሴኬያ ዳንዲ ሺኢቃንዳኣና ዒንሢ ሃካ ዴዑዋቴ» ጋዓዖ፡

26:28 ኬሲ. ማፃ 24:8፤ ዔር. 31:31-34። 26:31 ዛካ. 13:7። 26:32 ማቴ. 28:16።

37 ዲዛና ዋላ ጳጳርሴና ላምዎ ዜብዲዮስ ናኦንህንህ ዔኪ ዴንዳዎ ያዪ ማለህ ሳርቄ፤

38 ዬካፓ ዔያቶም፡- «ሽምፓህ ታኣኮ ማርጌ ያዪ ሃይቃኒ ዑኩኔ፤ ዲንህ ታኣና ዋላ ሃካ ዶዲ ዴዑዋቱ» ጌዔ።

39 ዲማና ዔያቶይዳፓ ዳካ ዶጫዎ፣ ባሊቲና ሳዓ ሎኦሚ፡- «ታ ዓዳሂዮ! ኔኤም ዳንዳዲንታፓ ማዔቴ ሃይ ማታህ ታና ያኦኮንጎ! ጋዓንቲኔ ጌዔህጉዲ ማዓንዳኣፓዓቲም ታ ማሊዎጉዲ ማዎፓ» ጌዔ ሸኢቄ።

40 ዬካፓ ዲ ማዒ ሃይሃ ዲዛኮ ጊንዖ ሃንታዞንህ ባንህ ሙኪ፣ ዔያታ ጊንዒ ዓኣንቲ ዴንቃዎ ጳጳርሴ ኮይላ፡- «ታኣና ዋላ ዳካ ዋዴታዎ ዶዲ ዲንህ ዴዒኒ ዳንዳዲባኣዓዳ?»

41 ዳቢቫኒ ጌሾ ጌሸሂዳ ዲንህ ጌሉዋጉዲ ዶዲ ሸኢቄዋቲ፤ ዓሲኮ ዓያና ቢያ ዋዴ ጊኢጌያኬ፤ ዓሸኪ ጋዓንቲ ላቤያኬ» ጌዔ።

42 ለሚ ሃህ ዴንዳዎ፡- «ታ ዓዳሂዮ፣ ሃያ ታ ዔኩዋዎ ዓቲዋ ማቶ ማዔቶ ኔ ማሊዎ ኩሞንጎ» ጌዔ ሸኢቄ።

43 ለሚ ማዒ ሙካንቲ ጊንዓህ ዔያቶ ኮሺ ባሸሂር ጊንዒ ዓኣንቲ ዴንቃዎ፣

44 ሃህ ዔያቶ ሃሺ ዴንዲ፣ ቤርታ ሸኢቄማ ጎይዎ ሃይህሲ ሸኢቄ።

45 ዬካፓ ጊንዖ ሃንታዞንህ ኮይላ ማዒ ሙካዎ፡- «ሃህ ሄላዎ ዲንህ ጊንዓህዳዳ? ዓሲኮ ናዓህ ጎሞ ዓሶም ዓኣህ ዲንጊንታንዳ ዋዳ ዑኩኔ፤

46 ዓካሪ ዔቁዋቲ፣ ኑ ዓኣዶም፤ ሃይሾ ዓኣህ ታና ዲንጋህ ሙኩኔ!» ጌዔ።

ዬሱሴኮ ዓርቂንቲዎ
(ማር. 14:43-50፤ ሉቃ. 22:47-53፤ ዮሃ. 18:3-12)

47 ዬሱሴ ዬያ ኬኤዛ ጎይህ ዓኣንቲ ታጾ ላምዎንህዳፓ ፔቲህ፣ ዪሁዳ ሙኩኔ፤ ዲዛና ዋላ ጨንቻ ዓፓርና ኮኣሎና ዓርቄ ማርጌ ዓሲ ሙኩኔ፤ ዔያታ ዳኪንቲ ሙኩህ፡- ቄኤሶኮ ሱኤጎና ዴርኮ ጨሞናይዳፓኬ።

48 ዬሱሴ ዓኣህ ዲንጋ፣ ዪሁዳ ዓሶም፡- «ዲንህ ኮዓህ፣ ታኣኒ ዲዛ ሄርቃንዳህ ማዔህር ዲዛ ዓርቁዋቲ» ጌዔ ቤርታ ኬኤዜያኬ።

49 ዲማና ዪሁዳ ዑኩና ዬሱሴ ባንህ ሙካዎ፡- «ዔርዛሂዮ! ኔ ኮሺዳ?» ጌዔ ሄርቄ።

50 ዩሱሴያ፡- «ታ ዲጊናሢየ! ዓካሪ ኔ ሙኬ ማሊያ ኩኩንሜ»*
ጋዓዛ ዓሳ ዩሱሴ ባንሢ ሙኪ ዓርቃያ ሱሲና ዲዛ ቱኬኔ።

51 ዩማና ዩሱሴና ዋላ ዓኣዘንሢዲፓ ፔቲሢ ዓፓሮ ቱጋዖ፡ ቄኤሶ
ቢያኮ ሱኡጋሢሞ ማዳሢኮ ዋዮ ቆፂ ቲቄኔ።

52 ዩሱሴ ጋዓንቴ፡- «ዔዛ ሃይ፡ ጨንቾ ዓፓሮ ጎንጎና ዳኬ፤ ዓፓሮ
ቱጋዘንሢ ቢያ ዓፓሮና ሃይቃንዳኔ።

53 ዋንዴ ያዲ ማዓኒ ኮይሳያ ማዔቲ ታ ዓዶ ታ ያኦጩም
ታጾ ላምዖ ቤሲ ፓቄንታ ፖኦሊሶይዲፓ ባሼ፡ ኬኢታንቾ ታኣም
ዳኪንዲዋያ ኔኤም ማላ?

54 ዩይ ያዲ ማዔቶ ሃሣ ጌኤዡ ማፃኣፓ «ማዓንዳኔ» ጌዔ ባካ
ዋይቲ ኩማንዳይ?» ጌዔኔ።

55 ዲማና ዩሱሴ ዴሮም፡- «ሱላ ዓርቃ ዓሲጉዲ ጨንቻ ዓፓሮና
ኮኦሎና ዲንሢ ዔኪ ታና ዓርቃኒ ሙኪያ? ቢያ ዋዴና ጌኤዡ
ማኣሮይዳ ዴዒ ታ ዔርዛኣና ዲንሢ ታና ዓርቁባኣሴ፤

56 ጋዓንቴ ሃይ ቢያ ማዔሢ ያኦሲ ማሊያ ኬኤዛ ዓሶ ማፃኣፓይዳ
ኬኤዚንቴ ባካ ኩማንዳጉዲኬ» ጋዓዛ፡ ዲዛኮ ጊንያ ሃንታዘንሢ
ቢያ ዲዛ ሌሊ ሃሺ ፑኒንቴኔ።

ዩሱሴኮ ዋጎ ዋጋ ዓሶ ቤርቶ ሺኢኪያ

(ማር. 14:53-65፤ ሉቃ. 22:54-55፤63-71፤ ዮሃ. 18:13-
14፤19-24)

57 ዩማና ዩሱሴ ዓርቄ ዓሳ ሙሴ ዔርዜ ዋጎ ዔርዛ ዓሶንታ ዴሮኮ
ጨምንታ ቡኪንቴ ዓኣ ቤዞ፡ ቄኤሶ ቢያኮ ሱኡጋሢ፡ ቃያፓ ማኣሪ
ዲዛ ዔኪ ዓኣዴኔ።

58 ጋዓንቴ ጳጳርሴ ዲዛኮ ጊንያ ሃኬ ሃኬ፡ ቄኤሶ ቢያኮ ሱኡጋሢ
ማኣሪ ሄላንዳኣና ዓኣዳኔ፤ ዲኢካ ጋሮ ጌሊ ማዳንታ ባኮ ቢያ፡ ጋፒንያ
ሄላንዳኣና ዛጋኒ ካፓ ዓሶና ዋላ ዴዔኔ።

59 ዩማና ቄኤሶኮ ሱኡጎና ዓይሁዶ ዓሶኮ ዋጎ ዋጋ ዓሳ ቢያ ዩሱሴ
ዋዲሻንዳ ሉኡዙሞ ማርካ ኮዓኔ፤

60 ማርጌ ሉኡዙሞና ማርካዳ ማርካ ሺኢኬቶዋ፡ ሃይቃንዳጉዲ
ዋጊሳ ማርካ ዔያታ ዴንቁባኣሴ፤ ጊንፃፓ ላምዖ ዓሲ ሙኪ፡-

61 «ሃይ ዓሢ <ጌኤዡ ማኣሮ ሻሂ ሃይሣ ኬሊዳ ጊንሢ ታ ማዡኒ
ዳንዳዓኔ» ጌዔኔ። ጌይ ማርካዳ።።

62 ዩኖና ቄኤሶ ቢያኮ ሱኡጋሢ ዔቃዖ፡- «ሃንሢ ዓሳ ኔ ጊዳ
ማርካዳ ባኮኮ ቢያ ማሂ ኔ ኬኤዛ ባኣዚ ባኣዳዳ?» ጌዔኔ።

* 26:50 ፔቴ ፔቴ ሚናኣ ማፃኣፓይዳ «ታ ዲጊናሢየ! ሃይኔ ኔ ዓይጎሮ ሙኬይ?» ጋዓኔ።
26:55 ሉቃ. 19:47፤ 21:37። 26:61 ዮሃ. 2:19።

63 ዩሱሴ ጋዓንቴ ዚተዮ ጋዓዛ፣ ቄኤሶ ቢያኮ ሱኡጋሢ፡- «ኔ ማሰህ ሃሃዮ ጸኑሲ ናይ ማዕዳ፣ ናንገና ናንጋ ጸኑዛሢ ሱንጾና ጫኣቂ ታኣም ከኤዜ» ጌዔኔ።

64 ዩሱሴ ማሃዮ፡- «ኔ ጌዔሢጉዲኪ፤ ጋዓንቴ ሃይካፓ ሴካ ዓሲኮ ናዓሢ ጳኤፖ ጸኑዛሢ ማዛቆ ዛላ ዴዒ ዓኣንቴ ዒንሢ ዛጋንዳኔ፤ ዩያጉዲ ሃሃ ጫሪንጮ ሻኣሮና ማዒ ሙካንቴያ ዒዛ ዒንሢ ዛጋንዳኔ፤ ታ ዒንሢም ጋዓኣኬ» ጌዔኔ።

65 ዩማና ቄኤሶ ቢያሢኮ ሱኡጋሢ ዓፒሎ ፔኤኮ ጳጋና ዳርዘዮ፡- «ሃይሾ ዒ ጸኑሲ ጫሽኪኔ! ዒንሢያ ዩያ ጫዮ ዋይዜኔ፤ ሃይካፓ ሴካ ማይ ዓይጎ ማርካ ኮይሳይ?»

66 ዓካሪ ዒንሢም ዓይጎ ማላይ?» ጋዓዛ፣ ዒያታ፡- «ዒ ሃይቃንዳያ ኮይሳኔ!» ጌዒ ማሃኔ።

67 ዒማና ዒዛኮ ዒያታ ዓኣፖ ካራ ጩቴያ ጩቴ፣ ኩቺ ሙሊያ ዲላዛ፣ ዛላ ሃሃ ዒዛ ባዒ ባዒ፡-

68 «ማሰህ! ዮናዳይ ኔና ጳርቄሢ? ሂንዳ ጸኑሲ ማሊሢ ኑም ከኤዜ!» ጌዔኔ።

ጳዕርሴኮ ዩሱሴ ታ ዔሩዋሴ ጌይዖ

(ማር. 14:66-72፤ ሉቃ. 22:56-62፤ ዮሃ. 18:15-18፤25-27)

69 ዩካፓ ጳዕርሴ ቄኤሶኮ ቢያ ሱኡጋሢ ዲሮ ጋራ ዴዒ ዓኣንቴ ፔቴ ዉዴሮ ናይ ዒኢካ ማኣራ ማዳሰኬና ዒዛ ኮይላ ሙካዮ፡- «ኔኤኒያ ጌሊላ ዓጮ ዓሢ፣ ዩሱሴና ዋላ ዓኣያኬ» ጌዔኔ።

70 ዒዚ ጋዓንቴ፡- «ኔኤኒ ዓይጎ ጋዓቴያ ታኣም ዔርቱዋሴ» ቢያሢ ቤርታ ጌዔኔ።

71 ዒዚ ከሰካኒ ማርሾ ካሮ ባንሢ ዓኣዳንቴ ሃሃ ማሌ ማዳሰኬና ዒዛ ዴንቃዮ ዒኢካ ዓኣ ዓሰም፡- «ሃይ ናዚሬቶ ዓሢ፣ ዩሱሴና ዋላ ዓኣያኬ» ጌዔኔ።

72 ዒዚያ ጫኣቂ ጫኣቂ፣ ቢያሢኮ ቤርታ፡- «ታ ዒዛ ዓሢ ዔሩዋሴ» ጌዔኔ።

73 ዩካፓ ዳካ ሃሃ ኔጋዮ ዒኢካ ዔቂ ዓኣ ዓሳ ጳዕርሴ ኮራ ሙኪ፡- «ኔኤኮ ጌኤዛፓ ዔርታሢሮ ጎኔና ኔኤኒ ዔያቶይዳፓ ፔቴሢኪ!» ጌዔኔ።

74 ዒማና ጳዕርሴ፡- «ታና ባይዘም» ጌዒ ጫኣቃዮ «ታ ዩያ ዓሢ ዔሩዋሴ!» ጌዔኔ። ዩማና ኮይዳ ቂኢቃዛ፣

75 ጳዕርሴ «ኮይዳ ቂኢቁዋንቴ ሃይሢ ማይንቴ ኔ ታና ዔሩዋሴ» ጋዓንዳኔ» ዩሱሴ ጌዔሢ ጳቂሃዮ ካሮ ከሰኪ ዒናፓ ጎጋይቂ ዩኤኪኔ።

27

ዩሱሴኮ ጲላዎሴ ቤርቶ ሺኢኪዎ

(ማር. 15:1፤ ሉቃ. 23:1-3፤ ዮሃ. 18:28-32)

1 ዚሮ ጉቴሎ ጉቴ ዓማ፡ ቄኤሶኮ ሱኡጎና ዳሮኮ ጨማኣ ቢያ ዩሱሴ ዎዶንዶ ጎይዎ ዘርቴኔ፤

2 ዩካፓ ዩሱሴ ዔያታ ቱኪ ዔኪ ሮሜ ዓጮ ዎይህ ጲላዎሴም ዓኣሂ ዒንጌኔ።

ዩሁዳኮ ሱዲንቲ ሃይሶ

(ዳኪ. ማዶ 1:18-19)

3 ዩሱሴ ዓኣሂ ዒንጌ ዩሁዳ፡ ዩሱሴ ሃይቃንዳጉዲ ጌይንቲ ዎገንቲሂ ዛጌ ዎዶና ዳቢንቲ ማዔሂ ዔሪ ሃይሂታዎ ሹጮ ቢሮ ቄኤሶኮ ሱኡጎና ጨሞናም ዔኪ ሙኪ ማሂ ዒንጌ፡-

4 «ታኣኒ ጌኤሺ ዓሰ፡ ሃይቢም ዓኣሂ ዒንጌሂና ዳቤኔ» ጋዓዛ፡ ዔያታ፡- «ኑና ዓይጌ ሜቲይ? ኔ ዔራ ባኣዚ ዎኦቲ!» ጌዔኔ።

5 ዩያሮ ዩሁዳ ቢሮንሂ ጌኤዦ ማኣራ ላኣሊ ኬሰኪ፡ ዴንዲ ሱዲንቲ ሃይቄኔ።

6 ቄኤሶኮ ሱኡጋ ዩንሂ ቢሮንሂ ዔካዎ፡- «ሃይ ሚኢሻ ሱጉሂ ሻንቸናያ ማዔሂሮ፡ ጌኤዦ ማኣሮም ዒንጎ ሚኢሻና ዎላ ሲኢራኒ ኑም ኮይሱዎሴ» ጋዓዎ፡

7 ዔያታ ዎላ ዘርቲ፡ ሾኦቹም ዲኡፒ ቤሲ ማዓንዳጉዲ ፔቴ ማኒሰኬያኮ ጎሺ ሻንቄኔ።

8 ዩያሮ ዩና ቤዛ ሃሮ ሄላንዳኣና «ሱጉሂ ሳዓ» ጌይንታኔ።

9 ዩያይዲዎና ዎኦሲ ማሊዎ ኬኤዛ ዔርሚያሴ ዛሎና፡- «ዒሰራዔኤሌ ናኣታ ሲዚ ሻንቸንታንዳማኬ» ጌዒ፡ ዓርቄ ሃይሂታዎ ሹጮ ቢሮ ዔያታ ዔኬኔ፤

10 ዎኦዛሂ ታና ዓይሄ ጎይዎ ማናሂ ጎዦ ዛሎ ዔያታ ጨጌኔ» ጌይንቲ ኬኤዚንቲሂ ኩሜኔ።

ጲላዎሴኮ ዩሱሴ ዎኦጨዎ

(ማር. 15:2-5፤ ሉቃ. 23:3-5፤ ዮሃ. 18:33-38)

11 ዒማና ዩሱሴ ሮሜ ዓጮ ዎይህ ጲላዎሴ ቤርቶ ሺኢካዛ፡ ጲላዎሴ፡- «ኔኤኒ ዓይሁዳ ካኣቲዳ?» ጌይ ዎኦጨኔ።

ዩሱሴ ማሃዎ፡- «ኔ ታና ጌዔሂ ጉዴያኬ» ጌዔኔ።

12 ጋዓንቴ፡ ቁኤሶኮ ሱኡጎና ጨሞና ዳቢንቴ ዓአኔ ጌሲ ዲማ ዲማ ባአዚ ከኤዛናና ዩሱሴ ዓይጎዋ ጌሲ ባአሴ።

13 ዩማና ጲላዎሴ፡- «ኔና ዔያታ ዋጎና ዓይሢሳኒ፡ ዓአፒኒ ባአዚ ፓይዳቴያ ኔ ዋይዙዋዓዳ?» ጌዔኔ።

14 ዩሱሴ ጋዓንቴ ዩይ፡ ዋይሢሢ ዲቃቴ ሄርሻንዲያ ሄላንዳኣና ፔቴ ባአዚታዎ ማሂ ከኤዚባአሴ።

ዩሱሴ ሃይቃንዳጉዲ ዋጊንቴሢ

(ማር. 15፡6-15፤ ሉቃ. 23፡13-25፤ ዮሃ. 18፡19—19፡16)

15 ሮማ ዓጮ ዋይሢሢ ሌዓ ሌዓ ዓይሁዶኮ ዑሣ ዓአዲያ ቦንቾ ከሎና ዳራ ዔያቶም ቡሊንታንዳጉዲ ኮዓ፡ ቴቴ ዓሲ ቡላሢ ዔርቴያኬ።

16 ዩናና ፑርቴሞና ዔርቴ፡ ባርባኔ ጌይንታ ዓሲ ቴቴ ዓአኔ።

17 ዳራ ቡከንታዛ ጲላዎሴ፡- «ባርባኔና ሜሲሄ ጌይንታ ዩሱሴናይዳፓ ዎና ታ ዒንሢሢም ቡላንዳጉዲ ዒንሢሢ ኮዓይ?» ጌዔኔ።

18 ጲላዎሴ ዩያ ጌዔሢ ዔያታ ዒዛ ቂኢሩሞና ዓአሢ ዒንጌሢ ዔራያታዎኬ።

19 ጲላዎሴ ዋጎ ቤዘይዳ ዳራ ዋጋንቴ፡ ዒዛኮ ማቻ፡- «ዩያ ዓሢ ዛሎ ዋንቴ ታ ዓውቴና ሚርጌ ሜታዳኔ፤ ዩያ ጌኤዦ ዓሢ ዑፃ ዓይጎ ባአዚያ ኔ ማዲዋጉዲ» ጋዓ ከኢታ ዒዛም ዳኬኔ።

20 ጋዓንቴ፡ ቁኤሶኮ ሱኡጎና ጨሞና ባርባኔ ዔያቶም ቡሊንቴም ዩሱሴ ሃይቃንዳጉዲ ዓሳ ዎኤም ዳሮ ዳሚና ጌሻኔ።

21 ዓጮ ዋይሢሢያ፡- «ላምዎንሢዳፓ ዎኤ ዒንሢሢም ቡሊንታንዳጉዲ ዒንሢሢ ኮዓይ?» ጋዓዛ፡ ዔያታ «ባርባኔ ቡሊንቶንጎ!» ጌሲ ማሄኔ።

22 ጲላዎሴያ፡- «ሂዳዎ ከሪሰቶሴ ጌይንታ ዩሱሴ ታ ዋዶንዶይ?» ጋዓዛ፡ ቢያሢ «ሱፂንቶንጎ!» ጌዔኔ።

23 ጲላዎሴያ፡- «ዓይጎሮ? ዓይጎ ዒ ፑርታ ባአዚ ማዳይ?» ጌሲ ዎኤዛ፡ ዔያታ ጋዓንቴ «ሱፂንቶንጎ!» ጌሲ ሃቺም ዒላቴኔ።

24 ዒዚ ማዳ ባካ ዣሎ ዔቂሲሢ ማዓንዳኣፓዓቴም ማአዳንዳ ባአዚ ባአሢ ጲላዎሴ ዔራዎ፡- «ታኣኒ ሃያ ዓሢ ሱጉፃፓ ጌኤሺኬ፤ ሃይፓ ሴካ ማዲንዶ ባኮ ዒንሢሢ ዔራኔ» ጌሲ፡ ዋአሢ ዓይሢ ዳሮ ቢያ ቤርታ ኩጮ ፔኤኮ ማሰጎቴ።

25 ዳራ ቢያ ዩማና፡- «ዒዛኮ ሱጉፃ ኑኤና ኑናኣቶና ዑፃ ማዎንጎ!» ጌዔኔ።

27:24 ላሚ. ዋማ 21፡6-9።

26 ይማና ጲላዎስ ባርባኔ ዔያቶም ቡሊ፥ ዩሱሴ ጋዓንቴ ዠራፓና ጳርቂሴሢኮ ጊንፃ ሱፃንዳጉዲ ዓአሢ ዔያቶም ዒንጌኔ።

ፖኦሊሶኮ ዩሱሴ ቦሂዖ
(ማር. 15:16-20፤ ዮሃ. 19:2-3)

27 ሮሜ ዓጮ ፖኦሊሳኦ ዩሱሴ ዔኪ ሮሜ ዓጮ ዎይሢ ጲላዎስ ማአሪ ዓአዲ ማርሾ ጋሮ ጌልዛዖ ፖኦሊሶ ቢያ ዒኢካ ቡኩሴኔ።

28 ዒኢካ ዔያታ ማአዓሢ ዒዛኮ ጉሲ፥ ዲንኪ ዞቄ ዓፒላ ዒዛ ማይሴኔ።

29 ሃሣ ዓንጊሢ ማሪ ካኦቶ ቶኦካ ዓጎ ባኦዚ ማሊሲ ቶኦካ ዒዛኮ ዓጋዖ ዎኦሽጉዴ ሚሢ ኩጫ ዒዛኮ ዓይሢ፥ ቤርታ ዒዛኮ ጉምዓቲ ጉምዓቲ፦ «ዓይሁዴ ካኦቲዮ! ኮሺ ኔኤም ማዖንጎ!» ጌዒ ጌዒ ዒዛ ቦሄኔ፤

30 ጨቲያ ጨቲኔ፤ ሃሣ ዎኦኩጉዴ ኮኦሌሎዎ ዒዛ ኩጫፓ ዔኪ ዒዛኮ ቶኦካ ላሚ ላሚ ጳርቂኔ።

31 ይዖይዲ ዔያታኦ ዒዛ ቦሄሢኮ ጊንፃ ዲንኮ ዞቄ ዓፒሎ ኬሲ ዒዛ ዓፒሎ ጊንሣ ማይሴ ሱፃኒ ዔኪ ዓአዴኔ።

ዩሱሴኮ ሱፃንቶ
(ማር. 15:21-32፤ ሉቃ. 23:25-43፤ ዮሃ. 19:17-27)

32 ዔያታ ኬሰኪ ዴንዲቤቃ ጎይዖይዲ ዓኦ ሲሞኦኔ ጌይንታ ቄሪና ዓጪ ዓሲ ዴንቂ ፑርቲሴ ዓሶ ሱዖ ሚዖ ዓሢ ዎልቄና ኬዲሴኔ።

33 ዩካፓ ዔያታ፦ «ቶኦኪ ማጌሢ» ጌይንታ ጎልጎታ ሃሌኔ።

34 ዓንጎና ጳርቂ ኪፃሶና ቤዛ ሃርጋሢ ማኦዳንዳጉዲ ዎይኔይዳፓ ኮሾና፥ ጨሽና ዎላ ሲኢሪንቴ ዑሺ ዑሽካንዳጉዲ ዩሱሴም ዒንጋዛ፥ ዒ ጋዓንቴ ዑኡቂ ዛጋዖ ዑሽካኒ ኮዒባኦሴ።

35 ዩሱሴ ዔያታ ሱፃዖ ዒፃ ዓጊ ዓፒሎ ዒዛኮ ጊሽቲ ዔኬኔ።

36 ዒኢካ ሃሣ ዴዒ ዒዛ ዔያታ ካፓኔ።

37 ዳቢንቶ ዒዛኮ ዔርዛንዳጉዲ ጌዒ «ሃይ፥ ዓይሁዴ ካኦቲ፥ ዩሱሴኬ» ጋዓ ፃኦፖና ባኦዚ ዩሱሴ ሱፃንቴ ፑርቶ ዓሶ ሱዖ ሚዖ ዑፃ ጌሢኔ።

38 ዒዛና ዎላ ላምዖ ሱላ ፔቲሢ ዩሱሴኮ ሚዛቆ ዛላ፥ ባጋሢ ሻውሎ ዛላ ማሢ ዔያታ ሱፃኔ።

39 ዒኢና ጎይዖ ዓኦዳ ዓጎ ሚርጌና ጫሽኪ ጫሽኪ ሃሣ ቦሄሢና ቶኦኮ ፔኤኮ ዓጊሢ ዓጊሢ፦

40 «ጌኤዠ ማኣር ሻሂ፥ ሃይሃ ኬሊዳ ማዠሃ! ሂንዳ ኔና ዳቂሽ! ሂኖ ሂንዳ ያኦሲ ናይ ኔ ማዔቶ ፑርቶ ዓሶ ሱዖ ሚፃፓ ኬዳ!» ጋዓኔ።

41 ዩያጉዲ ቁኤሶኮ ሱኡጎንታ ሙሴ ዔርዘ ዋጎ ዔርዘ ዓሶንታ ጨሞንታ ቢያ ቦሂ ቦሂ፡-

42 «ሜሌ ዓሶ ዒ ዳቂሽኔ፤ ፔና ጋዓንቴ ዒ ዳቂሻኒ ዳንዳዑዋሴ፤ ሂንዳ ዒ ዒሰራዔኤሌ ካኣቲ ማዔቶ ሃሢ ፑርቶ ዓሶ ሱዖ ሚፃፓ ኬዳንጎ፤ ኦኡኒ ዒዛ ጎኔኬ ጌዒ ጉሙርቃንዳኔ።

43 ዒ ያኦሲና ጉሙርቃኔ፤ ሃሢ ሶኦሲ ናይኬ» ፔና ዒ ጋዓኔ፤ ሂንዳ ያኦሲ ዒዛ ናሽካቶ ዳቂሻንጎ!» ጌዔኔ።

44 ዩያጉዲ ዒዛና ዋላ ሱዒንቴ ሱሎንሢያ ዒዛ ጫሸካኔ።

ዩሱሴኮ ሃይሶ

(ማር. 15፡33-41፤ ሉቃ. 23፡44-49፤ ዮሃ. 19፡28-30)

45 ዓባ ሳዛ ማዓ ዋዳፓ ዳንዲ ማሢ ደምቦልሳ ዋዳ ሄላንዳኣና ሳዓ ቢያ ዲሜኔ።

46 ዩማፓ ማሢ ደምቦልሳኣና ዩሱሴ፡- «ዔሎሂ! ዔሎሂ! ላማ ሳባቂታኒ» * ጌዒ ዳጊዲ ዒላቴኔ። ዩኖኮ ቡሊፃ «ታ ያኦዛሢዮ! ያኦዛሢዮ! ዓይጎር ኔ ታና ሃሽይ?» ጌይሢኬ።

47 ዒኢካ ዔቂ ዓኣ ፔቴ ፔቴ ዓሳ፡- «ሃይ ዒ ዔኤሊያሴ ዔኤላኔ!» ጌዔኔ።

48 ዩማና ዔያቶይዳፓ ፔቴሰኬይ ጳሽኪ ዳንዲ ዓፒላ ቱርጫጉዳ ባኣዚ ዋይኔይዳፓ ኮሸና ሶልኪ፥ ኮሸኩዋ ዑሺዳ ዓጊ ዋኦሽጉዳ ሚሢና ዩሱሴ ዑሸካንዳጉዲ ዔኪ ዒንጌኔ።

49 ሃንጎ ዓሳ ጋዓንቴ፡- «ሃሹዋቴ፤ ሂንዳ ዔኤሊያሴ ሙኪ ዒዛ ዳቂሻቴ ኦ ዛጎም!» ጌዔኔ።

50 ዩሱሴ ላሚ ሃሢ ዳጊዲ ዒላቴሰካፓ ሽምፓሢ ዒዛኮ ዲጴኔ።

51 ዩኖና ጌኤዠ ማኣርኮ ዲማሲዖር ጎኦቦና ዓፒላ ሎፓ ሉ ሄሊ ደርዓ፥ ላምዖ ፓቂንቴኔ፤ ሃሢ ሳዓኣ ዓጊፃም ላላ ፃሄኔ፤

52 ዩማና ሚርጌ ዲኡፒ ቡሊንቴም ያኦሲም ዲማዴያ ማዔ ሃይቁ ዓሲያ ሃይባፓ ዔቁኔ።

53 ዩና ዓሳ ዲኡፓፓ ኬሰኪ፥ ዩሱሴ ሃይባፓ ዔቁሢኮ ጊንፃ ያኦሲም ዲማዴ ካታሞ ጌሊ ሚርጌ ዓሲም ጴጴኔ።

27:40 ማቲ. 26:61፤ ዮሃ. 2:19። 27:43 ዓይኑ. 22:8። * 27:46 ዔሎሂ ዔሎሂ ላማ ሳባቂታኒ፡- ጌይንቴዛ ዓራማይኬ ዓሲ፤ ሃሢ ዔብሬ ዓሲ ሙኡቸና ጌይንቴያኬ። 27:46 ዓይኑ. 22:1። 27:48 ዓይኑ. 69:21። 27:51 ኬሲ. ማፃ 26:31-33።

54 ጭቶ ፖኦሊሶ ዓይሣሢና ዒዛና ዎላ ዩሱሴ ካፓዘንሢ ሳዖኮ ባገጂዖና ሃንጎ ማዔ ባኮዎ ቢያ ዛጋዖ፥ ሚርጌና ዒጊጨ፡- «ጎኔና ሃይ ዖኦሲ ናይታዖኩ!» ጌዔኔ።

55 ዒማና ጌሊላይዳፓ ሙኬዘንሢና ዩሱሴ ኮይሳ ባኣዚና ቢያ ማኣዲ ማዲ፥ ዒዛ ጊንዖ ሃንታ ሚርጌ ላኣሊ ዩያ ባኮ ሃኬ ዔቂ ዛጋኔ።

56 ዔያቶ ባኣካ ሜግዴላ ዓጮ ማይራማ፥ ያይቆኦቤና ዮሴፔናኮ ዒንዳ፥ ማይራማ፤ ሃሣ ዜብዲዮሴ ናኣቶኮ ዒንዳኣ ዓኣኔ።

ዩሱሴኮ ዱኡቲዖ
(ማር. 15:42-47፤ ሉቃ. 23:50-56፤ ዮሃ. 19:38-42)

57 ሳዓ ዓማዛ ዓርማቲያሴ ዓጨ ዓሲ ማዔ፥ ዮሴፔ ጌይንታ ፔቲ ዖርጎቺ ዓሲሰኬያ ሙኬኔ፤ ዒዚያ ዩሱሴ ጉሙርቂቂ፥ ዒዛ ዓሲ ማዔያኬ፤

58 ዩይ ዓሢ ጲላዖሴ ኮይላ ዓኣዳዖ ዩሱሴኮ ሌዘ ሺኢቃዛ፥ ጲላዖሴያ ሌዛ ዒዛም ዒንጊንታንዳጉዲ ዓይሣኔ።

59 ዩያሮ ዮሴፔ ሌዘ ኬይሲ ሱኡዲ፥

60 ፔኤም ጌዒ ዶዶ ሹጮ ጰሊ፥ ቦኦኪ ኮሾና ቆኦፖይዳ ዱኡካዖ ጳኤፔ ሹቺ ቡምባልሲ ዔቶ ካሮ ዎዲ ዴንዴኔ።

61 ዩማና ሜግዴላ ዓጮ ማይራምና ባጎ ማይራምና ዱኡፖኮ ቤርቶ ዛላ ዴዒ ዓኣኔ።

ዩሱሴኮ ዱኡፖ ካፖናሢ

62 ዚሮ ጉቲሎ ዓይሁዶ ዓሶኮ ሃውሾ ኬሎና ቄኤሶኮ ሱኡጎና ፔርሴ ዓሶና ፔቲምና ጲላዖሴ ኮራ ዓኣዲ፡-

63 «ጎዳሢዮ! ዩይ ሉኡቃሢ ቤርታ ሳዛና ዓኣዖ ሃይሃ ኬሊኮ ጊንፃፓ ሃይባፓ ታ ዔቃንዳኔ» ጌዔሢ ኑም ጰቂኔ።

64 ዩያሮ ዒዛኮ ጊንዖ ሃንታዘንሢ ዴንዲ ዉኡቂ፥ ዴሮም ሃሣ ሃይሾ ዒ ሃይባፓ ዔቂኔ» ዔያታ ጎዑዎጉዲ፥ ዱኡፓ ሃይሃ ኬሊ ሄላንዳኣና ካፒንቶም ዓይሣ፤ ያዲ ማዒባኣያታቲ ጋፒንዖይዳ ዓሶ ዳሲሺፃ ቤርታኣሰካፓ ባሼ ማዓንዳኔ» ጌዔኔ።

65 ጲላዖሴ፡- «ዒንሢኮ ፖኦሊሶ ዔኪ ዓኣዲ ካፒሱዎቲ» ጌዔኔ።

66 ዩካፓ ዔያታ ዴንዲ ዱኡፖ ካሮ ሹጮይዳ ዖኑም ዔርዛ ማላቶ ጰርቂ፥ ፖኦሊሶና ካፒሲ ሃሼኔ።

27:56 ሉቃ. 8:2-3። 27:63 ማቴ. 16:21፤ 20:19፤ ማር. 8:31፤ 9:31፤ 10:33-34፤ ሉቃ. 9:22፤ 18:31-33።

28

ዮሴፊስ ሃይባፓ ዔቂዖ

(ማር. 16:1-10፤ ሉቃ. 24:1-12፤ ዮሃ. 20:1-10)

1 ዓይሁዶ ዓሶኮ ሃውሾ ከሌ ጋፓዛ ዚር ጉቴሎ ጉቴ ዓማ ማግደላ ዓጮ ማይራሞና ሃሣ ሃንጎ ማይራሞና ዎላ ዮሴፊስ ዲኡጉ ዛጋኒ ዓኣዴኔ።

2 ዔያታ ሙኩዋንቴ ቤርታ ዔርቲባኣንቴ ሳዓ ዓጊፃዛ፣ ጎዳኮ ከኢታንቻ ጫሪንጫፓ ከዲ፣ ዲኡጉ ዔቶ ካር ዎዶና ሹጫሢ ቡሞባልሲ ዐፃ ደዔኔ።

3 ዬያ ከኢታንቻሢኮ ዓኣጉ ካራ ዜኤሊንሢጉዲ ፖዓያ፤ ሃሣ ዓፒላኣ ሻቺጉዲ ቦኦሪያኮ።

4 ዲኡጉ ዔቶ ካፓዞንሢ ከኢታንቻሢ ዓጊጪጃይዳፓ ዔቂያና ዲቃታዖ ሃይቁ ሌሲጉዲ ማዔኔ፤

5 ከኢታንቻሢ ላኣሎንሢ ኮራ፡- «ዓንሢ ዓጊጪጉቴ፤ ሱዳንቴ ዮሴፊስ ዓንሢ ኮዓሢ ታ ዔራኔ፤

6 ዓዚ ሃይካ ባኣሴ፣ ዓ ከኤዜሢጉዲ ሃይባፓ ዔቂኔ፤ ሃኒ ሙከ ዓ ላሂ ቤዞ ዛጉዎቴ።

7 ሃሢ ሩኡሪ ዓኣዲጋፓ ዓዛኮ ጊንዖ ሃንታ ሩኣቶሞ <ሃይባፓ ዓ ዔቂኔ፣ ጌሊላ ዓንሢ ዓ ቢሪ ዓኣዳንዳኔ፤ ዓኢካ ዓንሢ ዓዛ ዛጋንዳኔ፣ ጌዒ ከኤዙዎቴ፤ ዬያ ታ ዓንሢሞ ከኤዜያኮ» ጌዔኔ።

8 ዬካፓ ላኣሎንሢ ኮሺ ዓጊጪሢሃና ሃሣ ዎዛና ዲኡጉ ቤዛፓ ዐኩና ዓዛኮ ጊንዖ ሃንታዞንሢ ከኤዛኒ ጳሽከ ዳንዴኔ።

9 ዓኢካ ቤዞማና ዮሴፊስ ዔያቶ ዳንቃዖ፡- «ዓንሢ ኮሺዳ?» ጋዓዛ ዔያታ ዮሴፊስ ባንሢ ሙካዖ ሂርኪ ጌይ ቶኮ ዓዛኮ ዓርቂ ዓዛሞ ዘጊኔ።

10 ዮሴፊስ፡- «ዓንሢ ዓጊጪጉቴ፤ ዳንዲጋፓ ታ ዓሾንሢ ጌሊላ ዓኣዳንዳጉዲ ዔያቶም ከኤዙዎቴ፤ ዓኢካ ታና ዔያታ ዛጋንዳኔ» ጌዔኔ።

ዲኡጉ ካፓ ዓሶኮ ማርካዲዖ

11 ላኣሎንሢ ካታሞ ዓኣዲጃይዳ ዓኣንቴ ዲኡጉ ካፓ ፖኦሊሶንሢ ደፓ ፔቴ ፔቴዞንሢ ካታሞ ዳንዳዖ ማዔ ባኮ ቢያ ቁኤሶኮ ሱኡጎም ከኤዜኔ።

12 ዬካፓ ቁኤሶኮ ሱኡጎና ጨሞና ዎላ ቡኪንቴ ዘርቴሢኮ ጊንዖ ፖኦሊሶንሢ ማርጌ ማኢሹ ዓንጋዖ፡-

13 « ሉኡኒ ጊንዒ ዓኣንቴ ዮሴፊስ ጊንዖ ሃንታዞንሢ ሙከ ዓዛኮ ሌዞ ዉኡቄኔ» ጌዒ ዳርሞ ከኤዙዎቴ።

14 ዓጮ ወይሆነ ዩያ ወይዜያ ማዕዳቶ ዲንሢዳ ሜቶ ዲ ሄሊሱዋጉዲ ኑኡኒ ዲዛም ከኤዛንዳኔ» ጌዔኔ።

15 ዩያሮ ፖኦሊሶንሢ ዔያቶም ዲንጎና ሚኢሾ ዔካዖ ዔያቶም ከኤዛንቴሢጉዲ ማዕኔ፤ ዩያ ሃሮ ሄላንዳኦና ዓይሁዶ ዓሳ ከኤዛኔ።

ዩሱሴኮ ጊንዖ ሃንታዞንሢም ጴዲዖ

(ማር. 16:14-18፤ ሉቃ. 24:36-49፤ ዮሀ. 20:19-23፤ ዳኪ. ማዶ 1:6-8፤ 1ቆር. 15:3-8)

16 ዩካፓ ዩሱሴኮ ጊንዖ ሃንታ፥ ታጳ ፔቴዞንሢ ዲዚ ዔያቶም ዓኣዳንዳጉዲ ከኤዜ ጌሊላይዳ ዓኣዲኮ ዓኣዳኔ።

17 ዲኢካ ዲዛ ዔያታ ዴንቃዖ ዲዛም ሂርኪ ጌዒ ዘጌኔ፤ ዘላ ጋዓንቴ ዲዛ ናንጋንዳ? ጌዔኔ።

18 ዩማና ዩሱሴ ዲዛኮ ጊንዖ ሃንታዞንሢ ኮራ ሙካዖ፡- «ቢታንቶ ቢያ ጫሪንጮና ሳዖናይዳ ታኣም ዲንጊንቴኔ፤

19 ዩያሮ ዓኣዲጋፓ ዴሮ ቢያ ዓዶ፥ ናዖ፥ ዓያሮ ጌኤዦናሮ ማዓንዳጉዲ ዋኣዖና ማሰኪ ማሰኪ ታዓሲ ማሁዋቴ፤

20 ታ ዲንሢም ዓይሢ ባኮ ቢያ ዓሳ ካፓንዳጉዲ ዔያቶ ዔርዙዋቴ፤ ታኣኒያ ዓጮኮ ጋፒንዖ ሄላንዳኦና ቢያ ዋዴ ዲንሢና ዋላኬ» ጌዔኔ።

lxxxix

ጌሌዢ ማግኔግ
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዢ ማግኔግ

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929